

लूकाए ओसरो

चाव था

आव पोस्तोको दाक्दर येन दोऽयाव तोबो लूकाए ओसरो ज़। आवए उमिन पावले ओसरोल ब रैंऽया (कलस्सी ४:१४, २ तिमोथी ४:११; फिलेमोन २४)। आव पाँ भरी येसु किताव ओल्यो लिद पक्का थऱैदचान्याए जूनी सर्सिउ लिऽया (लूका १:१-४)। गो प्राइँ जातलाव मिँरालाई बाँचैऽयाव ज़ लिद सरैंऽसिउ ब लिऽया (२४:४७)। नो पाँए ओअर्थ गोप्रभु येसुए जखायसलाई है ओदोव पाँत ज़ रैंऽद ले। नो पाँ आव ज़ — “डा मिँ मिन्सिउ इताव माव डोइवरालाई खिम्द बाँचैना डाहुव ज़” (१६:१०)।

ओजरानी उतुपाड पै तहकैसिउ

१ प्राइँए गेखालाव ताव भरी कुधुए कागतत चरैऽन्या उदिम दाद नैर। २ नोराए यासरो भरी डादाकिन ज़ येसुस लिद ओयेन रैंऽवर ओपाँ सथैऽयावराए ल्योनी ज़ सर्द नैर। ३ गेडैताव थियोफिलस, डा ब डादाकिन ज़ बनै चावस तहकैद प्राइँ पाँ भरी खिम्द डानै, सोनो नजूनी तोबो

ओमेलास ताव पाँ सन्या युँ डादोके। ४ हो ताकिन नँलाई है दासिउ पाँर साचो ज़ ओल्यो लिन्या सैन्या नले।

जकरिया सोनो एलीसिबानी

५ यहूदियालाव राजा हेरोदए ओपालाक अबिया थरलाव तोबो पुजारी जकरिया यादोऽयाव उलिऽयाव। नोए ओज्या ब हारून पुजारीए ओखलकलाव ज़, उमिन एलीसिबा ओल्यो।

१:५ १ इति २४:१०



६नोनी ज्या-री ज़ परमेस्वरए ओड़ाक धर्मलाव येन दाद निजुनी निभाःज्याव, परमेस्वरए ओकानुन ब माबिरैद ज़ निदोऽज्याव। ७खाली एलीसिबा जर्मननी ज़ थारी ओल्योए नोनी निज़ार तोबो ब यामालिऽज्याव। नोनी नेब्लो ज़ निबेला बाद सेर्द जूचास्द निलिऽज्याव।

परमेस्वरए ओचाकज्या यूहन्नाए उजूनी ओपाँव

८तछा जकरिया परमेस्वरए ओड़ाक पुजारी येन ओदोऽज्याव। हो साता भरिल ध्यान फ़िमलाव सेवा दान्या नोए ओखलकराए यापाला ओल्यो। ९पुजारीराए याचलन मिताव परमेस्वरए ओध्यान फ़िमल धुप भाःन्याए जूनी गोला याभाःक जकरिया परिके। १०नो उजील पसिद धुप ओभाःज्याक उपुर्काव मिँ भरिए लाँःक पोँखारिउ ज़ यानैऽज्याव। ११नल उलिऽज्याक परमेस्वरए ओचाकज्यालाई धुप ओभाःज्याव पोए ओवोर्दा च्याँःसिद उलिऽज्याव रँःक्यो। १२नोलाई रँःद जकरियाए उयुँ स्यासे सतेद बनै छेःके। १३नाःत ज़ परमेस्वरए ओचाकज्याए, “नँ ताछेःनी जकरिया, नपोँखारिऽज्याव परमेस्वरए थैक्यो। है जैद नज्या एलीसिबाए ज़ा

तोबो दैरिऽज्याव। नँ नोए उमिन यूहन्ना नैदियो। १४नो उजर्मिक नयुँ बनै होलाँ ताद रेंन्या नले। छुतर ब रेंन्या लेर, १५काराव ल्यो ताकिन नो परमेस्वरए ओड़ाक घेप्पा मिँ थंरिन्या ले। नोए जिम्ज़ाकिन ज़ मद छोकोरा जात्त ज़ ओन्या माले। नो ओआमाए उफूल ज़ छैव पुरूस दैरिऽज्याव। १६नोए इस्राएलीरालाई याप्रभु परमेस्वरए ल्योदा कुधुलाई ज़ यायुँ फकैद याएरिऽज्याव। १७नोए एलियाए ओसक्ती ओगेर रैद हुरिऽज्याव खीसए ओड़ादा बाद होए उजूनी मिँरालाई तयार याजैरिऽज्याव। बाबुरालाई याज़ारास यासखैरिऽज्याव, पापीरालाई ब धर्मलाव येमल याभाःरिऽज्याव,” है दोक्यो।

१८हाःत ज़ जकरियाए परमेस्वरए ओचाकज्यालाई, “आव भरी डा कै जैद पतिन्या? डा डासेरधुके, डाज्या ब जूचास्थुके,” है ओदोक ते, १९परमेस्वरए ओचाकज्याए, “डा एकतार परमेस्वरए ओड़ाकाव च्याँःसिऽज्याव गब्रिएल ज़। नल्योदा आव चाव था सथैना परींद नैनाव। २०डालाई नमापतिनाव प्राइँना आव है डादींव याका भरी ओमातावा पै नँ लाता ताद मापाँधुन्या तान्या नले।



डा है डादींव पाँ थिक हो बेलाक ज़ योःन्या ले,” है दोक्यो।

२१ हाः बेलाक नो लाँःकाव लिङ्यावराए ‘काता ओदोव?’ लिद जकरियालाई कींद यानैङ्याव। २२ बल्ल बल्लड नोराए ल्योड पुलुस्द नोरास काता ज़ मापाँधुद उकुइए सान दाद ओरायोए नोराए, “आवए ते ध्यान फ़िमल परमेस्वरए ओदर्सन ओदैव ची ओल्यो,” है लिकेर।

२३ जकरिया ध्यान फ़िमलाव सेवा दान्या ओपाला ओयोःवत उफ़िमदा बाके। २४ नाःकिन ज़ ओज्या एलीसिबा ज़ा दैन्या ताद पाँच मैना भरी आदा होदा माबाद उफ़िमल ज़ लिद, २५ “मिँराए डालाई अइज़ फ्याःके है यादाँदी ब परमेस्वरए डालाई उयुँ नाद ज़ा दैन्या जैनाक्यो,” है उलिङ्याव।

परमेस्वरए ओचाकज्या येसुए उजूनी ओपाँव

२६ एलीसिबा छ मैना ओतावत परमेस्वरए फरी ओचाकज्या गब्रिएल-लाई ज़ गालील खन्दलाव नासरत सहरल २७ तोबो कन्या लुज़ाए ल्योक परीक्यो। नो लुज़ालाई भर्जा दाऊदए ओथोलाव योसेफ यादोङ्यावत

निद यानैङ्याव। नोए उमिन मरियम ओल्यो।

२८ परमेस्वरए ओचाकज्या ओल्योक बाद, “जेरो प्राइँरानी असिक दैव मेंमा, परमेस्वर नँस ज़ लिङ्या,” है ओदोक ते, २९ ‘आव काता ओपाँव ओताव?’ लिद उयुँ काता माँःती जैक्यो। ३० नो चाकज्याए फरी, “ताछेःनी मरियम, परमेस्वरए उयुँ नल्योदा गराँद ले। ३१ नँ गर्बवती ताद खेपा ज़ा तोबो नदैरिङ्या। नोए उमिन येसु नैदियो। ३२ नो बनै घ्योःव मिँ ताद माहान परमेस्वरए ओज़ा ज़ लिद थःरैरिङ्यार। नोलाई परमेस्वरए, ओल उपुर्खा दाऊदए ओराज्या चलैःन्या जैरिङ्याव। ३३ है जैद याकूबए ओथोलावराए याडैताव ज़ ताद नोए ओराज्या खर्क ज़ खेःन्या माले,” है दोक्यो।

३४ हाःत ज़ मरियमए, “आव भरी कै जैद तान्या? डा आःपै कन्या ज़ डालिङ्या,” है ओदोक ते, ३५ नो चाकज्याए, “नँ नक्याँत परमेस्वरए छैँव उपुरूस हुद माहान परमेस्वरए ओसक्तीनी ज़ा नदैरिङ्या। है जैद नो छैँव पुरूसनिकाव भाउज़ालाई परमेस्वरए ओज़ा ज़ है दान्या लेर। ३६ अछादी नँ नक्याँदाडाव एलीसिबाए पाला जूचास्द ब ज़ा दैन्या ताद ले।

नो खर्क ज़ ज़ा मादैव है यादोज़्याव एलीसिबाए उफूलाव ओज़ा छ मैना ताधुके। ३७ परमेस्वरए ओमादोधुव काता ज़ माले,” है ओदोक ते, ३८ मरियमए, “डा परमेस्वरए ओबाँदानी ज़। है नलिज़्याव मिताव ज़ ओताक,” है ओदोव प्राइँना ज़ परमेस्वरए ओचाकज्या पुलुस्द बाके।

मरियम एलीसिबाए उक्लिमदा दैसिना ओबाव

३९ तछा छींनी मरियम भ्नाःसिद लाला लुलु यहूदियालाव गोल जकरियाए ओनाखारल बाके। ४० जकरियाए उक्लिमल पसिद मरियमए एलीसिबालाई जेरो है ओदोज़्याव ४१ ओथैव प्राइँना एलीसिबाए उफूलाव ओज़ा ज़ोके। हाःत ज़ एलीसिबा छैव पुरूसए ब्याल्द, ४२ बनै रेंद, “मेंमा भरिरानी नँ असिक दैव ज़ नलिज़्या। नफूलाव नज़ा ब असिक दैव ज़ तारिज़्या। ४३ काता डालाई आः परमेस्वर दाइनो ओताव, डाप्रभुए ओआमा डाल्योक नहुव। ४४ नँ नयाःनी जेरो है नल्यो प्राइँना ज़ डाफूलाव डाज़ा रेंद ज़ोके। ४५ नँ परमेस्वरए है उलिज़्याव भरी सयोःदचान्या ज़ ले लिद नयुँ हुबो

मेंमा धन्याकाव नलिज़्या,” है लिद पाँके।

मरियमए ओपाँ

- ४६ मरियम नो भरी थैद है लिके,
“डा डाप्रभु परमेस्वरए उमिन
बनै सघ्योःद डाएज़्या।
- ४७ डालाई बाँचैज़्याव परमेस्वरस
बनै रेंद ज़ डापाँज़्या।
- ४८ नोए डा इताव ज़िम्ज़ा
ओबाँदानीलाई मामेंःद
डाल्योदा उयुँ य़ाल्के।
ननी ज़ मिँराए डालाई
पिरी पिरी पै
असिक दैव थःरैनारिज़्यार।
- ४९ डाजूनी आःल्दिउ येन
दादचाज़्याव
माहान परमेस्वरए उमिन
बनै छैव लिज़्या।
- ५० परमेस्वरलाई रेंःद छेःज़्यावरालाई
ओल पिरी पिरी पै
उयुँ नाज़्या।
- ५१ नोराए जूनी उकुइए
बनै सक्तीलाव येन
दादचाव ज़ नैज़्याव।
यायुँल सघ्योःसिज़्यावरालाई ते
चितराँ पुतराँ जैद
यामिन समैद याएज़्याव।

- ५२ घेप्पारालाई यासिंहासनतिन
सेल्द नल जिम्झारालाई
याभाःज्याव।
- ५३ करेज्यावरालाई चाव चाव याद
याकरे सैःद याएज्याव।
साहुरालाई ते रितो ज़ याजैज्याव।
- ५४ ओयाकार मामेंःद ओसेवा
दोज्याव इस्राएली उमीरालाई
सघैव ज़ यानैज्याव।
- ५५ है जैद अब्राहाम सोनो
ओथोरालाई है ओरादोव
मिताव याल्योदा एकमन्या
उयुं गरॉव ज़ लिज्या।”
- ५६ मरियम एलीसिबाए उक्किमक
ओल्यो सोमैना ओतावत उक्किमदा
ओल्द बाके।

रील सछैज्याव यूहन्ना उजर्मिउ

- ५७ एलीसिबाए ज़ा दैन्या ओमास
ओयोःवत खेपा ज़ा दैक्यो।
- ५८ ‘परमेस्वरए उयुं याल्द अचम्ब-
लाव येन दोदिक्यो दी’ लिन्या थैद
ओलापजीकावर सोनो ओक्याँ-
दाडावर बनै रेंकेर। ५९नो भाउज़ा
उजर्मिउ आथ दिनत याचलन
मिताव क्यालन्या सरेस जैन्याए
जूनी प्राई दुप्सिद उमिन ब ओबाबुए

उमिन स्यासो ‘जकरिया’ नैदयाव
पैंकेर। ६०खाली ओआमाए भैंःद
मायाद, “माःक, आवए उमिन
यूहन्ना तारिज्या,” है ओरादोक
ते, ६१नोराए, “नथोल इताव मिन
ते माले सानी,” है दोकेर। ६२फरी
नोराए ओबाबु जकरियालाई सान
दादयाद, “नो नज़ाए उमिन काता
नैदयाव नपैज्याव?” है यादोक ते,
६३जकरियाए फल्या तोबो रैव परींद
नत, ‘आवए उमिन यूहन्ना’ लिद सर्द
याएक्यो। नोराए निताव रेंःद प्राई
ज़ अचम्ब ताकेर। ६४हो प्राईना ज़
जकरियाए ओसेर पलास्सिद पाँधुन्या
ताद परमेस्वरलाई धन्या धन्या है
ल्यो ज़ लिके। ६५नो हुद लिज्यावर नो
भरी रेंःद अचम्ब ताद छेःद नो पाँ भरी
यहूदिया गों जीदा प्राईंदा ज़ थास्के।
६६‘नो भाउज़ा ओघ्योःक किताव
तान्या ओताव?’ लिद थैज्याव भरिए
यायुंल है लिकेर। नोए ओक्याँत
परमेस्वरए बास दाद ओनैज्याव
ओल्यो लिन्या थःरैकेर।

जकरियाए ओपाँ

६७ ओबाबु जकरिया छैव पुरूसए
ब्याल्द अइ लिद पाँके,

- ६८ “इस्त्राएलीराए याप्रभु परमेस्वरए
उमिन बनै ओघ्योःक।
गे उमीराए गेल्योक हुद
बाँचैसिक्यो।
- ६९ ओनोकोर दाऊद राजाए ओथोल
गेलार्इ जोगोइद बाँचैन्या
तोबो भेंःस्या
उथैद नैदचासिउ।
- ७० नोए उज्जनी परमेस्वरए भाःकिन
ज़ छैँव उमीं अगमबक्तराए
यायाःनी पाँव ज़ उलिज़्याव।
- ७१ नोराए यापाँ आव ब लिज़्या —
‘गेसुतुरराए ल्योनी जोगोइद,
गेलार्इ सोज़्यावराए याकुइनी ब
पाथस पलेःन्या ले।’
- ७२ है जैद गेसाखा पुर्खाराए ल्योदा
उयुँ गराँद,
नोरालार्इ ओरायो छैँव
बाचालार्इ सयोःदचाव ज़
नैज़्याव।
- ७३ नो बाचा गेपुर्खा अब्राहामलार्इ
तोबो किज्या भाःद —
- ७४-७५ ‘गेलार्इ गेसुतुरराए ल्योनी
पलेःन्या,
सोनो गेजिउ भरी ओलस लिद
उयुँलाव मिताव छैँव येन
सुलार्इ रँःद ब माछेःद ज़
दान्या जैद नैदचासिउ।’

- ७६ अब ते नँ डाज़ा यूहन्ना, नँलार्इ
माहान परमेस्वरए अगमबक्ता
थःरैनिरिज़्यार।
नँ हरिज़्याव प्रभुए ओड़ा ओड़ा
बाद ओयेम बनैदचान्या नले।
- ७७ सोनो परमेस्वरए उमीं
इस्त्राएलीरालार्इ ‘जेपाप
क्याल्द याचिरिज़्याव’ लिद
अजम्बरी जुनील बान्या येम
सतैँदचान्या नले।
- ७८ गेल्योदा परमेस्वरए
उयुँ ओगराँवनी
स्वर्गताव झार झारो ज़गै ब
गेल्योक ज़ हरिज़्या।
- ७९ नो उहुवत सिन्या सजालाव चुम
चुमोल लिज़्यावराए याक्याँत
पलाँव जैदचाद गेलार्इ मनी
परमेस्वरए ल्योदा खैन्या येम
सरैँःदचासिरिज़्याव।”

८० नो भाउज़ा यूहन्ना ओघ्योःनावत
ओसक्ती ल्यो तानाके। इस्त्राएलीराए
याड़ाक ओमासतैँसिवा पै बनड ज़
लिके।

येसु उजर्मिउ

२ हो बेलाक तछा रोमी माहाराजा
अगस्तसए रोमी राज्या भरिलाव
जनसंख्या सन्या हुकुम याएक्यो।

२नो उस०कताव यासरो जनसंख्या सिरिया खन्दलाव हाकिम कुरेनियसए ओपालाक ओल्यो। ३यामिन सर्सिना प्राईं ज़ सु सु यासाखा पुर्खार याजर्मिउ सहर सहरदा ज़ बाकेर।

४है जैद योसेफ पाला उलिज़्याव गालील खन्दलाव नासरतनी यहूदिया खन्दलाव बेथलेहेम यादोज़्याव दाऊद राजाए ओनाखारल उमिन सर्सिना बाके, काराव ल्यो ताकिन योसेफ दाऊदए ओथोलाव ज़ ओल्यो। ५निद यानैज़्याव ओज्या मरियमलाई ब ओलस ज़ लाँक्यो। नो बेलाक मरियम गिसो क्याँस उलिज़्याव। ६बेथलेहेमल निलिज़्याक ज़ सुत्क्याल्ली तान्या बेला ताद, ७जेथा ज़ा दैक्यो। नो उजर्मिउ प्राईंना ज़ दालए दाल्द बाछाराए छी ज़्यान्या पोल नैक्यो। भत्तील लिन्या पो निमादैवए गोथल निलिज़्याव।

परमेस्वरए ओचाकज्यार सोनो

गावलार

८हो छ्याम रील नो नाखारकिन पाखाड तोबो बाँल गावलाराए बेधार तबगाल खर्कैद यारानैज़्याव। ९हाः बेलाक ज़ परमेस्वरए तोबो ओचाकज्या उमँःजानी गावलाराए याल्योक सरैँःसिहुद परमेस्वरए ओज़गै ब प्राईंदा ज़ ज़गै जैक्यो। नो रँःद बनै छेःकेर। १०हाःत ज़ नो चाकज्याए,

“जे ताछेःच्यो, डा जेलाई बनै चाव था रैद नैद डाय़ाचिए। नो थात मिँ भरी बनै रेंन्या लेर। ११आछिम दाऊदए ओनाखारल इस्राएलीरालाई बाँचैन्या तोबो जर्मिद ले। नो जर्मिउ प्रभु ख्रीस ज़। १२जे नोलाई सरैःन्या सरैःस, नो भाउज़ालाई बाछाराए छी ज़्यान्या पोल दालए दाल्सिउ सेप्सिउ दैन्या जेले,” है यादोक्यो। १३हाःत ज़ नो चाकज्याए ओनैर बनै माहोल्या हुद परमेस्वरए ल्योदा बनै खुसी ताद है लिकेर,

१४“स्वर्गताव परमेस्वरलाई

ज़गै मगै ओताक,

मानुवाताव उयुँलाव मिताव

मिँराए यायुँ ब

होलाँ ओताक।”

गावलाराए येसुलाई याचिऊनाव

१५नो परमेस्वरए ओचाकज्यार स्वर्गदा याबाव छींनी नो बेधा गावलाराए या याल, “दे, गे बेथलेहेमदा गेबा, प्रभुए है ओदासिउ गेचिऊना,” है लिद, १६लाला लुलु नाखारल धोंःनाद मरियम सोनो योसेफनिलाई यारदैकेर। नो भाउज़ालाई ब बाछाराए छी ज़्यान्या पोल सेप्सिउ दैकेर। १७है जैद आव रँःद नो भाउज़ाए उजूंनी परमेस्वरए ओचाकज्याए है ओरादोव भरी

है यारादोकेर। १८नो गावलाराए यापाँ थैव भरी प्राइँ ज़ अचम्ब ताकेर। १९मरियम ते नो पाँ भरी उयुँल नैद खामिक्यो। २०नो गावलाराए नो चाकज्याए है ओरादोव मिताव याथैव यारँ:वए परमेस्वरए उमिन सध्यो:दद्याद ओल्योदा बनै खुसी ताद रेंए रेंए ओल्द बाकेर।

येसुलाई ध्यान फ़िमल यालाँव

२१नो भाउज़ा उजर्मिउ आथ दिनत क्याल्न्या सरैस जैन्या छचाम उमिन ब येसु नैदिकेर। नो मिन ओआमाए उफूल ओमासिर्जिद ज़ परमेस्वरए ओचाकज्याए नैद ओयो मिन ज़।

२२मोसाए ओकानुनलाव मिताव मरियम सुत्क्याल्नी चोखोइसिन्या बेला ओयो:वत यरूसलेमलाव ध्यान फ़िमल बाद येसुलाई परमेस्वरए उमिनत नैकिनी। २३परमेस्वरए ओकानुनलाव सर्सिउ मिताव, “डाताव जर्मिउ खेपा भरी परमेस्वरए उमिनत नैव ज़ परिए।” २४हो छचाम ज़ फरी ओआमा चोखोइसिन्याए जूँनी परमेस्वरए ओकानुन मिताव, कुइतम तादी ब परिवा तादी ब तोजोर लाँद चरै:व उपरिज़्याव। हो मिताव ज़ नोनी लाँद चरै:किनी।

सेरो सिमियोनए ओपाँ

२५हो बेलाक यरूसलेमल तोबो सिमियोन यादोज़्याव उलिज़्याव। नो मिँ चाव धर्मी मिँ ओल्यो। इस्राएली-रालाई बाँचैना हुन्यालाई कींव ज़ ओनैज़्याव। नोस परमेस्वरए छैँव उपुरूसए बास दाद ओनैज़्याव। २६नोए ‘परमेस्वरए ओज़ा ख्रीसलाई डामारँ:वा पै सिन्या डामाले’ लिद परमेस्वरए छैँव उपुरूसनी सैद ओनैज़्याव। २७है जैद तछा नोलाई परमेस्वरए उपुरूसए ध्यान फ़िमल लाँक्यो। हो बेलाक ज़ येसुलाई ब ओबाबु सोनो ओआमानी कानुन मितावनी परमेस्वरए उमिनत नैन्याए जूँनी ध्यान फ़िमल हुद यालिज़्याव। २८सिमियोनए नो भाउज़ालाई उरँ:व प्राइँना ज़ नोलाई ओघोइँल छींद अइ लिद परमेस्वर-लाई धन्याबाद चरै:क्यो,

२९“अ परमेस्वर, अब ते

है नदाँव मिताव ताके।

अब ते आव संसारनी

डा ननोकोरलाई

खुसीस बिदा नयाँदी ब ताए।

३० संसारलाई बाँचैन्याए जूँनी

नपरींव मिँलाई

आव डामीए ज़ डारँ:के।

३१ नोलाई प्राईं मिंराए याड़ाक
तयार जैद नराएके।

३२ छुत जातलावरालाई
आवए ओक्याँनी ज़
नयेन सतैंद नराएरिज़्या।

सोनो नमीं इस्त्राएलीरालाई ब
आवए ओक्याँनी ज़
याइज्यात नैद नराएरिज़्या।”

३३ येसुए ओबाबु ओआमानी
सिमियोनए ओपाँ भरी थैद बनै ज़
अचम्ब ताकिनी। ३४ नकिन सिमियोनए
नोरालाई असिक याद ओआमा
मरियमलाई, “इस्त्राएलीराए याखार्ल
आव भाउज़ाए ओपाँत कुधुए यायुँ
तोल्रिज़्या, कुधुए यायुँ थ०रिरिज़्या।
परमेस्वरए आव भाउज़ालाई ओल
ओसरेस मिताव जैद नैव। नोलाई
कुधुए यामाभैःज्यावए, ३५ यायुँलाव
पाँ भरी ननी ज़ रैःरिज़्या। नयुँलाई
पाला तरवालीए आनी हुनी सफेर्सिउ
मिताव जैदीरिज़्याव,” है दोक्यो।

हन्नाए ओपाँ

३६ हो बेलाक ज़ ध्यान फ़िमल
आसेरए ओथोलाव फनुएलए ओज़ा
बनै जूचासो तोबो हन्ना यादोज्याव
मनी उलिज़्याव। नो ब अगमबादिनी
ज़ ओल्यो। नोए रे ओदोव सात

बर्सत ज़ ओरे सिद, ३७ चौरासी बर्स
पै बिनु रे ज़ ध्यान फ़िमल लिद
उपासिद लाकनी रील परमेस्वरलाई
पोंखारिउ ज़ ओनैज्याव। ३८ नोए ब
येसुलाई उरँःव प्राइँना परमेस्वरलाई
धन्याबाद चरैःद यरूसलेम सहरलाव
‘गेलाई बाँचैज्याव हुरिज़्या’ लिद
कींद नैज्यावरालाई येसुए उजूनी हो
छचामकिन सथैव ज़ यानैक्यो।

३९ योसेफ सोनो मरियमनी
परमेस्वरए ओकानुनलाव ध्यान
फ़िमलाव यायेन भरी ओखेमोत
निफ़िम गालीललाव नासरतदा
निज़ा लाँद बाकिनी। ४० नो भाउज़ा
घ्योःनाद ओर्सा ब ज़्यास्नाके, उबुद्धी
ब छिप्नाके। परमेस्वरए ओअसिक ब
ओक्याँत ज़ उलिज़्याव।

येसु बाह बर्स ओताव

४१ येसुए ओबाबु ओआमानी
यरूसलेमलाव निस्तार पर्व मानिन्याए
जूनी सालकाव तखेप निबाज्याव।
४२ तछा येसु बाह बर्स ओतावत
सालकाव याबाज्याव मिताव ज़
फरी ब बाकेर। ४३ नो पर्व भरी
ओखेमोत याफ़िमदा याबाज्याक
येसु यरूसलेमल ज़ उरहिउ ओल्यो।

ओबाबु ओआमानी मासैकिनी।
 ४४ नोनी 'गेनैरास हुज्याखेहो' लिद
 तछाकाव येम भरी ज़ बाकिनी।
 छींनी यानैराए ल्यो जीदा सापुद,
 ४५ निमादैक ते सापे सापे यरूसलेमदा
 ज़ ओल्द बाकिनी। ४६ सोलात ध्यान
 फ़िमल घेप्पा घेप्पा धर्मगुरुराए
 खार्ल चुसिद यापाँ थैद ओअर्थ
 ल्यो पाँ तीद पलासो ओरापरीज्याव
 रँ:किनी। ४७ नलाव थैज्याव भरी
 येसुए उबुद्धीसकाव ओपाँर थैद
 प्राइँ ज़ अचम्ब ताकेर। ४८ ओबाबु
 ओआमानी ब निताव रँ:द अचम्ब ताद
 ओआमाए, “काराव डाज़ा आ: दुख
 नयासिनो? गिन नँलाई सापुद गिन्च्या
 सिके,” है ओदोक ते, ४९ येसुए, “जिन
 काराव डालाई जिन्सापुनाज्याव?
 डा डाबाबुए उफ़िमल ल्यो परिए
 लिन्या जिन्मासैए रो?” है निदोक्यो।
 ५० नोनी है उनिदोव पाँए ओअर्थ
 मातीधुकिनी।

५१ येसु ओबाबु ओआमानिस
 नासरतल बाद नोनी निपाँल ज़ लिके।
 ओआमाए आव पाँ भरी उयुँल खामिउ
 ज़ नैक्यो। ५२ येसुए ओर्सा ब छिप्नाके,
 उबुद्धी ब फ़न ज़ पुलुस्नाके।
 परमेस्वरए सोनो मिँराए बनै चाव ज़
 रँ:केर।

रील सछैँज्याव यूहन्ना

(मत्ती ३:१-१२; मर्कुस १:१-८;

यूहन्ना १:१६-२८)

३ माहाराजा तिबेरिअसए राज्या
 ओदोव पन्ध्र बर्स ओतावत
 पन्तियस पिलातस यहूदियालाव
 हाकिम उलिज्याव। नो बेलाक
 हेरोद गालील खन्दलाव राजा
 उलिज्याव। ओभाइ फिलिप ईतुरिया
 सोनो त्राखोनितिस खन्दलाव
 राजा उलिज्याव, फरी लुसानियास
 अबिलेने खन्दलाव राजा उलिज्याव।
 २ हन्नास सोनो कैयाफानी फरी ध्यान
 फ़िमलाव पुजारीराए याघेप्पानी
 निलिज्याव।

नो बेलाक ज़ परमेस्वरए ओपाँ
 जकरियाए ओज़ा यूहन्नाए ओक्याँत
 हुके। नो मिँ बनल उलिज्याव।
 ३ हो बेलाकिन ज़ नोए मिँरालाई,
 “जेपापलाई रास्ट, जेयुँ परमेस्वरए
 ल्योदा फकैँद रील सछैँसिचिके।
 हो ताकिन ची जेपापर क्याल्सिद
 परमेस्वरस खैवर तान्या जेले,” है
 लिद सथैए सथैए यर्दन भै याक प्राइँदा
 ज़ हुके। ४ किताव यसैया अगमबक्ताए
 ओसरो, हो मिताव ज़ ताके। होए
 ओसरो आव ज़,

“बनल तोबोए ओर्गा अइ लिद
यासथैरिज़्याव,

‘हुरिज़्याव प्रभुए ओयेम बनैद
गाँत्या गुँतीलाई सदाँचिके।

५ भें:वर तै:द घैराल सब्याल्चिके,
गाँत्या गुँतीलाई सदाँद
काँ काँ कुँ कुँर सरिप्चिके।

६ हा:किन मिँ भरिए
परमेस्वरनी बाँचैना हुवलाई
रें:न्या जेले।’ ”

७ हो मिताव ज़ यूहन्नाए ल्योक
रील सछैँसिना हुव माहोल्यारालाई,
“ए घुलए ओथोर, जे परमेस्वरए
उरिसनी धों:न्या सुए है ओदाचिउ?
८ जे साचो ज़ परमेस्वरए ल्योदा जेयुँ
फकैँन्या ल्यो ताकिन साचो हो मिताव
येन ब दाव ताके। जे फरी, ‘गेपुर्खा
अब्राहामनी ज़ परमेस्वरए ओज़ार
ताद गेले’ है जेमालिदी ब ताए। डा
साचो है डादाचिज़्या, परमेस्वरए सीर
लुँरानी तादी ब अब्राहामए ओथोर
याजैधुव। ९ किताव तोबो मिँए चाव
सै माभा:ज़्याव सीर धलैद में:ल
ओराख्याज़्याव, हिताव ज़ परमेस्वरए
ब धलैन्याए जूँनी ओरोवा सीए
ओजराक भा:द नैव।”

१० हा:त ज़ नो माहोल्याराए, “हिताव
ताकिन ते गे कै लिन्या ओताव?”

है यादोक ते, ११ यूहन्नाए, “जे जोस
नेब्लो क्वा उलिकिन माल्योलाई
तोबो ओयोोक, सोनो ज़्याव उलिकिन
माल्योलाई ब ओयोोक,” है यादोक्यो।

१२ सिर्मा स्यो:ज़्यावर मनी सछैँसिना
हुद, “गुर्बा, गे कै लिन्या?” है यादोक
ते, १३ यूहन्नाए, “जेलाई खा स्यो:न्या
है दाद नैचिर, हा:ज़ स्यो:च्यो,
आगल्या ताराहाइच्यो,” है यादोक्यो।

१४ फरी सिपाईराए पाला, “गे कै
लिन्या?” है यादोक ते, यूहन्नाए, “जे
कोभालाई सचे:द धुत खत लैद हाइद
ताराज्युच्यो। जेतलब खा लिज़्या
हा:त ज़ लिच्यो,” है यादोक्यो।

१५ हा: बेलाक प्राइँ मिँराए यूहन्नाए
ओपाँ थैद, “आव ते आस दाद कींद
गेनैज़्याव ख्रीस ची सा,” है लिकेर।

१६ यूहन्नाए नो यापाँ थैद, “डा जेलाई
रील सछैँज़्याव वाज़ ची। डा डाछींनी
डाकिन ओसक्ती ल्यो तोबो हुरिज़्या।
डा होए ओपोलाए ओचें पला:न्या
स्यासो ब डामाले। होए परमेस्वरए छैँव
उपुरूस सोनो में:नी सछैँचिरिज़्याव।

१७ होए गेदा भरी नाडलील च्यापद चाव
भरी धन्सारल भा:द पुल भरिलाई
खर्क ज़ माजिप्तिन्या में:ल मुन्या ले।”

१८ इताव अर्थर कुधु ज़ भा:द
यूहन्नाए मिँरालाई परमेस्वरए ओपाँ

यासथैक्यो। १९हाः बेलाक राजा हेरोदए, ओभाइए ओज्या हेरोदियास-लाई रैद ओनैज्याव। यूहन्नाए, “नभाइए ओज्या नँ रैन्या माताए। नँ प्राईल ज्ञ माचाव येन नदोज्या,” है ओदोवए, २०यूहन्नालाई भ्याल-खानाल भाःक्यो। है जैद हेरोदलाई पापए तर्त पाप चाःसिके।

येसु रील ओसछैसिउ

(मत्ती ३:१३-१७; मार्कस १:९-११)

२१यूहन्ना भ्यालखानाल ओमाबाद मिं भरी प्राई यूहन्नानी यासछैसिज्याक येसु पाला सछैसिके। येसु रील सछैसिद ओपोंखारिज्याक नम फैसिद, २२परमेस्वरए छैव उपुरूस कुइतम मिताव भुहुंद येसुए ओक्यांत चुसिके। हाःत ज्ञ नमतिन तोबो गा अइ लिद हुके, “नँ डायुंलाव डाजा ज्ञ। नँलाई रँःद डायुं होलां ताज्या।”

येसुए ओसाखा पुर्खार

(मत्ती १:१-१७)

२३येसु ओयेनत उथूसिज्याक तीस बर्सवाकाव ओल्यो। नोलाई मिंराए योसेफए ओज्जाल यागनिज्याव।

योसेफए ओबाबु एली,

२४एलीए ओबाबु मत्तात,

मत्तातए ओबाबु लेबी,
लेबीए ओबाबु मल्की,
मल्कीए ओबाबु यान्ना,
यान्नाए ओबाबु योसेफ,
२५योसेफए ओबाबु मत्ताथियास,
मत्ताथियासए ओबाबु आमोस,
आमोसए ओबाबु नहूम,
नहूमए ओबाबु इसली,
इसलीए ओबाबु नगौ,
२६नगौए ओबाबु माथ,
माथए ओबाबु मत्ताथियास,
मत्ताथियासए ओबाबु सेमैन,
सेमैनए ओबाबु योसेख,
योसेखए ओबाबु योदा,
२७योदाए ओबाबु योआनन,
योआननए ओबाबु रेसा,
रेसाए ओबाबु यरूबाबेल,
यरूबाबेलए ओबाबु सालतिएल,
सालतिएलए ओबाबु नेरी,
२८नेरीए ओबाबु मल्की,
मल्कीए ओबाबु अद्दी,
अद्दीए ओबाबु कोसाम,
कोसामए ओबाबु एलमादम,
एलमादमए ओबाबु एर,
२९एरए ओबाबु यहोसू,
यहोसूए ओबाबु एलीएजर,
एलीएजरए ओबाबु योरीम,
योरीमए ओबाबु मत्तात,

मत्तातए ओबाबु लेबी,
 ३० लेबीए ओबाबु सिमियोन,
 सिमियोनए ओबाबु यहूदा,
 यहूदाए ओबाबु योसेफ,
 योसेफए ओबाबु योनान,
 योनानए ओबाबु एल्याकीम,
 ३१ एल्याकीमए ओबाबु मलेआ,
 मलेआए ओबाबु मिन्ना,
 मिन्नाए ओबाबु मत्ताथा,
 मत्ताथाए ओबाबु नातान,
 नातानए ओबाबु दाऊद,
 ३२ दाऊदए ओबाबु यिसै,
 यिसैए ओबाबु ओबेद,
 ओबेदए ओबाबु बोअज,
 बोअजए ओबाबु सल्मोन,
 सल्मोनए ओबाबु नहसोन,
 ३३ नहसोनए ओबाबु अम्मीनादाब,
 अम्मीनादाबए ओबाबु आराम,
 आरामए ओबाबु हेस्रोन,
 हेस्रोनए ओबाबु फारेस,
 फारेसए ओबाबु यहूदा,
 ३४ यहूदाए ओबाबु याकूब,
 याकूबए ओबाबु इसहाक,
 इसहाकए ओबाबु अब्राहाम,
 अब्राहामए ओबाबु तेरह,
 तेरहए ओबाबु नाहोर,
 ३५ नाहोरए ओबाबु सरूग,
 सरूगए ओबाबु रऊ,
 रऊए ओबाबु पेलेग,
 पेलेगए ओबाबु एबेर,

एबेरए ओबाबु सेलह,
 ३६ सेलहए ओबाबु केनान,
 केनानए ओबाबु अर्पसद,
 अर्पसदए ओबाबु सेम,
 सेमए ओबाबु नोआ,
 नोआए ओबाबु लेमेख,
 ३७ लेमेखए ओबाबु मतूसेलह,
 मतूसेलहए ओबाबु हनोक,
 हनोकए ओबाबु येरेद,
 येरेदए ओबाबु महलालेल,
 महलालेलए ओबाबु केनान,
 ३८ केनानए ओबाबु एनोस,
 एनोसए ओबाबु सेत,
 सेतए ओबाबु आदम,
 आदम फरी परमेस्वरनिकाव
 ओल्यो।

सैतानए येसुलाई ओजाँचिउ

(मत्ती ४:१-११; मर्कूस १:१२-१३)

४ येसु यर्दन भैल ओसछैँसिउत
 छैँव पुरूसए ब्याल्द ननी
 पुलुस्द ओबाज़्याक नो पुरूसए तोबो
 साइँसुइँव पोड लाँक्यो। २नल चालीस
 दिन भरी सैतानए येसुलाई भुकैँन्याए
 जूँनी जाँचिउ ज़ नैक्यो। ना: भरिल
 येसु काता ज़ माज़्याद लिके। चालीस
 दिन ओतावत ओकरेए माधुनाक्यो।
 ३हा:त ज़ सैतान ओल्योक हुद,
 “नँ साचो ज़ परमेस्वरए ओज़ा
 ताकिन आव लुँलाई भरेस जैके,”



है ओदोक ते, ४येसुए, “धर्मसास्त्रल अइ लिद सर्सिउ लिज़्या, ‘मिँलाई ज़्यावए वाज़ माडाव,’ ” है दोक्यो। ५नकिन सैतानए तोबो भेंःव पोत लाँद संसारलाव राज्या भरी तोचोइत ज़ सतैदचाद, ६“नो नरँःज्याव राज्या भरी ज़गै मगैवस नमीं ज़ जैद डाईरिज़्या। आव भरी डाकुइत ज़ लिज़्या, जोलाई डा याव डापैँज्या होलाई ज़ डाएधुइ। ७है जैद नँ डाड़ाक फुलुप्सिद धो नदाँकिन नो भरी नमींर ज़ तान्या लेर,” है दोक्यो। ८नाःत ज़ फरी येसुए, “धर्मसास्त्रल अइ लिद सर्सिउ लिज़्या, ‘नप्रभु परमेस्वरए ओड़ाक फुलुप्सिद होए ओसेवा वाज़ दान्या ताए,’ ” है दोक्यो। ९सैतानए फरी येसुलाई यरूसलेमल लाँद ध्यान फ़िमए उतुपात बैद, “नँ साचो ज़ परमेस्वरए ओज़ा ताकिन आतिनी मेल ज़ोःनिके। १०धर्मसास्त्रल अइ लिद सर्सिउ लिज़्या,

‘नँलाई बाँचैन्याए जूँनी

परमेस्वरए ओचाकज्यार

परीदींरिज़्याव।

११ नोराए नँलाई छींद नखँ लुँत

बजारिउ यान्या मालेर,’ ”

है ओदोक ते, १२येसुए, “धर्मसास्त्रल आव ब सर्सिउ लिज़्या, ‘नप्रभु

परमेस्वरलाई जाँचिन्या माताए,’ ” है दोक्यो। १३सैतानए येसुलाई प्राईनी ज़ जाँचिद छुत मौका ओमादैवा पै रास्द ख्यानैक्यो।

येसु परमेस्वरए ओपाँ सथैन्यात उथूसिउ

(मत्ती ४:१२-१७; मर्कूस १:१४-१५)


१४हाःत ज़ येसु छैँव पुरूसए ओसक्ती दैद गालीलदा ज़ ओल्द बाके। हाःकिन येसुए ओयेन नयाल प्राईंदा ज़ थास्नाके। १५धर्मसास्त्र फ़िम फ़िमक बाद परमेस्वरए ओपाँ ब प्राईंलाई ज़ यासथैक्यो। नो पाँ थैद प्राईंए ज़ येसुए उमिन सघ्योःदिकेर।

येसुलाई ओनाखारनी यापलेःव

(मत्ती १३:५३-५८; मर्कूस ६:१-६)

१६नकिन येसु ओल ओघ्योःव नाखार नासरतल ज़ हुके। एकतारःकाव ओदोःज्याव मिताव ज़ नासिन्या छ्याम धर्मसास्त्र फ़िमल बाद परमेस्वरए ओपाँ प्ररिन्याए जूँनी च्याँःसिके। १७नलावराए यसैया अगमबक्ताए ओसरो पोस्तोको एकेर। येसुए नो पोस्तोको फैद नल ओल उजूँनी सर्सिउलाई पलेःक्यो। नलाव सर्सिउ आव ज़,





(४:१७-२०)

१८ “परमेस्वर ए उपरूस डाक्याँत
लिङ्या।

गरीबरालाई चाव था सथैन्या
डालाई खतैद नैनाव।

कैतल लिङ्यावरालाई
पुलुसुन्या येम आव ज़ लिद
सथैन्याए जूनी,

मारैःङ्यावरालाई यामी
फैदयान्याए जूनी,

दुखल लिङ्यावरालाई
रासुन्याए जूनी,

१९ सोनो परमेस्वर ए ओल उमीरालाई
ओराबाँचैरिङ्याव था
सथैन्याए जूनी परींद नैनाव।”

२० हाःत ज़ येसुए नो पोस्तोकोलाई
बन जैद नो याङ्यावलाई सोवोल्दचाद
चुसिके। नलाव दुप्सिद लिङ्याव

भरिराए यामी येसुए ओक्याँत ज़
उलिङ्याक, २१ येसुए नोरालाई,
“आछिमकाव परिद डायाचिउ धर्म-
सास्त्रलाव पाँ जेथैङ्याक ज़ योके,”
है यादोक्यो।

२२ नलाव लिङ्याव भरिए येसुए
ओपाँ बनै चाव थःरैद अचम्ब
ताद, “काता आव योसेफए ओज़ा
माःक रो?” है लिद जाँ मापतिकेर।

२३ है जैद येसुए नोरालाई, “जे
डालाई प्राईए याभाःङ्याव घर्ती
स्यासो जेजैनाङ्याखेहो। नो घर्ती
आव ज़ — ‘ए सगराँङ्याव, ड़ादा
नक्याँलाई नसगराँधुङ्याव सतैके।’
जे कफर्नहुमल डादोव जेथैव मित्ताव

‘आव ननाखारल ब दोके,’ है
जेदाँङ्याखेहो। २४ है जैद डा जेलाई
साचो है डादाचिङ्या, अगमबत्कालाई
ओल ओनाखारलावराए खर्क ज़
ओमान नैद माएर। २५ जे आव ब

चेतैच्यो, एलियाए ओपालाक ब
सोरिम छ मैना पै नम मावाद बनै
घ्योःव अनिकाल उलिङ्याक ओल
उलिङ्याव इस्राएल देसल राँदी
मेंमार कुधु ज़ याल्यो। २६ हितावत

ब परमेस्वर ए एलियालाई नोराए
ल्योक मापरींद भन सीदोन खन्दलाव
सारपत नाखारलाव राँदी मेंमाए

ल्योक वाज़ परीक्यो। २७ फरी एलीसा अगमबक्ताए ओपालाक ब इस्राएल देसल कुरीर बनै ज़ याल्यो। हितावत ब नोरालाई सुलाई ज़ मासगराँद भन सिरिया देसलाव नामानलाई वाज़ सगराँक्यो,” है यादोक्यो।

२८ नो धर्मसास्त्र फ़िमलाव मिँराए येसुए ओपाँर थैद बनै ज़ रसिद, २९ थर च्याँसिद नोलाई नाखारनी पलेद यानाखारलाव दाँदातिन हाँदा ख्याव पैकेर। ३० खाली येसु नोराए खार्नी सिउसिद बाके।

येसुए माचाव पुरूसलाई ओपलेव

(मर्कूस १:२१-२८)

३१ छीनी येसु फरी गालीललाव कफर्नहुम सहरल भरिद नासिन्या छचाम मिँरालाई परमेस्वरए ओपाँ ओरासथैज़्याव। ३२ नलावर येसुए ओपाँ थैद अचम्ब ताकेर, काराव ल्यो ताकिन होए बनै हकस ओरापैज़्याव।

३३ नो बेलाक ज़ दुप्सिद यालिज़्याव धर्मसास्त्र फ़िमल बो-लैज़्याव पुरूसए क्योद ओनैज़्याव तोबो मिँ उलिज़्याव। नो पुरूस बनै चोइस क्रिद, ३४ “अ नासरतलाव येसु, गेस नखै काता उलिज़्याव? गेलाई खेम्ना नहुव रो? डा नँलाई डासरेस्निज़्या।

नँ परमेस्वरए छैव उमीं ज़,” है लिके। ३५ हात ज़ येसुए नोलाई हप्कैद, “भ्याउँ तालिनी, आवए ओक्याँतिन पुलुस्द बान्के,” है ओदोव प्राइँना ज़ नो माचाव पुरूसए नो मिँलाई याखार्ल पछारिद कैज़ माजैद पुलुस्द बाके।

३६ निताव रँद नलावर अचम्ब ताद या याल, “आवए ओपाँ किताव ओताव? ना: ओसक्ती ल्यो, ना: ओहक ल्यो। माचाव पुरूसरालाई ओराहप्कैक मनी ओपाँर यादोज़्याव ची ओल्यो,” है लिकेर।

३७ हा:किन येसुए ओदोव येन भरी नजीलाव पो पोड प्राइँदा ज़ थास्नाके।

येसुए सिमोनए उमुइँज्युलाई ओसगराँव

(मत्ती ८:१४-१५; मर्कूस १:२९-३१)

३८ नकिन येसु नो धर्मसास्त्र फ़िमनी पुलुस्द सिमोनए उफ़िमक बाके। नल सिमोनए उमुइँज्यु ओजोरो हुद घ्याँसिद उलिज़्याव। नलावराए नो ओजोरो हुवए उजूनी येसुलाई है दोकेर। ३९ है जैद येसु नो ओजोरो हुज़्यावए ल्योक बाद नो जोरोलाई उसिडारो प्राइँना ज़ जोरोए रास्द नो मेंमा सोद नोरालाई ज़्यावर जैद याएक्यो।

येसुए याजोरो हुवरालाई ओरासगराँव

(मत्ती ८:१६-१७; मर्कूस १:३२-३४)

४० निमी ओफेरनाव बेलाक नजीलाव याजोरो हुज्याव भरी येसुए ओल्योक यारारैकेर। येसुए नोरालाई उकुइए छाप्द प्राइँलाई ज़ यासगराँक्यो। ४१ कुधु मिंराए याक्याँतिन माचाव पुरूसर ब चिर चिर क्रिद, 'नँ परमेस्वरए ओज़ा ज़' लिद पुलुस्द बाकेर। नोराए येसुलाई 'ख्रीस ज़' लिद यासरेसोए येसुए नोरालाई हप्कैद पाँव ज़ ओमाराएज्याव।

येसुए परमेस्वरए ओपाँ ओरासथैव

(मर्कूस १:३५-३६)

४२ हो परा:ती नम उसँवत येसु तोबो साइँसुइँव पोक बाके। माहोल्याराए येसुलाई खिम्द दैद यास नैन्याए जूँनी छुतदा बान्या वैव पैकेर। ४३ येसुए फरी नोरालाई, "डा परमेस्वरए ओराज्यालाव पाँ छुत नाखार नाखार, सहर सहरल ब सथैव ज़ परिके। नोए उजूँनी ज़ परमेस्वरए उपरींनाव," है यादोक्यो।

४४ है जैद येसुए यहूदिया खन्द भरिलाव धर्मसास्त्र फ़िम फ़िमक परमेस्वरए ओपाँ यासथैनाक्यो।

ल्यो माल्यो डाँ:र

(मत्ती ४:१८-२२; मर्कूस १:१६-२०)

५ तछा गनेसरेत दहँ छचोक च्याँ:सिद येसुए परमेस्वरए ओपाँ ओरासथैज्याक माहोल्यार येसुए ओपाँ थैन्याए जूँनी बनै याछुइसिहुज्याव। २ हो बेलाक दह छचोक नेब्लो दोङ्गानी निरँ:क्यो। नो दोङ्गा चलैज्यावर डाँ: क्यो:ज्यावर याल्यो। नोर दोङ्गानी हाइसिद याजालर याछेज्याव। ३ येसु सिमोनए ओदोङ्गाल पसिद रील जाँ होकसै लाँव परींद ननी ज़ परमेस्वरए ओपाँ माहोल्यारालाई यासथैक्यो।

४ ओपाँ ओखेमोत सिमोनलाई, "नदोङ्गा उर्जी ल्योदा लाँद डाँ:र यान्न्याए जूँनी नजाल ख्याके," है ओदोक ते, ५ सिमोनए, "तुबुरी ज़ धामा दाद गेनाल क्याके गुर्बा, तोबो डाँ: ज़ गोमादैए। हैदी ब नँ है नलिकिन नँ नपाँनी ज़ डाख्या," है दाद, ६ ओजाल ख्याक्यो। ओख्याव प्राइँना ज़ डाँ:र बनै कुधु परिद जाल ज़ चीवा चीवा जैकेर। ७ है जैद ओलापकाव छुत दोङ्गात लिज्याव यानैरालाई 'सघैहुसिचिके' लिद सान दाद यारायो प्राइँना ज़ नोर हुकेर। नो नेब्लो दोङ्गाल

डाँःर ब्याल्द दोङ्गानी ब गदिवा गदिवा ताकिनी।

८ है जैद सिमोन पत्रुसए नो रँःद येसुए उखँत फुलुप्सिद, “अ प्रभु, डा इताव पापी नडाक लिन्या स्यासो डामाले। नँ डानी बाव ताके,” है दोक्यो। ९ डाँःर बनै ल्यो माल्यो यापरिउए सिमोन ओनैरास अचम्ब ताद यालिङ्याव। १० हो बेलाक सिमोनस येन दोङ्यावनी जब्दियाए ओङ्गानी याकूब स्रोतो यूहन्नानी निल्यो। नोनी ब अचम्ब ताकिनी। हाःत ज़ येसुए सिमोनलाई, “ताछे-नी, अबकिन नँलाई डाँःर माःक, मिँर खिम्न्या डाजैनिरिङ्या,” है दोक्यो। ११ है जैद नोर यादोङ्गार पाखाक यारारैव प्राइँना ज़ यादोङ्गार याजालर रास्द येसुस बाकेर।

येसुए कुरीलाई ओसगराँव

(मत्ती ८:१-४; मर्कूस १:४०-४५)

१२ तछा येसु नजीलाव तोबो नाखारल उलिङ्याक तोबो कुरीए येसुलाई रँःद ओडाक फुलुप्सिद, “अ प्रभु, डाल्योदा नयुँ ओताकिन डालाई सगराँन्या नले,” है लिद बिन्ती ओदोव प्राइँना ज़, १३ येसुए नोलाई उकुइए छाप्द, “नल्योदा डायुँ

लिङ्या ज़, गराँनिके,” है ओदोव प्राइँना ज़ नो कुरीए ओबेथा चक चक ज़ माके। १४ येसुए फरी नोलाई, “आव नक्याँताव डादोव येन सुलाई ज़ है तारादोयो। बुरू नगराँव साचो ज़ ओल्यो लिन्या थःरैव परीन्याए जूँनी पुजारीए ल्योक सतैसिनाद मोसाए ओकानुनलाव मिताव चरैःन्यार चरैःनाके,” है दोक्यो।

१५ हितावत ब येसुए ओबयेन भन ज़ तादा तादाड थास्नाके। है जैद ओपाँ थैन्याए जूँनी स्रोतो याजोरो हुवर सगराँसिन्याए जूँनी मिँर ल्यो माल्यो याहुङ्याव। १६ ओल कैताक याल्योनी अलगज़ा हाइसिद साइँसुइँवक बाद ओपोँखारिनाङ्याव।

येसुए उखँ उकुइ सिउलाई ओसगराँव

(मत्ती ९:१-८; मर्कूस २:१-१२)

१७ तछा येसुए परमेस्वरए ओपाँ ओरासथैङ्याक फरिसीर स्रोतो कानुनलाव यागुर्बार नल चुसिद यालिङ्याव। नोर ख्वार गालील स्रोतो यहूदिया खन्दलाव नाखार नाखारनी हुवर यालिङ्याव, ख्वार यरूसलेमनी हुवर यालिङ्याव। हो बेलाक परमेस्वरए सगराँन्या

ओसक्ती येसुए ओक्याँत उलिङ्ग्याव। १८फरी नो बेलोक ज़ तोबो उखँ उकुइ सिउलाई भेलोङ्गाल भाःद येसुए ल्योक यारैङ्ग्याव। १९खाली मिँर बनै माहोल्या यातावए येसुए ल्योक बान्या येम मादैद नोर थालात बाद फ़िम कप्सिउ फ़ल्यार जाँवा हाइद सघ्वाँःद नो उखँ उकुइ सिउलाई ओभेलोङ्गारास येसुए ओङ्गाक भरैदिकेर। २०येसुए नोराए यारुँ उहुबो रँःद नो उखँ उकुइ सिउलाई, “अ कान्छा, नपाप क्याल्सिके,” है दोक्यो।

२१नो थैद नलाव हुव सास्त्रीर स्नो नो फरिसीराए या याल रूम्रूमैद, “आव मिँए कै जैद परमेस्वरए उमिन ओबलेङ्ग्याव? मिँए ओपाप क्याल्न्या ते परमेस्वरकिन सु ची उलिङ्ग्यावदा?” है लिकेर। २२येसुए नोराए यारुँलाव पाँ सैद, “जे काराव जेरुँल नै जेलिङ्ग्याव? २३नो मिँलाई ‘नपाप क्याल्सिके’ है दान्या सैं ‘सोद बान्के’ है दान्या काताकाव सजालो उलिङ्ग्याव? २४अब डा मिँ मिन्सिद हुवए आव मानुवात पाप क्याल्न्या डाकुइत उलिङ्ग्याव सैं ओमालिङ्ग्याव चिऊचिके,” है दाद नो उखँ उकुइ सिउलाई, “डा नँलाई है डादीङ्ग्या, सोद नभेलोङ्गार घुर्द नभिमदा बान्के,” २५है ओदोव प्राइँना ज़

नो उखँ उकुइ सिउ याङ्गाकिन ज़ सोद ओभेलोङ्गार घुर्द परमेस्वरए उमिनर सघ्योःदद्याद रेंए रेंए उभिमदा बाके। २६नो रँःव भरी बनै अचम्ब ताद छेःद, “आछिम काता गेरँःव इताव?” लिद परमेस्वरलाई बनै घ्योःव ज़ थःरैकेर।

येसुए लेबीलाई उसिस ओजैव

(मत्ती ९ः९-१३; मार्कस २ः१३-१७)

२७येसु ननी पुलुस्द ओबाङ्ग्याक तोबो सिर्मा स्योःङ्ग्याव लेबी यादोङ्ग्यावलाई सिर्मा स्योःन्या अद्दाक चुसिद उलिङ्ग्याव रँःक्यो। येसुए नोलाई, “डास हुन्के,” है ओदोव प्राइँना ज़, २८नो च्याँःसिद ओयेन भरी रास्द येसुए उछीँत बाके।

२९नकिन लेबीए येसुलाई उभिमक लाँद बनै घ्योःव भत्यार जैक्यो। नो भत्यारल लेबीए ओनैर स्नो नो सिर्मा स्योःङ्ग्यावर ब कुधु ज़ याल्यो। ३०फरिसीर स्नो नो यासकाव सास्त्रीराए नोरालाई येसुस सिप याङ्ग्युङ्ग्याव रँःद येसुए उसिसरालाई, “जे कै जैद निताव सिर्मा स्योःङ्ग्यावर स्नो नो पापीरास सिप जेङ्ग्युङ्ग्याव?” है लिद गन गन यारादोकेर। ३१नो है यारादोङ्ग्याव येसुए थैद, “याजोरो माहुङ्ग्याव-रालाई सगराँन्या मिँ माचाहिए, याजोरो हुङ्ग्यावरालाई वाज़ चाहिङ्ग्या। ३२हो मिताव ज़ डा मनी ‘गे धर्मीर’

है लिज़्यावरालाई परमेस्वरए ल्योदा बान्या डाराखुल्हुव माःक, 'गे पापीर' है लिज़्यावरालाई डाराखुल्हुव ची," है यादोक्यो।

उपासिन्या

(मत्ती ६:१४-१७; मर्कूस २:१८-२२)

३३ रूवा रूवा मिंराए येसुलाई, "रील सछैज़्याव यूहन्नाए उसिसर सोनो फरिसीराए यासिसर एकतार ज़ उपासिद पोंखारिज़्यार। नँ नसिसर ते माउपासिद ज़्याद ओद लिज़्यार," है यादोक ते, ३४ येसुए, "जन्तीर ब्याहोल्यास यालेवा पै कै जैद याउपासिज़्याव? ३५ खाली जो छचामकिन ब्याहोल्यालाई छुतैर, हो छचामकिन वाज़ उपासिन्या लेर," है यादोक्यो।

३६ फरी घर्ती तोबो भाःद याएक्यो, "ओरे छिबो क्वालाई तालिन्याए जूनी सुए ज़ साःरो क्वा चीद मातालिउ, म्नी साःरो क्वा ब बलेस्ज़्या, पुराँदोत साःरो तालिसिउ ब माखैए।

३७ "हो मिताव ज़ पुराँदो पिर्गुलल साःरो दाखमदच सुए ज़ माभाःर, म्नी उस०ए पिर्गुललाई सुफुद दाखमदच ब भोन्या ले, पिर्गुल ब खेर बान्या ले। ३८ है जैद साःरो दाखमदच

साःरो पिर्गुलल वाज़ भाःर। ३६ पुराँदो दाखमदच ओद बानी परिउए 'आव ची डमो लिज़्या' लिद साःरो दाखमदच ओव माभैःए।"

येसु न्नासिन्या छचामकिन घेप्पा ज़

(मत्ती १२:१-८; मर्कूस २:२३-२८)

६ न्नासिन्या छचाम येसु उसिसरास एँः खालाव घ्याँ याबाज़्याक उसिसराए बाला फ्याःद जुद याकै-ज़्याव २ फरिसीराए रँःद येसुलाई, "न्नासिन्या छचाम मादान्या येन काराव जेदोज़्याव?" है यादोक ते, ३ येसुए, "धर्मसास्त्रलाव सर्सिउ दाऊद राजा ओनैरास याकरेकाव यादोव येन जेमापरिए रो? ४ दाऊद ध्यान फ़िमल पसिद परमेस्वरलाई चरैःसिउ भरेस हाइद ओल मनी ज्युक्यो, ओनैरालाई मनी याएक्यो। नो भरेस पुजारीराए वाज़ ज़्यान्या ओताज़्याव।" ५ नकिन येसुए फरी, "डा मिँ मिन्सिद हुव न्नासिन्या छचामकिन ब घेप्पा ज़ डालिज़्या," है यादोक्यो।

येसुए उकुइ थँवलाई ओसगराँव

(मत्ती १२:६-१४; मर्कूस ३:१-६)

६ फरी हुकिनकाव न्नासिन्या छचाम येसुए धर्मसास्त्र फ़िमल परमेस्वरए

ओपाँ ओरासथैज़्याक नल तोबो वोर्फताव उकुइ थँव मिँ ब उलिज़्याव। ७हो बेलाक सास्त्रीर सोनो फरिसीराए येसुए ओपाहा भाःदयान्याए जूनी नासिन्या छचाम सगराँन्या येन मादोज़्याव ब्याँ लिद चिऊद यानैज़्याव। ८येसुए नोराए यायुँलाव यापाँ सैद भन नो उकुइ थँवलाई, “आक हुद च्याँःसिन्के,” है ओदोक ते, नो प्राइँए याड़ाक च्याँःसिके। ९येसुए नो सास्त्रीरालाई, “दे, डालाई है दाँचिके, नासिन्या छचामकाव येन चाव जैन्या सैँ माचाव जैन्या? मिँलाई बाँचैन्या सैँ बलेन्या? कानुनए कै उलिज़्याव?” है दाद, १०प्राइँलाई तछयोनी चिऊद नो उकुइ थँवलाई, “नकुइ तङ्गैके,” है दोक्यो। नोए उकुइ ओतङ्गैव प्राइँना सोजोकाव ज़ ताके। ११नो सास्त्रीर सोनो फरिसीराए येसुए ओदोव येनलाई रँःद यारिस बनै चोद ‘आवलाई कै जैन्या ओताव?’ लिद सल्ला दोकेर।

येसुए बाह जना ओसाचीर

(मत्ती १०:१-४; मर्कूस ३:१३-१६)

१२हाः बेलाक तछा येसु तोबो दाँदात पोँखारिना बाके। नत परमेस्वरलाई तुबुरी पोँखारिद ज़ भाःक्यो। १३हो पराःती छकाल्न्या ओलस बारिज़्यावरालाई ओल्योदा

खुल्द, हो भरिनी बाह जनालाई छाँतिद ओसाचीर याजैक्यो। १४नोराए यामिनर आवर ज़ — ड़ादाकिनकाव उमिन सिमोन (छीनी होए उमिन पत्रुस जैदिक्यो), होए ओभाइ अन्द्रियास, नकिन याकूब, यूहन्ना, फिलिप, बारथोलोमाइ, १५मत्ती, थोमा, अल्फयसए ओज़ा याकूब, देसभक्ता है यादोज़्याव सिमोन, १६याकूबए ओज़ा यहूदा सोनो छीनी येसुलाई धोका याज़्याव यहूदा इस्करियोत।

येसुए कुधु मिँरालाई ओरासगराँव

(मत्ती ४:२३-२५)

१७नकिन नोरास दाँदातिन भरिद येसु तोबो बाँक च्याँःसिके। नक ओलस ओलस बारिज़्याव माहोल्यार ब यालिज़्याव। यहूदिया खन्दलाव मिँर, यरूसलेम सहरलाव मिँर, समुन्द्र छयोकाव तुरोस सोनो सीदोन खन्द जीदाडाव मिँर ब बनै माहोल्या यालिज़्याव। १८नोर रूवा ओपाँ थैना हुवर, रूवार याजोरोनी सगराँसिना हुवर, रूवार याक्याँताव माचाव पुरूस पलेना हुवर यालिज़्याव। १९येसुए ओक्याँताव अचम्बलाव ओसक्तीए प्राइँलाई ओरासगराँज़्यावए ओललाई छाप्न्याए जूनी नो माहोल्यार ओल्योक बनै याछुइसिहुज़्याव।

परमेस्वरनी धन्याकावर

(मत्ती ५:१-१२)

२० नकिन येसुए ओलस बारिज्यावरालाई चिऊद अइ लिद पाँके,

“धन्या, जे गरीबर,

परमेस्वरए ओराज्या जेमीं ज़।

२१ धन्या, जे आज्याल करे लिज्यावर, जेकरे सिन्या ले।

धन्या, जे आज्याल घर्ज्यावर,

रेंन्या ज़ जेले।

२२ डा मिं मिन्सिद हुवए डाजूनी जेलाई सोद, याखानी पलेद, बीज्यात जैद, जेमिन बलेद यायाचिक धन्याकावर ज़ जेताज्या। २३ हो छचाम जेरेंतए ज़ोचिके, काराव ल्यो ताकिन स्वर्गताव घ्योःव इनाम दैन्या जेले। नो जेखिरी पसिज्यावराए यासाखा पुर्खाराए ब अगमबक्ता भरिरालाई ब हैज़ याराजैकेर।”

थैए माँतकन

२४ “जे धनीरालाई थैए माँतकन, आव जेजिउत वाज़ जेयुं होलाँ ताद जेलिरिज्या।

२५ जे आज्याल द० द० सव्राँसिज्यावरालाई थैए माँतकन,

करे ज़ जेतारिज्या।

सास्द रेंद लिज्यावरालाई

थैए माँतकन,

पाँकी पाँ घन्या जेले।

२६ जे प्राइँ मिँराए यासघ्योःचिज्यावर

थैए माँतकन,

नो सघ्योःज्यावराए

यासाखा पुर्खाराए

तँनी पैज्यावरालाई ब हिताव

ज़ यारासघ्योःज्याव।”

सुतुररालाई समारिन्या

(मत्ती ५:३८-४८)

२७ “जे थैज्यावरालाई है डादाचिज्या, जेसुतुररालाई यारासमारिच्यो, जेलाई सोज्यावरालाई चाव येन दाद याराएच्यो। २८ जेलाई थलज्यावरालाई असिक याराएच्यो, जेलाई बलेव पैज्यावराए जूनी पोखारिच्यो। २९ तँनिकाव नगालात प्रोद याईकिन फरी तँनिकाव नगाला ब थाँद याएयो। नफुतु यानैनिकिन नकमेस ब सिउःद याएयो। ३० नँस निज्यावरालाई याएयो, नमीं हाइद लाँज्यावरास फरी तानियो। ३१ जे छुतए ल्योनी किताव जेपैज्या, जे ब छुतए ल्योदा हितावनी ज़ दोचिके। ३२ “जेलाई समारिज्यावरालाई वाज़ जेरासमारिकिन नो ते काता ज़

माताके। नाःवाकाव येन ते पापीराए ब दोऽयार। ३३ फरी जेलाई चाव येन दादद्याऽयावरालाई वाऽ चाव जेराजैकिन नो ब काता ज माताके। निताव ते पापीराए ब दोऽयार। ३४ सोवोल्धुन्यारालाई वाऽ जेरालोइकिन नो ब काता ज माताके। निताव ते पापीराए ब 'डालाई सोवोल्दयाँवा ज' लिद यारालोइऽयार।

३५ "है जैद जे ते जेसुतररालाई चाव येन दाद यारासमारिच्यो। रिन जेराएक 'खर्क सोवोलोके' लिद आस मादाद याराएच्यो। हो ताकिन ची माहान परमेस्वरनी घेप्पा इनाम दैन्या ताद ओऽार ब तान्या जेले। ओल ब उगुन माचेतैऽयाव पापीराए ल्योदा उयुँ यालो ज लिऽया। ३६ किताव स्वर्गताव जेबाबुए उयुँ जेल्योदा नाऽया, हिताव ज जे ब छुतए ल्योदा जेयुँ ओनाक।"

छुतलाई रास्न्या

(मत्ती ७:१-२)

३७ "जे अर्काए ओखत पले·द ताएच्यो, म्नी परमेस्वरए जे जेखत ब पले·दचान्या ले। अर्कालाई 'इताव हिताव' है दान्या ब माःक, म्नी परमेस्वरए जेलाई मनी है दान्या ले। जेउपर्त मादान्या दोऽयावलाई जेरास्किन परमेस्वरए जेलाई मनी

रास्न्या ले। ३८ है जैद जे छुतलाई जेएकिन जे मनी जेदैरिऽया। किताव गोइँनी जेगोइँऽया, जे मनी हिताव गोइँनी ज दैन्या जेले, भन हलैद छुइए छुइए ज्याल्द जेघोइँल ब भोन्या ले।"

अर्काए ओखत पले·द मायान्या

(मत्ती ७:३-५)

३९ नकिन येसुए फरी अइ लिद घर्ती-रानी यासथैक्यो — "उमी मारैःवए उमी मारैःवलाई दोरैद ओलाँकिन नोनी नेब्लो ज भल्खादाल तेन्या लिनी।

४० "फरी, उगुर्बाकिन उसिस घेप्पा माताए। प्राइँ उतीधुवत वाऽ उगुर्बा स्यासो ताऽया।

४१ "हिताव ज फरी, कै जैद ननैए उमीलाव तकेजा सीका नरैःऽयाव, नँ नमीलाव नाःल्दिउ मुँदा ताकितर नमारैःऽयाव? ४२ नमीलाव नाःल्दिउ मुँदा मारैःद कै जैद ननैलाई, 'नमीलाव सीका हाइद डाई' है नदोधुरिऽयाव? ए निताव पाँऽयाव कैफती, डादा नमीलाव मुँदा हाइकेदा, ननैए उमीलाव सीका नहाइक छर्लङ्ग रैःन्या नले।"

सीए ओसै

(मत्ती ७:१६-२०; १२:३३-३५)

४३ "चाव सीए माचाव सै माभाःव, माचाव सीए चाव सै ब माभाःव।

४४ है जैद जो मिताव सीं तादी ब ओसैनी ज़ सरेस्सिज़्या। जुसैत कोराली मासैए, कारजुत जोम्परसै ब मासैए। ४५ हो मिताव ज़ चाव मिँए उयुंनी चाव वाज़ हुज़्या, माचाव मिँए उयुंनी माचाव वाज़ हुज़्या। युँल किताव लिज़्या याःनी ब हिताव ज़ हुज़्या।”

लुँ तर्त जैसिउ फ़िम

(मत्ती ७:२४-२७)

४६ “जे डापाँ जेमादोकिन डालाई ‘प्रभु, प्रभु’ है जेमादाँदी ब ताए। ४७ जोए डाल्योदा हुद डापाँ थैद दोज़्याव, नो मिँ किताव उलिज़्याव सतैद डाय़ाचिरिज़्या। ४८ नो तोबो फ़िम जैज़्याव मिँए गज बनै पतालल लुँ तर्त ओभाःव स्यासो लिज़्या। नो फ़िम बनै पक्कास जैसिउ ओतावए घ्योःव भल उहुदी ब कैज़ माजैधुव। ४९ फरी जो मिँए डापाँ थैद ओमादोकिन नो गज माखालिद फ़िम जैज़्याव मिँ स्यासो लिज़्या। नो फ़िमलाई भल उहुक तैःद प्याःपी जैद लाँद उमिन ज़ समैदिज़्याव।”

येसुलाई उयुँ हबो कप्तान

(मत्ती ८:५-१३)

७ येसुए नो ओपाँ भरी मिँरालाई ओरासथैवत फरी कफर्नहुमदा बाके। २हाः बेलक नल तोबो रोमी

कप्तानए उयुँलाव मिताव ओनोकोर ओजोरो हुद सिउ ओपैँज़्याव। ३नो कप्तानए येसुए ओबयेन थैद ओनोकोरलाई सगराँन्याए जूँनी यहूदीराए यासैरर नेबरेँवा परींद येसुलाई किनाव यापरींक्यो। ४नोर येसुए ओल्योक बाद बिन्ती दाद, “नो कप्तानए नँ नसाएता दैन्याकाव ज़ लिज़्या। ५नोए गेजातलाव मिँराए ल्योदा उयुँ ताद गेजूँनी धर्मसास्त्र फ़िम ब जैदचासिक्यो,” है दोकेर।

६ है जैद येसु नोरास बाके। याबाज़्याक कप्तानए नोर फ़िमकिन सर्बा तादाड याहुज़्याव रँःद तोबो नेब्लो ओनैरालाई येसुए ल्योदा, “अ प्रभु, डाजूँनी आः दुख तादैयो। डा इतावए डाफ़िमक नँलाई लाँन्या स्यासो डामाले। ७ डा नडाक सतैसिन्या स्यासो ब डामाले। बुरू ननी ज़ ‘गराँनिके’ है नलिकिन डानोकोर गराँन्या ले। ८ डा ब छुतए ओहक धूँलाव मिँ ज़। डा डाधूँल मनी कुधु सिपाईर लिज़्यार। नोरालाई ‘बाचिके’ है डारादोक बाज़्यार, ‘हुचिके’ है डारादोक हुज़्यार। डानोकोरलाई ब ‘इताव दोके’ है डादोक दोज़्याव’ है दोच्यो,” है लिद यापरींक्यो। ९ येसुए कप्तानए ओरापरींवरए यापाँ थैद कप्तानस अचम्ब ताद ओलस बाज़्याव माहोल्याराए ल्योदा भाल्सिद,

“डा जेलाई है डादाचिज़्या, इस्राएली-
राए याखार्ल मनी आव मिताव
डाल्योदा उयुं हुबो सु ज़ डामादैताए,”
है यादोक्यो।

१० नकिन नो कप्तानए ओरापरींवर
ओल्द फ़िमक याबाक नो ओजोरो
हुज़्याव गरॉद उलिज़्याव रँःकेर।

येसुए सिउलाई ओजागैव

११ येसु नकिन फरी जाँवाक नाइन
यादोज़्याव नाखारदा बाके। नो बेलाक
उसिसर सोनो माहोल्यार ब ओलस
कुधु ज़ याबाज़्याव। १२ नाखार ड़ाक
याकेसोत तोबो मोरो घुर्द यालाँज़्याव
यारँःक्यो। नो सिउ छोज्या तोबो राँदी
मेंमाए ओज़ा नाः तोबो ज़ ओल्यो। नो
लाँज़्याव मलामीर सर्बा कुधु ज़ याल्यो।
१३ प्रभुए नो राँदी मेंमालाई रँःद उयुं
नाद ओल्योक बाद, “ताघर्नी,” है दाद,
१४ मोरो फ़ाःसिउ बाकसलाई ओछापोत
नो मोरो बैज़्यावर ब च्याँःसिकेर।
याच्याँःसिक येसुए नो मोरोलाई, “अ
बुचा, सोनिके,” है ओदोव प्राईना
१५ नो सिउ छोज्या सैसिद चुसिद पाँके।
है जैद येसुए नो छोज्यालाई ओआमाए
ओजिम्बाल फ़ाःक्यो।

१६ निताव रँःद मलामीर बनै छेःद
परमेस्वरलाई बनै घ्योःव थःरैद,
“माहान अगमबक्ता ज़ गेखार्ल हुद
ले, ओल परमेस्वर ज़ उमीरास

दैसिहुद ले,” है लिकेर। १७ है जैद
‘येसुए इताव येन दोक्यो दी’ लिन्या
यहूदियाल सोनो नजीलाव खन्द
भरिल प्राईंदा ज़ थास्नाके।

यूहन्नाए येसुए उजूनी उसुधिउ

(मती ११:२-६)

१८ रील सछैँज़्याव यूहन्नाए
उसिसराए ब आव भरी यूहन्नालाई
है दोकेर। १९ है जैद यूहन्नाए नेब्लो
उसिसनिलाई खुल्द प्रभुए ल्योक,
“नो धर्मसास्त्रलाव सर्सिउ ‘हुरिज़्या’
है यालिज़्याव नँ ज़ रो, सैँ छुतलाई
कींन्या?” है दोनाव निपरींक्यो।
२० है जैद नोनी येसुए ल्योक बाद,
“गिनलाई रील सछैँज़्याव यूहन्नाए
उपरींसिनो। होए नँलाई है दींज्याव —
नो धर्मसास्त्रलाव सर्सिउ ‘हुरिज़्या’
है यालिज़्याव नँ ज़ रो, सैँ छुतलाई
कींन्या?” है दोकिनी।

२१ नो बेलाक येसुए याजोरो
हुवरालाई, माचाव पुरूसराए क्योःद
यारानैज़्यावरालाई सोनो यामी मारैःवर
कुधुलाई ओरासगराँज़्याव। २२ है जैद
येसुए नोनिलाई, “आव डादोव जिन्ःव
जिन्थैव भरी यूहन्नालाई है दोचिन।
‘यामी मारैःवरालाई सरैःद याएज़्याव,
माबाधुन्यारालाई बाधुन्या याजैज़्याव,
कुरीरालाई यासगराँज़्याव, याना
माथासोरालाई थैधुन्या याजैज़्याव,

सिउरालाई याजागैऱ्याव, गरीबरालाई ब परमेस्वरए ओपाँ यासथैऱ्याव,' है दोनाचिन्के। २३ डालाई रँःद यायुँ माक्याऱ्यावर असिक दैवर लिऱ्यार," है निदोक्यो।

यूहन्नाए उज्जूनी येसुए ओपाँ

(मत्ती ११:७-१६)

२४ यूहन्नाए उनिपरींवनी निबाव छीनी येसुए माहोल्यारालाई यूहन्नाए उज्जूनी अइ यादोक्यो, "जे यूहन्नाए ल्योक बनल जेबाक नोलाई किताव जेरँःया? बतासए आदा फुलुपनी होदा फुलुप ओजैऱ्याव छी स्यासो ते जेमार्ँःखेहो। २५ हिताव ओमालिकिन किताव जेरँःया? सैं बनै चाव चाव क्वा क्वाइसिउ मिँलाई जेरँःव? निताव क्वा क्वाइसिद थॉतस लिऱ्यावर ते दरबारल वाऱ्ज लिऱ्यार सानी। २६ है जैद ओल्योक जेबाक नोलाई किताव जेरँःया? अगमबक्ता ज़ जेरँःखेहो सानी। डा फरी है डादाचिऱ्या, अगमबक्ताकिन भन घेप्पालाई ज़ जेरँःके। २७ नो यूहन्ना धर्मसास्त्रलाव सर्सिउ मिँ ज़। नोए उज्जूनी सर्सिउ आव ज़, 'डाकत्वाल्यालाई नड़ा नड़ा परींद डाईऱ्या।

नज्जूनी नोए नड़ादा ज़ नयेम तयार जैदीरिऱ्याव।' २८ है जैद डा जेलाई है डादाचिऱ्या, मिँनी जर्मिउ भरिरानी यूहन्नाकिन घेप्पा सु ज़ माले। हैदी ब परमेस्वरए ओराज्यालाव गोइँनी ताकिन ते प्राइँरानी ज़िम्ज़ा नोकिन घेप्पा लिऱ्या," है यादोक्यो।

२९ नो पाँ थैऱ्याव मिँर सोनो सिर्मा स्योऱ्याव पापीर यातादी ब जाँकोसै यूहन्नानी यासछैंसिउए नोराए डादाकिन ज़ 'परमेस्वरए ओयेन साचो ज़ लिऱ्या' लिद याथऱैऱ्याव। ३० फरिसीर सोनो कानुनलाव यागुर्बार ते यूहन्नानी मासछैंसिद नोराए ज्जूनी परमेस्वरए ओदोऱ्याव येन माभैंःकेर। ३१ है जैद येसुए, "आव बेलाकाव मिँर कितावर यालिऱ्याव, किताव अर्थनी है डादाचिके, है लिक ते, ३२ आव बेलाकाव मिँर बजार खार्ल रैःसिऱ्याव लुज़ा स्यासोर लिऱ्यार। नोर यानैरास गन्गनैद,

'बाँसुली तपद गयाचिक ब

जेमास्याके,

लँसिद गयाचिक ब जेमाघर्के।'

३३ हो मिताव ज़ रील सछैंऱ्याव यूहन्नाए ज़यान्यार ओमाऱ्युक, दाखमदच ओमाओक नोलाई 'दैनी

परिद ले' है जेदोज्या। ३४ डा मिँ मिन्सिद हुवए फरी ज्यान्यार डाज्युक, ओन्यार डाओक 'चिऊचिके, काता ज़ मानैज्याव ज्यास्ती, दाखमदच ओए ओए बारिज्याव, सिर्मा स्यो-ज्याव पापीराए यानै' है जेदाँज्या। ३५ हैदी ब परमेस्वरए ओगहक थ०रिउ लिज्या लिन्या ओल उबुद्धी दैवराए ज़ थ-रैज्यार," है यादोक्यो।

येसुए उखँ हुदर्चाव मेंमा

३६ तोबो फरिसीए येसुलाई उक्किमक काँ ज्यान्या खुल्क्यो। येसु नोए उक्किमक बाद चुसिद काँ उज्युज्याक, ३७ नो सहरलाव तोबो पातर्नी मेंमाए 'येसु फरिसीए उक्किमक काँ ज्युना बाद ले दी' लिन्या थैद नो मेंमाए बनै चाव जिम्जा लुँ जाल उसी डरो बनै ओए: ल्यो मास लाँद येसुए ल्योक बाके। ३८ नक उछीक बाद घर्द उपिलए उखँलाई सचिऊदद्याद ओचेमए सीद नो औरैव मास थीदद्याद उखँलाई माइँ दोदिक्यो। ३९ नो येसुलाई काँ याज्याव फरिसीए नो मेंमाए ओदोव येन रँ:द उयुँल उयुँल, "आव साचो अगमबक्ता ओताव ताकिन नो उखँ छाप्ज्याव मेंमा माचाव पापीनी ओल्यो लिन्या सरेस्वेहो," है लिके।

४० हा:त ज़ येसुए नो फरिसीए उयुँलाव पाँ सैद, "अ सिमोन, नँलाई

तोबो पाँ है डादीरिज्या," है ओदोक ते, "ताए गुर्बा, है दाँके," है दोक्यो। ४१ नकिन येसुए, "तोबो साहुए उरूप्या रिन लाँवनी नेब्लो निल्यो। नोनी तोबोए चाँदीए सिक्का पाँच सय, तोबोए पचास लाँद निनैज्याव। ४२ नोनी नो रिन निमाफो-धुवए साहुए नेब्लोलाई ज़ निरास्क्यो। नोनी साहुए उगुन काताकावए कोसै चेतैनिके? है दाँके," है ओदोक ते, ४३ नो सिमोनए, "नो कुधु ओरासोए ज़ ताखेहो," है ओदोक ते, येसुए, "थिक ज़ है नदाँके," है दाद, ४४ नो मेंमाए ल्योदा भाल्सिद सिमोनलाई है दोक्यो, "आव मेंमाए ओदोव नरँ:खेहो। डा नक्किमक डाहुक डाखँ हुन्या री ब नमायाँके, आवए ते उपिलए डाखँ हुदर्चाद ओचेमए सीदयाँक्यो। ४५ नल्योक डाहुक माइँ ब नमादाँके, आवए ते डाहुवकिन ज़ डाखँत माइँ दाव ज़ नैज्याव। ४६ नँ फरी डाडैत मास ब थीद नमायाँके, आवए ते भन डाखँत चाव सी डरो मास ब थीदयाँक्यो। ४७ है जैद डा नँलाई है डादीज्या, आव मेंमाए ओपाप कुधु ज़ उलिदी ब ओपो:स ज़ ओक्याल्सिउए डागुन कुधु ज़ चेतैक्यो। फरी छ्या रास्सिउए छ्या गुन ज़ चेतैज्याव," है लिद, ४८ येसुए नो मेंमालाई, "नपाप प्राइँ ज़ क्याल्सिके," है दोक्यो। ४९ ओलस काँ

ज्युज्यावराए नो पाँ थैद, “आव मिँ कै जैद पाप क्याल्धुन्या ओजैसिज्याव?” है लिकेर। ५० येसुए फरी नो मेंमालाई, “डालाई नयुँ उहुबोए नबाँचिके, नभिमदा चावस बानी,” है दोक्यो।

येसुए ओसेवा दाज्याव मेंमार

नकिन जाँवाक येसु सहर सहर, नाखार नाखार भरी ब परमेस्वरए ओराज्यालाव चाव था ओरासथैज्याव। बाह्व जना उसिसर ब ओलस ज़ यालिज्याव। २ येसुए ड़ादा माचाव बेथारानी, माचाव पुरूसरानी ओरासगराँव मेंमार ब तोबो नेब्लो ओलस ज़ यालिज्याव। नोरानी तोबो मरियम मगदलिनी, नोए ओक्याँतिन सात गोता माचाव पुरूसर पलेद ओयो। ३ फरी राजा हेरोदए उभिमलाव येन चलैज्याव खुजासए ओज्या योअन्ना, सोनो सुसन्ना, नोराकिन छुतर ब याल्यो। नो भरिए या याभिमनी ज़ येसुलाई उसिसरास माथैव मायोव ल सयोद याराएज्याव।

धुर वास्न्या घर्ती

(मत्ती १३:१-६; मर्कूस ४:१-६)

४ नजीलाव नाखार नाखारलाव मिँ येसुए ओल्योक बनै माहोल्या

याहुज्याव। नोरालाई अइ लिद घर्ती तोबो भाःद याएक्यो, ५ “तोबो मिँ ओएँल धुर वास्ना बाके दी। धुर ओवास्ज्याक रूवा धुर येम जीदा परिके दी। नो येमलाव परिउ रूवा मिँराए छिल्केर दी, रूवा बाज़ाराए ज्युकेर दी। ६ फरी रूवा धुर गम छया छया ल्यो ओदादरत परिके दी। नत उभी ओमाल्योए उपरीव प्राइँना ज़ थँके दी। ७ फरी रूवा धुर जुर रमराए खाल परिके दी। नो जुर रमरास सरा भरी परीद जुर रमराए गाल्क्यो दी। ८ फरी रूवा धुर ते गमस्याल परिके दी। नो बनै चावस परीद सय गुना सैके दी।” येसुए निताव पाँ सथैद माहोल्या-रालाई है ओरादोज्याव, “आव पाँ जोए थैन्या उयुँ लिज्या, चावस ओथैवक।”

धुर वास्सिउ घर्तीए ओअर्थ

(मत्ती १३:१०-२३; मर्कूस ४:१०-२०)

६ येसुए उसिसराए ओललाई, “आव नभाःव घर्तीए ओअर्थ काता?” है यादोक ते, १० येसुए, “जेलालाई वाज़ परमेस्वरए ओराज्यालाव कप्सिउ पाँ छर्लङ्ग सतैसिउ लिज्या, उपुर्कावरालाई ते घर्ती मिताव ज़ लिज्या। है जैद, ‘नोराए रँद ब मारँधुर, थैद ब मातीधुर।’

११“है जैद नो आछ्याकाव डाभाःव घर्तीए ओअर्थ आव ज़ — धुर परमेस्वरए ओपाँ ज़। १२नो येमलाव परिउ धुर आव ज़, जोए परमेस्वरए ओपाँ ओथैक सैतान हुद ‘आव ते परमेस्वरए ल्योदा बाद अजम्बरी जुनी दैवा’ लिद उयुँलाव पसिउ पाँ ब स्याप सिप जैद लाँदिज़्याव। १३फरी नो ओदादरताव परिउ आव ज़, जोए परमेस्वरए ओपाँ ओथैव प्राईना रेंद ज़ भैःज़्या। खाली ओजरा माल्यो मिताव ओतावए नो पाँत जाँवा पै बाद कातारानी दुखर खिरीर उपसिकिन हवाँ हों रासज़्याव। १४फरी नो जुर रमराए खालाव परिउ आव ज़, जोए थैन्या ते थैज़्याव, खाली नोए ‘आव डाजितत कै तान्या ओताव, कातानी कोसै जैद थाँतस लिन्या?’ लिद वीनी फुइ उलिज़्यावए नो परमेस्वरए ओपाँत ओसै माभाःज़्याव ताज़्या। १५फरी नो गमस्याल परिउ आव ज़, जोए परमेस्वरए ओपाँ थैद जात्त ज़ मारास्द चाव साचो युँस दोज़्याव, नो परमेस्वरए ओपाँत थोरिद ओसै भाःज़्याव चाव धुर स्यासो ज़ ताज़्या।”

दिउ बाल्न्यात तैःसिउ लोसै

(मर्कूस ४:२१-२५)

१६“सुए ज़ लोसै तैःद जाए माकबो, खात खँल ब मामोँव। बुरू ‘फिमल

पसिज़्यावरालाई पलाँ घताक’ लिद दिउ बाल्न्यात भाःज़्याव। १७हिताव ज़ मारैःव भरी तछा रैःन्या ज़ ले, कप्सिउ भरी ब फैसिद पलाँवल तान्या ले। १८है जैद जे नो पाँलाई पाथस थैच्यो। जोए धिद थैज़्याव, होए फ़न ज़ तीधुन्या ले। जोए चावस माथैव, होए फ़न ज़ थैन्या युँ मादाद डादाडाव ओथैव ब ओपोःस ज़ मान्या ले।”

येसुए ओआमार ओभाइर

(मत्ती १२:४६-५०; मर्कूस ३:३१-३५)

१६छीनी तछा येसुए ओआमा सोनो ओभाइर येसुस दैसिना याहुक मिँर बनै माहोल्या यातावए ओल्योक बान्या येम मादैकेर। २०नलाव तोबो नेब्लो मिँराए येसुलाई, “लाँःक नआमा सोनो नभाइर नँस दैसिना हुद लेर,” है यादोक ते, २१येसुए, “जोराए परमेस्वरए ओपाँ थैद दोज़्यार, होर ज़ डाआमार डाभाइर,” है यादोक्यो।

येसुए बतासलाई ओथकनैव

(मत्ती ८:२३-२७; मर्कूस ४:३५-४१)

२२तछा येसु उसिसरास दोङ्गाल पसिद नोरालाई, “दह होफत गेबाया,” है दाद नो यालिज़्याव दोङ्गास बाकेर। २३याबाज़्याक येसु उमीर हुद इल्द उलिज़्याव। नाःत ज़

दहल ल्यो माल्यो बतास हृद री बनै छल्किद दोङ्गाल पसिद नोरालाई गदैवा गदैवा याजैक्यो। २४ उसिसराए येसुलाई सोचोइद, “गुर्बा, गुर्बा, खदम ज़ गेतारिके,” है यादोक ते, येसु सोद बतास सोनो रीनिलाई निसिडाक्यो। हो प्राइंना ज़ बतास ब थकनिके, री ब अदिके। २५ हाःत ज़ उसिसरालाई, “खैकी जेयुं उहुबो?” है ओरादोक ते, नोर छेःद अचम्ब ताद या याल, “आव किताव मिं ओताव? बतासर रीराए ब ओपाँ यादोज़्याव,” है लिकेर।

खादर पोल लिज्याव बूलिउ मिं

(मत्ती ८:२८-३४; मार्कस ५:१-२०)

२६ येसु उसिसरास गालील दह होफताव गेरासेनस यादोज़्याव पोड केस्केर। २७ दोङ्गानी यापुलुसोत नलाव सहरनी बोःलैज्याव पुरूसए क्योःद ओनैज्याव तोबो मिंस दैसिकिनी। नो मिं क्वार ब ओमाक्वाइसिज्याव, फ़िमक मालिद रील ब खादर जीदा ज़ उलिज्याव। २८ नोए येसुलाई उरँःव प्राइंना बनै चिर चिर क्रिद येसुए उखँत फुलुप्सिद बनै चोइस, “अ येसु, माहान परमेस्वरए ओज़ा, डास नखै काता उलिज्याव? नँस डाबिन्ती लिज्या, डालाई दुख तायॉयो,” है दोक्यो। २९ नो माचाव पुरूसलाई येसुए ड़ादा ज़ “पुलुस्नी” है दाद

ओनैज्याव। नो माचाव पुरूसए नो मिंलाई घरी पाला ज़ ओक्योःज्याव। कैताक मिंराए भँए साँगलए किद गुन्या मिंर यारानैदी ब साँगलर फ्याःद नो माचाव पुरूसए साइँसुइँवक ओलाँज्याव।

३० येसुए फरी, “नमिन कै?” है ओदोक ते, “डामिन फौजी,” है दोक्यो। नोए ओक्याँत माचाव पुरूसर कुधु याल्योए ज़ ‘फौजी’ है ओदोव। ३१ फरी नोराए, “गेलाई नो नर्गलाव भल्खादाल ताभाःसियो,” लिद बिन्ती यादोज़्याव।

३२ नो बेलाक ज़ नक तोबो दाँदात ऊर तबगाल यालाज्याव। नो माचाव पुरूसराए, “गेलाई बुरू नो ऊराए क्यॉत बाव यासिके,” लिद बिन्ती यादोक ते, येसुए भैःद याएक्यो। ३३ है जैद नो माचाव पुरूसर नो बूलिउ मिंए ओक्याँतिन पुलुस्द ऊराए क्यॉत बाकेर। हो प्राइंना ज़ ऊ भरी बूलिद दाँदातिन सुइँःकिनाद दहल जोःद प्राइँ ज़ सुद सिकेर।

३४ निताव रँःद नो ऊ गावलार धोंःनाद नाखार जीदा, सहर जीदा बाद नो यारँःव भरी है यारादोकेर। ३५ नो पाँ थैव भरी साचो सैं माःक लिद चिऊना हुवर येसुए ल्योक याबाक नो माचाव पुरूसराए यारासो मिं ओक्वार क्वाइसिद येसुए उखँक सोजोकाव ज़

चुसिद उलिज़्याव रँःकेर। निताव रँःद नोर छेःकेर। ३६नो चिऊना हुवरालाई, नो येन रँःव भरिए, “बूलिउ इतावनी ज़ गराँके,” लिद है यारादोक ते, ३७नो गेरासेनस खन्द जीलाव मिँराए याछ्याचेए येसुलाई, “आनी पुलुस्द बान्के,” लिद बिन्ती दोकेर। है जैद येसु दोङ्गाल पसिद ओल्द बाव ओपैज़्याक, ३८निताव रँःद नो माचाव पुरूसरए यारासो मिँए, “डालाई ब नँस लाँनाके,” है लिद बिन्ती ओदोक ते, येसुए अइ लिद परींक्यो, ३९“नँ नक्किमदा बाद ‘परमेस्वरए डाजूनी आःल्दिउ येन दादचाँक्यो’ है लिद सथैनाव ताके।” है जैद नो मिँ बाद सहर भरी ओल उजूनी येसुए ओदोव येन यासथैक्यो।

याइरसए ओज़ा सोनो भी भोन्या ओबेथा ल्यो मेंमा

(मती ९:१८-२२; मर्कस ५:२१-३४)

४०आफताव मिँर बनै माहोल्या दुप्सिद ‘येसु खर्क हुके’ लिद कींद यानैज़्याव। येसु ओल्द उहुवत नोराए सुम्केर। ४१नोरास तोबो याइरस यादोज़्याव धर्मसास्त्र फ़िमलाव याघेप्पा उलिज़्याव। नो मिँ येसुए ल्योक हुद उखँत फुलुप्सिद, “डाफ़िमक तखेप बादचाव ताके,” लिद बिन्ती दोक्यो। ४२नोए तोबोका

तोबो बाह बर्सकाव मेंमा ओज़ा ओजोरो हुद सिउ ओपैज़्याव।

है जैद येसु नोस ओबाज़्याक मिँर बनै माहोल्या ओलस याछुइसिनाज़्याव। ४३नो माहोल्याराए याखाल तोबो बाह बर्स भरी ओक्याँतिन भी भोन्या बेथाए क्योःद ओनैज़्याव मेंमा ब उलिज़्याव। नो मेंमालाई सुए ब यामासगराँधुज़्याव। ४४है जैद नो मेंमा माहोल्याराए खाल छुइसिनाद येसुए उछीनी हुद ओक्वाए उतुपात छाप्दिक्क्यो। ओछापो प्राईना नो भी भोन्या बेथा गराँके। ४५हाःत ज़ येसुए, “डालाई सुए ओछापनाव?” है ओरादोक ते, प्राईए ज़ “डा माःक” है दोकेर। पत्रुसए फरी, “प्रभु, माहोल्यार बनै छुइसिहुज़्यार सानी,” है ओदोक ते, ४६येसुए, “डालाई तोबोए छाप्द ज़ नैनाव। डाक्याँतिन सगराँन्या सक्ती पुलुस्द ओबाव दासिद डाले,” है दोक्यो। ४७हाःत ज़ नो मेंमाए ‘डा डामासोसिधुके ब’ लिद ओछ्याचेए गूद येसुए उखँत फुलुप्सिद प्राईराए डाक येसुलाई, “डा सुए ज़ यामासगराँनाधुज़्याव बेथाए उजूनी ज़ डाछापनिउ। डाछापनिउ प्राईना ज़ डागराँके,” है ओदोक ते, ४८येसुए, “अ माँज़ा, डालाई नयुँ नसुहुबोनी ज़ नगराँके। चावस बानी,” है दोक्यो।

येसुए याइरसए ओज़ालाई सिउनी ओसोचोइव

(मत्ती ६:२३-२६; मर्कूस ५:३५-४३)

४६ येसु नो मेंमास ओपाँज़्याक ज़ धर्मसास्त्र फ़िमलाव याघेप्पा याइरसए उफ़िमनी तोबो मिँ हुद याइरसलाई, “गुर्बालाई काराव हत्या यान्या, नज़ा सिधुके,” है दोक्यो। ४७ नोए ओपाँ थैद येसुए याइरसलाई, “नयुँ तासतेयो, नयुँ वाज़ उहुष्क। नो नज़ा बाँचिन्या ले,” है दाद, ४९ याइरसए उफ़िमक याकेसोत छुतरालाई ओलस बाव मायाद पत्रुस, यूहन्ना, याकूब सोनो नो लुज़ाए ओबाबु ओआमानी वाज़ लाँद फ़िमल पसिकेर। ४२ नल नो लुज़ाए उजूनी मिँर बनै याघर्ज़्याव रँ:द येसुए, “ताघर्च्यो, लुज़ा मासिए, अइज़ डल्द ले,” है ओरादोक ते, ४३ नो घर्ज़्यावराए ‘सिधुव ज़’ लिन्या यासैवए येसुलाई हसैकेर। ४४ हा:त ज़ येसुए नो लुज़ालाई उकुइनी क्यो:द, “अ बुची सोनिके,” है ओदोव प्राईना ज़, ४५ उपुरूस ओल्द हुद सोके। नकिन येसुए, “आवलाई ज़्यान्यार जैदिचिके,” है यादोक्यो। ४६ येसुए ओयेन रँ:द नो लुज़ाए ओबाबु ओआमानी अचम्ब ज़ ताकिनी। खाली येसुए, “आव येन सुलाई ज़ है तारादोच्यो,” है यादोक्यो।

येसुए उसिसर ओरापरींव

(मत्ती १०:५-१५; मर्कूस ६:७-१३)

६ येसुए तछा बाह जना उसिसरालाई खुल्द माचाव पुरूसर पले:न्या सोनो याजोरो हुवरालाई सगराँन्या सक्तीर याद, २ परमेस्वरए ओराज्यालाव पाँ सथैना सोनो याजोरो हुवरालाई सगराँना अइ लिद यापरींक्यो, ३ “येमत जेबाक जेस काता ज़ तालाँच्यो। भुइ तादी ब, भैँ तादी ब, अर्नी तादी ब, पैसा तादी ब, फेरैसिन्या क्वा तादी ब काता ज़ तालाँच्यो। ४ जो नाखारल जेबाज्या, जेमापुलुसा पै तोबो फ़िमक वाज़ लिच्यो। ५ फरी जेबाव नाखारल जेलाई ल्यो यामायाचिकिन ननी जेपुलुस्क नोरालाई चेतावनी यान्याए जूनी जेखँताव गालो धुइरो नल ज़ थरैद ख्यानैद याराएच्यो,” है लिद यापरींक्यो। ६ है जैद नोर येसुए ल्योनी पुलुस्द नाखार नाखारल चाव था सथैए सथैए, याजोरो हुवरालाई सगराँए सगराँए बाकेर।

७ गालील खन्दलाव राजा हेरोदए येसुए ओदोज्याव येनर थैद उथुपुल ताके। येसुए उजूनी ख्वाराए, “रील सछैँज्याव यूहन्ना जन्द हुद ले,” है यादोज्याव। ८ ख्वाराए, “एलिया फरी हुद ले,” है यादोज्याव।

ख्वाराए फरी, “काताकाव भाःकाव अगमबक्ता सिउनी सैसिद उहुव सा,” है यादोज्याव। ६हेरोदए है लिके, “यूहन्नालाई ते डा ज़ ओडै चमद सैःव डारापरींव ची। आव इताव येन दाज्याव सु ओताव?” लिद नोलाई तखेप सरेसो ओपैज्याव।

येसुए पाँच हजारलाई भरेस ओरायो

(मत्ती १४:१३-२१; मर्कूस ६:३०-४४;

यूहन्ना ६:१-१५)

१०येसुए नो ओरापरींव ओसाचीर ओल्द हुद, यादोव येन भरी है दोकेर। नकिन येसुए नोरालाई सुए यामासैद बेथसेदा यादोज्याव नाखारदा यालाँक्यो। ११छीनी माहोल्याराए ओबाव सैद ओल्योदा ज़ बाकेर। याहुज्याव रँःद येसुए नोरालाई ओल्योक हुव याद परमेस्वरए ओराज्यालाव पाँ यासथैक्यो सोनो याजोरो हुवरालाई ब यासगराँक्यो।

१२जाँ रिमदा रिमदा बाह जना उसिसर ओल्योक हुद, “आव माहोल्यारालाई यापरींके। मे इताव साइँसुडैँवक गेलिज्या। हो ताकिन आजीलाव नाखार जीदा बासिन्या बासर खिम्द ज़्यावर लँःद घज्युनारक,” है यादोक ते, १३येसुए, “आवरालाई ज़्यावर जे ज़ याव ताके,” है ओरादोक ते, उसिसराए, “गेस भरेस

पाँच गोता, डाँः नेब्लो वाज़ लिज्या। सैँ ज़्यावर लँःद रैदचान्या है नलिज्याव?” है दोकेर। १४नो माहोल्यार खेपार वाज़ पाँच हजार याल्यो।

नकिन येसुए उसिसरालाई नो माहोल्यारालाई पचास पचासलाव ताना जैद सोचोडैँव यापरींक्यो। १५नोराए हैज़ जैद प्राइँलाई यारा-सोचोडैँकेर। १६नकिन येसुए नो पाँच गोता भरेस सोनो नेब्लो डाँः उकुइत रैद स्वर्गदा भाल्सिद, असिक निद भरेसर डाँःर केःद, उसिसरालाई माहोल्याराए याड़ाक याड़ाक भाःदचाव यापरींक्यो। १७नोर प्राइँए याफू तसी ज़्याद यासयेलोर यादुप्क बाह भुर्नु ताके।

पत्रुसए येसुलाई खीस लिन्या ओथरैव

(मत्ती १६:१३-२३; मर्कूस ८:२७-३३)

१८छीनी तछा येसु उसिसरास बाद ओबातड ज़ ओपोंखारिज्याव। पोंखारिद ओखेमोत उसिसरालाई, “माहोल्याराए डालाई सु है दाँज्यार?” है ओरादोक ते, १९उसिसराए, “ख्वाराए रील सछैँज्याव यूहन्ना है दींज्यार, ख्वाराए एलिया है दींज्यार, ख्वाराए फरी काताकाव भाःकाव अगमबक्ता सिउनी सैँसिउ ताखेहो है दींज्यार,” है दोकेर। २०येसुए फरी,

“जे डालाई सु है जेदाँज्या नी?” है ओरादोक ते, पत्रुसए, “नँ परमेस्वरनी हव खीस ज़,” है दोक्यो।

२१नकिन येसुए, “आव पत्रुसए है ओल्यो पाँ सुलाई ज़ है तारादोच्यो,” लिद नोरालाई अर्थैद, २२“डा मिँ मिन्सिउए कुधु दुखर दैद आव गेदेसलाव स्तरर, मुख्या पुजारीर सोनो सास्त्रीराए ल्योनी सोसी निन्या डातारिज्या। नोराए यासैःनाव स्रोंलात सिउनी सैसिद डासोरिज्या,” है यादोक्यो।

येसुए उसिस जैसिन्या

(मत्ती १६:२४-२८; मर्कूस ८:३४-६:१)

२३नकिन फरी माहोल्याराए ल्योदा भाल्सिद प्राइँलाई ज़, “जोए डास हुन्या युँ दोज्याव, होए उजिउए मया मादाद दिनकाव ज़ क्रुसत सिन्या मिताव दुखर सहिद डाछीँत उहुक। २४जोए आव उजिउत ओललाई तान्या वाज़ खिम्ज्याव, होए उजुनी-लाई समैज्याव। फरी जोए आव उजिउत उजिउए मया मादाद डा डाजूनी दोज्याव, होए जुनी दैरिज्याव। २५जोए आव मानुवात लिज्याव भरी दैद उजुनीलाई ओसमैकिन नोलाई काता ची ता? २६जो आव बेलाक डा सोनो डापाँत ओलाज हुज्या, डा मिँ मिन्सिउ ब फरी छैँव डाचाकज्यारास

डाबाबुए ओज़गै मगैरास डाहुक डा ब नोलाई रँःद डालाज हुन्या ले। २७डा साचो है डादाचिज्या, आकाव च्याँःसिद लिज्यावरानी जे रूवा रूवाराए परमेस्वरए ओराज्या जेमारँःवा पै सिन्या जेमाले,” है यादोक्यो।

येसुए ओज़गै ओसरैःव

(मत्ती १७:१-८; मर्कूस ६:२-८)

२८नो है ओरादोव छचामकिन तसातावाक येसुए ओलस पत्रुस, यूहन्ना सोनो याकूबलाई लाँद तोबो गोंत पोंखारिनाक्यो। २९नक येसुए ओपोंखारिज्यावत ज़ ओडाःर चबनै त्तोसिद ओक्वार ब तक तकौ ताद मी भीःन्या ताके। ३०हाःत ज़ फरी मोसा सोनो एलियानी हुद येसुस पाँकेर। ३१नोनी ब बनै ज़गै ज़गैवनी निरैःज्याव। सोनो येसुए यरूसलेमल उजिउ ओभाःरिज्यावए जूँनी यापाँज्याव।

३२पत्रुस डादा ओनैँनिस यामीर पातिद डल्द यालिज्याव। यासैँसिउत येसु ओज़गै मगैस नो मिँनिस ओपाँज्याव यारारँःकेर। ३३नकिन मोसा सोनो एलियानी येसुस भाःसिद निबाज्याव रँःद पत्रुसए येसुलाई, “अ गुर्बा, गे आक लिन्या बनै चाव लिज्या। गे जेलाई सोम्लो पाल

तङ्गैद गयाच्यो, तोबो नॅलाई, तोबो मोसालाई, तोबो एलियालाई,” है दोक्यो। पत्रुस ओछ्याचेए काता पाँन्या लिन्या ब ओमासैँज्याव।

३४ ओपाँज्याक ज़ बादल तोबो हुद नोरालाई याकप्व्यो। उसिसर बनै छे-केर। ३५ नो बादल जीनी तोबो गा अइ लिद थास्के, “आव डा डाछाँतिउ डाज़ा ज़, जे आवए ओपाँ थैच्यो।” ३६ ना: ओपाँवत नक येसुलाई वाज़ रँ:केर। नो स्रोम्लोराए फरी नो यारँ:व भरी हा: बेलाक सुलाई ज़ है मारादोकेर।

माचाव पुरूसए ओक्यो:व छोज्या

(मत्ती १७:१४-१८; मर्कूस ६:१४-२७)

३७ हो परा:ती नो गोंतिन याभरिउत मिँर बनै माहोल्या येसुस दैसिना हुकेर। ३८ नो माहोल्यारानी तोबोए, “अ गुर्बा, नॅस डाबिन्ती लिज्या। डाज़ा तोबोका तोबो ज़ लिज्या, नोलाई नयुँ नाद चिऊदयाँके। ३९ नोलाई कैताक माचाव पुरूसए क्यो:द, चिर चिर किउ परींद, उमँ:जानी ख्याडग्याँ खेङ्गे जैद ओया:नी फुइ गज्या पले:द बनै दुख ओमाएवा पै मारासो। ४० नसिसरालाई ‘पले:दिचिके’ है डारादोक ते मापले:धुकेर,” है दोक्यो। ४१ नकिन येसुए नक

लिज्यावरालाई, “ए जेयुँ माहुबोर, परमेस्वरस माखैवर, डा जेस खा ची डालिरिज्याव, खा डासहिचिके!” है दाद छोज्याए ओबाबुलाई, “नज़ालाई आदा रैके,” है दोक्यो। ४२ ओबाबुए ओरैज्यावत ज़ नो पुरूसए छोज्यालाई नक ज़ पछारिद खागरा खगर० जैक्यो। है जैद येसुए नो माचाव पुरूसलाई हप्वकैद पले:दयाद सोजोकाव जैद ओबाबुलाई एक्यो। ४३ नकाव लिज्यावर परमेस्वरए अचम्बलाव ओसत्कीर रँ:द अचम्ब ज़ ताकेर।

येसु उसिन्याए जूनी फरी ओपाँव

(मत्ती १७:२२-२३; मर्कूस ६:३०-३२)

नोर अचम्ब ताद यालिज्याक ज़ येसुए उसिसरालाई, ४४ “आव डापाँ जेर्ना घ्याँ जैद थैच्यो। डा मिँर मिन्सिद हुवलाई मिँराए याकुइत सूँपिनारिज्यार,” है यादोक्यो। ४५ नोराए नो पाँ यामाबुभिदी ब येसुलाई सुधिन्या छे-केर। नो पाँए ओअर्थ कप्सिउ उलिज्यावए माबुभिधुकेर।

घेप्पा जैसिन्या पाँ

(मत्ती १८:१-५; मर्कूस ६:३३-३७)

४६ नकिन येसुए उसिसर या याल, “गे सु घेप्पा गेलिज्याव?”

लिद याखर्लेसिज़्याव। ४७ नोर याखर्लेसिज़्याव सैंद येसुए तोबो जिम्ज़ा लुज़ालाई रैद ओलापक सच्याँद, ४८ उसिसरालाई है यादोक्यो, “जोए डा डामिनत आव मिताव जिम्ज़ारालाई यासुम्ज़्याव, होए डालाई मनी सुम्नाज़्याव। डालाई सुम्ज़्यावए फरी डालाई वाज़ माःक, डालाई परींज़्यावलाई ब सुम्ज़्याव। है जैद जे जेखार्ल जो सज़िम्सिज़्या, हो ज़ घेप्पा लिज़्या।”

गेकिन तँदा लिज़्यावर

(मर्कूस ६:३८-४०)

४६ फरी यूहन्नाए, “गुर्बा, तोबोए नमिननी माचाव पुरूसर ओरा-पले-ज्याव गेरँःके। नो गेस ओमाल्योए नोलाई पले-व गेमाएके,” है ओदोक ते, ५० येसुए, “नोलाई तावैच्यो। जो जेकिन तँदा माजैसिए, हो जेस ज़ लिज़्या,” है दोक्यो।

सामरियालावराए येसुलाई ल्यो यामायो

५१ येसु स्वर्गदा बान्या बेला उहुनावए यरूसलेमदा बान्या पक्का युँ दाद, ५२ उजूनी पोर जैन्याए जूनी तोबो नेब्लो उमीर ड़ादा ज़


यापरींक्यो। नोर सामरिया खन्दलाव तोबो नाखारल बन्दोबस्त जैनाकेर। ५३ नो नाखारलावराए फरी, येसुए यरूसलेमदा बान्या उयुँ थू ओजैवए नल ल्यो माएकेर। ५४ निताव रँःद उसिसनी याकूब सोनो यूहन्नानी येसुलाई, “अ प्रभु, सैं आवरालाई नमतिन मेंः सवादद्याद चुयाप जैन्या?” है निदोक ते, ५५ येसुए, “निताव जैन्या माःक,” है दाद नोनिलाई सिडार्द, ५६ छुत नाखारदा बाकेर।

येसुस बाव पैंज़्यावर

(मत्ती ८:१६-२२)

५७ याबाज़्याक येमक येसुस तोबो दैसिद, “नँ जोदा नबाज़्या, डा ब होदा ज़ डाबाया,” है ओदोक ते, ५८ येसुए, “स्यालर लिन्या कुँ लिज़्या, बाज़ार लिन्या सिप ब लिज़्या। डा मिँ मिन्सिद हुवलाई ते ड़ै कण्ण्या पो ब माले,” है दोक्यो।

५९ फरी येसुए तोबोलाई, “डास हुन्के,” है ओदोक ते, नोए, “अ प्रभु, ड़ादा डाबाबुलाई डागादैदा,” है दोक्यो। ६० येसुए फरी, “सिउरालाई सिउ स्यासोराए घरागादैज़्यारक, नँ भन्या परमेस्वरए ओराज्यालाव पाँ सथैना बान्के,” है दोक्यो।



(६:६२)

६१ फरी छुत तोबो हुद, “प्रभु, डा ते नँस ज़ डाबारिज़्या, खाली ड़ादा डाफ़िमलावरास तखेप बिदा ड़ान्निरिज़्या,” है ओदोक ते, ६२ येसुए नोलाई, “एँ: कीक घोर क्यो:द उछींदा भाल्सिज़्याव मिं परमेस्वरए ओराज्याल पसिन्या स्यासो माताए,” है दोक्यो।

प्रभुए सत्तरी जनालाई खतैद
ओरापरींव

१० नकिन जाँवाक प्रभुए
उसिसराकिन छुतर सत्तरी
जनालाई खतैद नेबरें नेबरें जैद
ओल ओबारिज़्याव पो पोड ड़ादा

बान्या याजैक्यो। २ नोरालाई दुप्द है यादोक्यो, “तामर चिकार यामी:नाव मिताव, परमेस्वरए ओराज्याल हुन्यार कुधु ज़ ताद लेर। खाली नोरालाई रैन्या बाहोज्यार ते छ्या ज़ ताकेर। है जैद नोरालाई रैन्या मिं ओरापरींवक लिद परमेस्वरलाई पोखारिच्यो। ३ जे फरी जोगोइसिद बाच्यो, जेलाई पर मितावराए खार्ल बेधा पाथा मितावर जैद डापरींचिज़्या। ४ जेबाक पैसा ब तालाँच्यो, भैं ब तालाँच्यो, पोला ब तालाँच्यो। काङ्क ज़ ताँपै तोँपै मालिद ज़ बाच्यो।

५ “जो फ़िमक जेपसिज़्या, ड़ादा ‘आव फ़िमलाई चाव ओताक’

है लिच्यो। ६नल घच सहिन्या मिँर यालिकिन, नो जेरायो असिक नोराए याक्याँत ज़ रहिरिज़्या। फरी नलावर घच मासहिन्यार यालिकिन, जेअसिक याक्याँत रहिन्या माले। ७फरी जो फ़िमक ल्यो याचिज़्यार, हो फ़िमकिन आदा होदा माबाद जो याचिज़्यार हो ज़ ज़्याद ओद लिच्यो। जो येनत तादी ब येन दाज़्यावए ओजेला दैव ज़।

८“फरी जो नाखारल जेबादी ब जेलाई ल्यो यायाचिकिन, जो मिताव ज़्याव याचिज़्यार हो ज़ ज़्युच्यो। ९नलाव याजोरो हुवर ब यारासगराँच्यो। नोरालाई ‘परमेस्वरए ओराज्या सो हुरिके’ है यारादोच्यो। १०फरी जो नाखारल जेलाई ल्यो यामायाचिकिन, दोहाक बाद, ११‘जेनाखारलाव गेखँताव गालो धुइरो ब आल ज़ थरैद ख्यानैद गयाचिज़्या। खाली आव ब सैँच्यो, परमेस्वरए ओराज्या सो हुरिके,’ है यारादोच्यो। १२डा जेलाई है डादाचिज़्या, परमेस्वरए फाल्न्या छचाम नो नाखारलाव मिँराकिन बुरू सदोमलावरालाई सहिधुन्या तारिज़्या,” है यादोक्वो।

यायुँ माफकैँज़्याव सहरर

(मत्ती ११:२०-२४)

१३“हिताव ज़ जे खोराजीन सोनो बेथसेदालावरालाई थैए माँतकन ज़ लिज़्या। जे जेरैँव परमेस्वरए ओसक्तीलाव येनर तुरोस सोनो सीदोनलावराए यारैँव ताकिन आः भरी यापापए जूँनी यायुँ माचाव दाद बर्ला सुर्सिद धुलील चुसिद यायुँ फकैँद यापापर रास्थुखेरहो। १४है जैद परमेस्वरए फाल्न्या छचाम जेकिन बुरू तुरोस सोनो सीदोनलावरालाई सहिधुन्या तारिज़्या। १५हिताव ज़ फरी जे कफर्नहुमलाव मिँर, स्वर्गत केसो मितावर जेडम्मिज़्या, भन नर्गल ज़ बान्या जेले।”

१६नकिन येसुए उसिसरालाई, “जोए जेपाँ थैज़्याव होए डा डापाँ ब थैज़्याव। हिताव ज़ जोए जेलाई मासुम्चिउ, होए डालाई ब मासुम्नाव। फरी जोए डालाई मासुम्नाव, होए डालाई परींज़्यावलाई ब मासुमो,” है लिद यापरींक्वो।

सत्तरी जना ओल्द हुवर

१७छींनी नो सत्तरी जना बाद ओल्द याहुवत येसुए ल्योक बनै रेंए रेंए बाद,

“प्रभु, नँ नमिननी माचाव पुरूसर ब गेपाँ धूँल ज़ ताकेर,” है यादोक ते, १८ येसुए, “सैतानलाई बिजुली मिताव नमतिन ओतेहुज़्याव डारें:के। १९ डा सैतानए ओसत्की भरी जेधूँल ज़ जैद नैद ड़ायाचिए। है जैद ज़ निताव घुल स्यासोर बिछी स्यासोर जेराछिल्क कै मै ज़ जेमाताके। २० हैदी ब ननी जे तारेंच्यो, बुरू स्वर्गत जेमिन सर्द नैसिउ उलिज़्यावनी रेंच्यो,” है यादोक्यो।

येसु ओबाबु परमेस्वरस ओपाँव

२१ ना:त ज़ येसु छेंव पुरूसनी बनै रेंद, “अ बाबु, नाम नमलावराए याडैताव, नँलाई धन्याबाद डाचरै:निज़्या। नँ नपाँर सैन्या जैसिज़्यावर, याबुद्धी ल्यो जैसिज़्यावरालाई सतैद मायाद, भाउज़ा मितावरालाई सतैद नराएके। हैज़ बाबु, नल्योदा बान्या येम नो ज़ चाव नथ:रैके,” है लिद पोखारिक्यो।

२२ नकिन येसुए, “ताव भरी डाबाबुए डाकुइत ज़ याद नैनाव। किताव परमेस्वरए वाज़ ओज़ालाई सरेस्ज़्याव, हिताव ज़ ओज़ाए वाज़ परमेस्वरलाई सरेस्ज़्याव। है जैद डा छुतलाई सतैद डाएकिन वाज़ होए परमेस्वर डाबाबुलाई सरेस्थुज़्याव,” है यादोक्यो।

येसुए ओपाँ थैद असिक दैवर

२३ नकिन येसुए उसिसरालाई अलगज़ा है यादोक्यो, “जे जेरें:व भरी रें:ज़्यावर असिक दैवर ज़। २४ डा जेलाई है डादाचिज़्या, अगमबत्कार, घेप्पा राजाराए ब आव जे जेरें:व पाँर रें:न्याए जूँनी यारुँ थू जैद ब रें:व मादैकेर, थैन्या युँ दाद ब थैव मादैकेर।”

चोरराए याप्रोवलाई समारिज़्याव मिँ

२५ येसुलाई जाँचिन्याए जूँनी, तछा कानुनलाव तोबो यागुर्बा हुद, “अ गुर्बा, डा अजम्बरी जुनी दैन्या किताव दान्या?” है ओदोक ते, २६ येसुए, “मोसाए ओकानुनल किताव सर्सिउ उलिज़्याव, नोए ओअर्थ किताव नथ:रैज़्याव?” है दोक्यो। २७ नो कानुनलाव यागुर्बाए फरी, “‘जेयुँलाई आदा होदा मादुलैद, जेर्सा माम्मोंद, जेप्रभु परमेस्वरए ल्योदा युँ थू जैद ओललाई वाज़ मया दान्या,’ सोनो, ‘जेक्याँलाई किताव जेसमारिज़्या, नँ मेंलाई ब हिताव ज़ समारिन्या,’ ” है दोक्यो। २८ येसुए, “थिक ज़ है नदाँके। आव भरी नदोकिन ननी ज़ अजम्बरी जुनी दैन्या नले,”

है ओदोक ते, २६ नो कानुनलाव यागुर्बाए ओल थिक उलिङ्ग्याव सतैन्याए जूनी, “डानै डामेर कित्तावर तार?” है दोक्यो।

३० है जैद येसुए अइ लिद घर्ती तोबो भाःदिक्यो, “तोबो मिं यरूसलेमनी यरीहोदा ओबाङ्ग्याक चोरराए फेला पारैद, प्रोद, ओक्वार हाइद लाँद, ओललाई येमक ज़ लल्यातोरो जैद ख्यानैकेर दी। ३१ कातानी तोबो पुजारी नो येम हुद नो याप्रोव मिँलाई रँःद भन तँनिकाव घ्याँ बाके दी। ३२ फरी तोबो लेबी† थरलाव मिँ हुद नोए पाला नोलाई रँःद तँनिकाव घ्याँ ज़ बाके दी। ३३ बल्ल तोबो तादादा बाङ्ग्याव सामरियालाव मिँ हुद, नो याप्रोवलाई रँःद, उयुँ नाद, ३४ ओल्योदा बाद, ओघाडर छेदद्याद, वासःर भाःद, क्वाराए पोःदद्याद, गधाहा तर्त भाःद तोबो भक्तीक लाँद पाथस नैक्यो दी। ३५ हो पराःती नो भक्ती वालालाई, ‘आव मिँलाई पाथस नैयो,’ है दाद चाँदीए सिक्का नेब्लो याद, ‘आवकिन आगल्या ओलागिकिन फरी डाहुक डायौँ,’ है दाद ख्यानैक्यो दी।”

३६ नकिन येसुए नो कानुनलाव यागुर्बालाई, “नो स्मोलोरानी नो चोरराए

याप्रोवए ओनै काताकाव ताया?” है ओदोक ते, ३७ नो कानुनलाव यागुर्बाए, “नो उयुँ नाङ्ग्याव ज़,” है दोक्यो। येसुए फरी, “नँ ब बाद हिताव ज़ दोयो,” है दोक्यो।

मार्था सोनो मरियमनी

३८ येसु उसिसरास यरूसलेमदा याबाङ्ग्याक येमक तोबो नाखारल पसिकेर। नो नाखारल मार्था यादोङ्ग्याव तोबो मेंमाए येसुलाई बनै मानस उक्किमक लाँक्यो। ३९ मार्थाए ओबैनी मरियम ब नल ज़ उलिङ्ग्याव। नो येसुए उखँक चुसिद ओपाँ बनै धिद ओथैङ्ग्याव। ४० मार्थाए ते ज़्यावर काता कातार ओजैङ्ग्यावए नो पाँ थैव मादैक्यो। है जैद मार्था येसुए ल्योक बाद, “प्रभु, डाबैनीए आव येनत ओमासघैनाङ्ग्याव नरँःज्याखेहो। नोलाई नँ तखेप है दादद्याव ताके,” है ओदोक ते, ४१ प्रभुए, “अ मार्था माँज़ा, नँ काताए जूनी प्राइँत वीनी फुइ नताङ्ग्याव? ४२ खास तोबोए ओचाहित वाज़ लिङ्ग्या। नो ओचाहित ल्यो मरियमए रैद ओनैङ्ग्याव पाँ ज़। है जैद नो रैद ओनैङ्ग्याव नोनी सुए ज़ मालाँधुव।”

† १०:३२ लेबी है लिन्या ध्यान क्किमल येन दोङ्ग्याव मिँ ज़।

१०:२८ लेबी १८:५ १०:३३-३४ २ इति २८:१५

पोंखारिन्या

(मत्ती ६:६-१३)

११ येसुए तछा पोंखारिद ओखेमोत, उसिसरानी तोबोए, “प्रभु रील सछैंज्याव यूहन्नाए उसिसरालाई पोंखारिन्या ओरासिऊव मिताव गेलाई ब पोंखारिन्या सिऊसियो,” है ओदोक ते, २येसुए, “जेपोंखारिक इतावनी पोंखारिच्यो, “परमेस्वर बाबु, नमिन प्राईए ज़ छैंव ओथरैरक।
स्वर्गताव नराज्या
आव नामल उहुक।
३गेलाई चाहिज्याव ज़्याव दिनकाव ज़ जोरैदयासियो।
४नउपर्त गेदोव पापरानी रास्सियो। हो मिताव ज़ गे ब मिँराए गेउपर्त यादोव पापरानी गेरारास्ज्या। सोनो गेलाई माचाव चेतैन्यारानी जोगोइसियो,’ है लिच्यो,” है यादोक्यो।

ओनैए ल्योक भरेस निज्याव

(मत्ती ७:७-११)

५फरी येसुए उसिसरालाई है यादोक्यो, “जेनी तोबोए जेनेँ लिज्याखेहो। आधा रील नो जेनेँए ल्योक बाद, ‘अ डानैँ, भरेस सोम्लो लोइव ताके। ६तोबो डानैँ बनैँ तादानी हुद ले, डा नोलाई

यान्या काता ज़ माले,’ है जेदोकिन, ७नो भिमलावए, ‘डालाई दुख तायाँ, यामर डागल्धुके, डाज़ारास स्याँद गेले। डा सोद नँलाई डामाईधुइ,’ है उलिकिन, ८नोए नैँ नैँ नितावए ओमाएदी ब फरी ओनैँए ‘मायाद माताए’ लिद जात्त ज़ ओमारासोए करनी वाज़ उन्निउ भरी एक्यो।

९“हिताव ज़ डा जेलाई है डादाचि-ज्या, परमेस्वरस जेन्निकिन जेलाई यान्या ज़ ले, जेखिम्किन दैन्या ज़ जेले, याम कोतो कोतो जेजैकिन जेजूनी फैसिन्या ले। १०जोए निज्याव होलाई यान्या ले, जोए खिम्ज्याव होए दैन्या ले, जोए कोतो कोतो जैज्याव होए उजूनी फैसिन्या ले। ११जेनी किताव बाबु लिके? [ओज़ाए भरेस उन्निकिन लुँ यान्या?] डाँ: उन्निकिन घुल यान्या, १२बाजुरी उन्निकिन बिछी यान्या? १३है जैद जे निताव पापल लिज्याव मिँराए जेज़ारालाई निताव चाव चाव यान्या जेसैकिन, स्वर्गताव जेबाबुए भन ओलस जेन्निकिन छैंव पुरूस कै जैद मायाचिउके?”

येसुलाई सैताननिकाव याजैव

(मत्ती १२:२२-३०, ४३-४५;

मर्कूस ३:२०-२७)

१४फरी तछा येसुए तोबो मिँए ओक्याँनी माचाव पुरूस

पले-दिक्यो। नो पुरूस मापाँधुन्या लाता जैज़्याव पुरूस ओल्यो। नो पुरूस उपुलुसो प्राइँना नो मिँ पाँधुन्या ताके। निताव रँ:द नक लिज़्याव माहोल्यार अचम्ब ताकेर। १५ ख्वा ख्वाए, “आवए ते माचाव पुरूसराए याघेप्पा बालजिबुलए उमिननी ओरापले-ज़्याव ची,” है लिकेर। १६ ख्वाए फरी येसुलाई जाँचिन्याए जूँनी, “स्वर्गताव नसरेस तोबो सतैके,” है यादोज़्याव। १७ येसुए नोराए यायुँलाव पाँ सैद, “तोबो राज्यालाव मिँर या या यामाखैकिन नो राज्याए उमिन ज़ माज़्या। हो मिताव ज़ तोबो फ़िम-लावर या या यामाखैकिन चितराँ पुतराँ तान्या लेर। १८ हिताव ज़ सैतानए ओराज्यालावर पाला या या यामाखैकिन नोराए यामिन कातानी ओरहिरिज़्याव? जे ते भन डालाई ‘बालजिबुलए उमिननी माचाव पुरूसर यापले-ज़्याव’ है जेदाँज़्या। १९ डा ननी डारापले-ज़्याव ताकिन जेसकावराए कातानी यारापले-ज़्याव? है जैद नो जेपाँ जेसकावराए ज़ जेडैत फुलुपदचान्या लेर। २० खाली डा परमेस्वरए ओसक्तीनी डारापले-ज़्याव ताकिन परमेस्वरए ओराज्या जेखाल ज़ हुद ले।

२१ “तोबो ओसा ल्यो मिँए ओहत्यारर रैद उफ़िमलाई उगुकिन नोए उफ़िम-लाव भरी सुए ज़ मालाँधुर। २२ नोकिन ओसा ल्यो हुद खपद ओहारैधुकिन वाज़ ओहत्यारर नैद उफ़िमलाव जा-यार हाइद लाँद भा:न्या ले।

२३ “जो डास माखैए, हो डाकिन तँदाडाव ज़ लिज़्या। फरी जोए डास मादोव, होए ज़ डापाँ बले-ज़्याव।

२४ “मिँनी पले-सिउ माचाव पुरूस नो मिँए ओक्याँनी उपुलुसोत री माल्यो साइँसुइँवक नासिन्या पो खिम्नाज़्याव। लिन्या पो ओमादैकिन फरी ओल्द डादाडाव उपुलुसोए ओक्याँत ज़ पसिउ पैँज़्याव। २५ नल ओबाक स्यासी जैद थिक थाक जैसिउ पो रँ:द, २६ ओलकिन माचाव पुरूसर सात गोता ओलस रैद नल पसिद नो मिँलाई डादाडावकिन भन ज़ माचावए क्यो:ज़्याव,” है यादोक्यो।

असिक दैवर

२७ येसुए ना: ओपाँवत नो माहोल्या-रानी तोबो मेंमाए येसुलाई, “नँलाई जमैद नुइँ सवैव मेंमा असिक दैव लिज़्या,” है ओदोक ते, २८ येसुए, “नोकिन बुरू परमेस्वरए ओपाँ थैद ओपाँ दोज़्यावर असिक दैवर लिज़्यार,” है दोक्यो।

योनाए ओक्याँत ताव सरेस

(मत्ती १२:३८-४२)

२६ माहोल्यार भन ज़ माहोल्या यातावत येसुए है यादोक्यो, “आव जुकलाव मिँर बनै पापीर लिज़्यार। डासरेस वाज़ खिम्ज़्यार। खाली यादैरिज़्याव सरेस ते योनाए ओक्याँत ताव सरेस वाज़ दैरिज़्यार। ३० किताव योनाए ओक्याँत ताव पाँर निनवे सहरलाव मिँरालाई सरेस ओताव, हिताव ज़ डा मिँ मिन्सिद हुवए डाक्याँत हरिज़्याव पाँर ब आव जुकलाव मिँरालाई सरेस तारिज़्या। ३१ नो दखिन देसलाव रानीए परमेस्वरए ओपाँ सोलोमनए ओयाःनी थैना बनै तादानी हुके। जे जेखाल हुद लिज़्याव ते सोलोमनकिन भन घेप्पा लिज़्या। है जैद परमेस्वरए ओराफाल्रिज़्याव छचाम आव बेलाकाव मिँराए यागलती नो रानीए ओक्याँनी ज़ थ०रिरिज़्या। ३२ हो मिताव ज़ नो निनवे सहरलाव मिँराए योनाए ओरासथैव पाँर थैद परमेस्वरए ल्योदा यायुँ फकैकेर। जेखाल हुद लिज़्याव ते योनाकिन ब घेप्पा लिज़्या। है जैद परमेस्वरए ओराफाल्रिज़्याव छचाम नोराए

याक्याँनी ब आव बेलाकाव मिँराए यागलती थ०रिरिज़्या।”

क्याँताव बत्ती

(मत्ती ५:१५; ६:२२-२३)

३३ “सुए ज़ लोसै तैःद मारैःवल ब मानैव, जाए ब माकबो। बुरू ‘फिमल पसिज़्यावरालाई पलाँ घताक’ लिद दिउ बाल्न्यात भाःज़्याव। ३४ हिताव ज़ जेक्याँताव बत्ती जेमी लिज़्या। नो जेमी चाव उलिकिन जेक्याँ भरी पलाँव ज़ ताज़्या। फरी नो जेमी ज़्याज़्या ज़िफ़िव उलिकिन जेक्याँ भरी ओपोःस ज़ चुम चुमोल ताज़्या। ३५ है जैद नो जेक्याँताव पलाँव ताव परिन्या चुम चुमो ताताक। ३६ पलाँवल लिज़्याव मिँ चुम चुमोल माताद दिउ बाल्न्या डाकाव ज़गैवल उलिज़्याव मिताव लिज़्या।”

येसुए फरिसीराए यापाहा भाःद

ओरायो

(मत्ती २३:२५-२६)

३७ येसुए नो पाँ भरी ओरासथैवत तोबो फरिसी हुद येसुलाई काँ यान्याए जूँनी खुल्क्यो। येसु नोए उफिमक बाद, ३८ उकुइ माचोखोइद ज़ ज़्यान्यात थूसिके। नो फरिसीए

निताव रँ:द बनै हार मानिक्यो।
 ३६ प्रभुए नोलाई, “जे फरिसीर,
 ताथीर खुरीर जेराचोखोइज्याव नो
 पाखाताव वाज़ लिज्या। जेयुँल ते
 लोभ सोनो माचाव वाज़ जेनैज्या।
 ४० ए जेर्ती माल्योर, परमेस्वरए
 पाखाताव जेक्याँ वाज़ जैद ओयाचिउ
 मा:क, जेयुँ ब जैदयाचिक्यो।
 ४१ जेयुँनी माथैव मायो-वरालाई
 जेराचिऊकिन जेयुँ ब चोखो तान्या
 ले।”

फरिसीरालाई थैए माँतकन

(मत्ती २३:१-२४, २७-३६;

मर्कुस १२:३८-४०)

४२ “जे फरिसीरालाई थैए माँतकन
 ज़ लिज्या। जे तके दँ जरार घोद दस
 भा जैद तभा भितील जेभा:ज्या। नो
 जेदोज्याव ते चाव ज़, खाली नत
 वाज़ जेयुँ थू जैद भन ओचाहित
 ल्यो सतस दान्या सोनो परमेस्वरए
 ल्योदा युँ थू जैन्या भरी जेरास्के। जे
 भन नो ओचाहित ल्योलाई ब रासो
 मापरिन्या।

४३ “फरी ब जे फरिसीरालाई थैए
 माँतकन ज़ लिज्या। जे सघ्यो:सिद

धर्मसास्त्र भिमराल प्राइँराए रँ:न्या
 पोक चुसिउ जेपैँज्या। बजार जीदा
 ब ‘मिँराए धो घदासिरक’ लिद
 जेदुलिरिज्या।

४४ “जेलाई थैए माँतकन ज़
 लिज्या, जे मारैँ:व खादर स्यासोर
 जेलिज्या। जेल्योदा हुज्यावर मासैँद ज़
 बलेस्ज्यार,”[†] है यादोक्यो।

४५ आव भरी थैद कानुनलाव तोबो
 यागुर्बाए येसुलाई, “गुर्बा, इताव नपाँए
 ते गेइज्यात ब खुलिद नयासिके,” है
 ओदोक ते, ४६ येसुए, “जे कानुनलाव
 यागुर्बारालाई ब थैए माँतकन ज़
 लिज्या। जे सुए ज़ यामासयो-धुज्याव
 कानुनर जैद छुतरालाई वाज़ दाव
 जेरापरींज्या, जे ताकितर तोबो
 ओछ्यो ब जेमाछुए।

४७ “जेलाई थैए माँतकन ज़ लिज्या,
 जेसाखा पुर्खाराए अगमबक्ता भरि-
 रालाई यारासै:केर। जे फरी नोराए
 याखादरर जेराबनैज्या। ४८ है जैद
 जेसाखा पुर्खाराए यादोव येन
 जे ज़ जेथ-रैँज्या। यारासै:वराए
 यापो जेबनैक फरी नोरास भन
 खदेप ब जेलिज्या। ४९ है जैद जे
 मितावराए जेजूनी परमेस्वरए ड़ादा
 ज़ थिक है लिद ले। नो पाँ आव ज़,

† ११:४४ यहूदीराए याचलनल खादर तर्त बाज्याव मिँ उछुसिज्याव — गन्ती १६:१६।

११:४२ लेबी २७:३०

‘डा नोराए ल्योदा अगमबक्तार स्रोतो डापाँ सथैन्यार डारापरींज्या। नोरानी ख्वारालाई यारासैःरिज्यार, ख्वारालाई याखिरी पसिदचान्या लेर।’

५० “है जैद आव संसार सुरू ओतावकिनकाव अगमबक्तारालाई यारासैःव भरिराए याभी आज्यालकाव मिंराए याक्याँत ज़ तारिज्या। ५१ ओदाज्युए ओसैःव हाबिलए ओपालाकिन, नो थान स्रोतो ध्यान फ़िमनी निखालाव यासैःव जकरिया पैकावराए याभी आव बेलाकाव मिंराए याक्याँत लागिस्त्रिज्या।

५२ “जे कानुनलाव यागुर्बारालाई थैए माँतकन ज़ लिज्या। जे धर्मसास्त्रलाव सर्सिउ परमेस्वरए ओराज्याल पसिन्या साँचा जेमोंके। है जैद जे ननी ज़ परमेस्वरए ओराज्याल पसिउ जेमाभैःए, पसिउ पैज्यावरालाई ब जे ज़ जेरावैके,” है यादोक्यो।

५३ येसु ननी पुलुस्द ओबाज्याक नो फरिसीर स्रोतो कानुनलाव यागुर्बार येसुकिन तँदा जैसिद बनै कुधु पाँर सुधिकेर। ५४ नोराए यायुँल ‘ओल ओयाःनी पुलोसो पाँनी ज़ गेक्योःया’ लिन्या उलिज्याव।

येसुए उसिसरालाई ओरासम्जैव

(मत्ती १०:२६-३३)

१२ हाः बेलाक बनै माहोल्या मिँर येसुए ओपाँ थैन्याए जूनी छिल्सिवा छिल्सिवा जैसिद बनै याछुइसिज्याव। नो बेलाक ज़ उसकत उसिसरालाई इतावनी यासथैक्यो, “जे फरिसीराए यादोज्याव मिताव कप्तै येननी जोगोइसिद लिच्यो। निताव येन सरालिसिज्याव वासः मिताव ताज्या। २ कप्सिउल लिज्याव भरी तछा प्राइँए सैन्या लेर, मोंसिउल लिज्याव भरी ब छर्लङ्ग ज़ रैःरिज्यार। ३ है जैद जे आज्याल मोंसिद जेपाँदी ब तछा पाखात थास्त्रिज्या। फ़िमलाव खुस खुसनी जेपाँव भरी ब थालातिन यारासथैरिज्यार।”

४ येसुए फरी, “जे डानैरालाई है डादाचिज्या, जेक्याँलाई वाज्ज सैःद छुत काता ज़ माजैधुज्यावर रँःद ताछेच्यो। ५ बुरू जेक्याँलाई सैःद नर्गल ख्यान्या ओहक ल्योलाई रँःद वाज्ज छेच्यो। साचो है डादाचिज्या, नोलाई रँःद जुनी ब छेव ज़ परिके। ६ आव ब चेतैच्यो। पाँच गोता बिडज्या नेपैसाल ओमाबिकैज्याव रो? नाः सोङ्गो ओतादी ब परमेस्वरए तोबो ब

मारामें:व। ७होए जेडैताव जेचेम आ: लिङ्या लिन्या ब सैङ्याव। है जैद काताल ज़ ताछे:च्यो। कुधु बिङ्या- राकिन होए जेलाई घेप्पा रें:चिङ्याव।

८“है जैद डा जेलाई है डादाचिङ्या, जोए मिंराए डाक ओलाज माहुद ‘डा येसुसकाव ज़’ है लिङ्या, डा मिं मिन्सिउए ब नोलाई परमेस्वरए ओचाकज्याराए याडाक ‘डासकाव ज़’ है लिन्या डाले। ९फरी जोए मिंराए डाक ‘डा येसुसकाव मा:क’ है दाङ्याव, डा ब परमेस्वरए ओचाकज्याराए याडाक ‘आव डासकाव मा:क’ है दान्या डाले। १०जोए डा मिं मिन्सिद हुवए डाडैत माचाहिउ पाँर भा:द डामिन बले:ज्याव, होए ओपाप क्यालो दैसिए। खाली जोए परमेस्वरए छैव उपुरूसए उमिन बले:दिङ्याव, नो पाप क्यालो मादैसिए। ११है जैद जेलाई धर्मसास्त्र फिमलाव स्रेर, घेप्पा घेप्पार सोनो हाकिमराए याडाक यालाँचिकिन, नो बेलाक ‘डा नोरास काता पाँन्या, काता जवाप यान्या ओताव?’ लिद जेयुँ आँचा पाँचा ताजैच्यो। १२नो बेलाक परमेस्वरए छैव उपुरूसए जे काता पाँन्या ओल ज़ पैन्या ले।”

मुखर् धनी मिंए ओघर्ती

१३हा:त ज़ नो माहोल्यारानी तोबोए येसुलाई, “गुर्बा, डादाज्युलाई

‘नभाइस जिनबताहा भा:चिन्के’ है दादचाँसाँ,” है ओदोक ते, १४येसुए, “डा जेत्याला जैसिद जिनबताहा भा:दचान्या डा डायेन मा:क,” है दाद, १५नकाव लिङ्यावरालाई प्राईंलाई ज़, “प्राईंनिकाव लोभनी जोगोइसिद लिच्यो। जती उलिदी ब मिंए उजिउलाई धनए साचो जुनी माएधुव,” है लिद, १६घर्ती तोबो भा:द याएक्यो — “तोबो धनी मिंए ओएँ:लाव ज़्यावर बनै सैद, १७उयुँल उयुँल, ‘आ:काव डाज्यावर कान्ल डाससुई:के?’ लिद, १८‘बुरू डादहरा बुम भरी उफारैद प्राईं नल ज़ भा:द, १९डाक्याँलाई, कुधु बर्स पै चाव चाव ज़्याद ओद थाँतस लिन्के, है दान्या डाले,’ है लिके दी। २०नो उयुँलाव पाँ परमेस्वरए सैद, ‘ए मुखर्, काता नपाँज्याव इताव? आछिम रील ज़ नस० हाइद डाईरिङ्या। नो नदुपो भरी सुए उज्युरिङ्याव?’ है दोक्यो दी।

२१“है जैद जोए ओधन सम्पती परमेस्वरए ल्योदा मादुप्द ओल उजूनी वाज़ दुप्ज्याव, नो आव घर्तीलाव मिं स्यासो तान्या ले।”

व्रीनी फुइ मालिन्या

(मत्ती ६:२५-३४)

२२नकिन येसुए उसिसरालाई है यादोक्यो, “है जैद डा जेलाई ब

है डादाचिज़्या, जे जेक्याँए उजूनी 'काता डाज्युके, काता डाक्वाइ-सिके?' लिद व्रीनी फुइ तालिच्यो। २३ आव गेजिउ ज़्यान्या क्वाइसिन्याए जूनी वाज़ माःक। २४ कारालाई याराचिऊचिके। नोराए धुर ब माभाःर, क्याःन्या ब माक्याःर, ज़्याव ब मादुपर। हितावत ब चाहिज़्याव भरी परमेस्वरए जोरैद याएज़्याव। परमेस्वरए जेलाई भन बाज़ाराकिन घेप्पा रेंःचिज़्याव।

२५ "जेनी सुए ची सोगो दाद जेजिउत तघन्ता जेचाःधुरिज़्याव? २६ निताव तकेज़ा येन जेमादोधुकिन जे काराव व्रीनी फुइ जेलिज़्याव? २७ वासर ब याराचिऊचिके। नोराए धामा दाद माखलर। हितावत ब सोलोमन राजा बनै तह महौ ओजैसिदी ब वास तकल माताए। २८ परमेस्वरए आछिम वैद पराःती मेंःल बाज़्याव छीर नाः चाव याजैज़्याव ल्यो ताकिन जेलाई भन कै जैद माक्वाइचिउके? काता नाः जेयुँ माहुबोर जेलिज़्याव! २९ हिताव ज़ जे 'काता डाज्युके, काता डाओके' लिन्यादा जेयुँ थू जैद व्रीनी फुइ तालिच्यो। ३० आव भरी ते परमेस्वरलाई मासरेस्ज़्याव मिँराए याध्यावना ची। जे जेजूनी

चाहिज़्याव भरी ते परमेस्वर जेबाबुए सैज़्याव। ३१ है जैद जे परमेस्वरए ओराज्या खिम्चिके। हो ताकिन ची जेलाई चाहिज़्याव भरी ओल ज़ जोरैदयाचिरिज़्याव।

३२ "है जैद जे ज़िम्ज़ा डाबगालर, ताछेःच्यो। जेलाई जेबाबु परमेस्वरए ओल ओराज्या खुसीस यान्या युँ दाद नैव। ३३ जे जेसम्पतीर योःद माल्यो-रालाई भाःद याराएचिके। स्वर्गताव खर्क ज़ माचिस्न्या जेस्याकलर रूप्द नैचिके। नलाव जेदुपो धन कै मै ज़ माताए। चोरराए ब मालाँधुर, घुनराए ब माज़्युधुर। ३४ काराव ल्यो ताकिन जोड जेधन लिज़्या, जेयुँ ब होड ज़ तान्या ले।"

सैसिद लिन्या

(मती २४:४५-५१)

३५ "जे जेवाँःफोर पोःसिद बत्तीर तैःद भाःसिद लिच्यो। ३६ भत्यारल बाव तोबो धनी मिँए ओयेन दाज़्याव मितावर जैसिउ ताके। नोर जो बेलाक तादी ब याघरपती हुद ग्राम कोतो कोतो ओजैहुव प्राइँना फैदिज़्यार। ३७ सैसिद लिद ओयेन यादोज़्याव याघरपतीए ओरादैहुकिन नोर असिक दैवर तान्या लेर। डा साचो

है डादाचिज़्या, नो याघरपतीए ओल ज़ भन ओवाँ:फोर पो:सिद ओयेन दाज़्यावरालाई सोचोइँद ज़्यावर भा:दयान्या ले। ३८ है जैद नो धनी मिँ आधा री उघर्किनावत उहुदी ब, उसँनाक उहुदी ब सैसिद यालिज़्याव ज़ ओरादैहुकिन नोर असिक दैवर लिज़्यार।

३९ “फरी आव ब सैच्यो, तोबो फ़िमए ओर्गेए ‘चोर आ: बेलाक हुरिज़्या’ लिन्या ओसैकिन भा:सिद लिद उफ़िम पा-व माएखेहो। ४० हिताव ज़ जे मनी सैसिद लिच्यो, काराव ल्यो ताकिन डा मिँ मिन्सिउ मनी जेमासैद उमँ:जानी ज़ डाहुरिज़्या।”

४१ हा:त ज़ पत्रुसए येसुलाई, “प्रभु, आव नपाँ गेजूनी वाज़ सै प्राइँए जूनी की?” है ओदोक ते, ४२ येसुए, “किताव तोबो धनी मिँए सतस दाज़्याव ओतह ल्यो ओनोकोरलाई उफ़िमलाव येन भरी उकुइत याद ओयेन दाज़्यावरालाई थिक बेलाक ज़्यावर यान्या जैद ओख्यानैक, ४३ नो नोकोर सतस येन ओदोज़्याव ओघरपतीए ओदैहुकिन नो नोकोर असिक दैव ज़ तान्या ले। ४४ डा साचो है डादाचिज़्या, नो ओघरपतीए प्राइँ ज़ उकुइत यान्या ले।

४५ “फरी नो नोकोरए, ‘डाघरपती हतप्त माहु’ लिद उधूँलाव लिज़्याव

बाँदा बाँदानीरालाई प्रोद, ओल ज़्याद ओद मँ:ए मँ:ए ओबारिज़्याक, ४६ ओमासैद ओघरपतीए ओदैहुकिन, नोलाई चम चम जैद यारुँ माहुपज़्यावर ओराख्याज़्याव पोल ख्यान्या ले।

४७ “जोए ओघरपतीए ओयेन सैद ब मादोव नो कुधु प्रोसिनिन्या तान्या ले। ४८ जोए मासैद प्रोसिनिन्या मिताव येन दोज़्याव हो छ्यावा वाज़ प्रोसिरिज़्या। जोलाई कोसै यासिउ लिज़्या होए कोसै ज़ सोवोलो परिज़्या। फरी जोए कोसै जिम्बा दैद नैव होए कोसै ज़ बुभैव परिके।”

येसुए ओपाँए मिँरालाई याफातैज़्याव

(मत्ती १०:३४-३६)

४९ “डा डापाँए आव मानुवात में: लैना डाहुव मिताव लिज़्या। नो डायेन चाँदो ज़ ओखेम्किन ताखेहो है डालिज़्या। ५० खाली नोकिन डादा तोबो दुखल गदिउ परिन्या लिज़्या। नो ओमायो-वा पै डारुँ धो थाइव ताज़्या। ५१ जे डालाई ‘आव मानुवाताव मिँरालाई सखैना उहुव ताखेहो’ है जेलिज़्याखेहो। आव डापाँए भन मिँरालाई याफातैरिज़्याव। ५२ अबकिन तोबो फ़िमलावर पाँच जना यालिकिन स्मोम्लो तँदा नेब्लो तँदा तान्या लेर। ५३ ज़ा बाबुनी ब

माखैद ओजा तँदा ओबाबु तँदा तान्या लिनी। हिताव ज़ ज़ा-मा तादी ब, फुबु भदैं तादी ब, या याल माखैव तान्या लेर।”

बेलाए ओसरेसर

(मती १६:२-३)

५४ येसुए माहोल्यारालाई ब है यादोक्यो, “जे आव गेपोल बादल पछचुंनी उहुज़्याव जेरें:क ‘नम वान्या ले’ लिद जेथ-रैज़्या। हिताव ज़ ताज़्या। ५५ दखिननी बतास उहुज़्याव जेरें:क ‘आछिम बनै घाम तारिज़्या’ है जेलिज़्या। हिताव ज़ ताज़्या। ५६ ए कैफतीर, नाम नमलाव सरेसर ते जेथ-रैज़्या, कै जैद आखकाव बेला ताकितर जेमाथ-रैधुज़्याव?

५७ “ओलेखा ल्योलाई भन कै जैद जेमाप्राल्धुज़्याव? ५८ नँलाई तोबो नजगज्याए अदालतदा ओलॉनिक होड माकेस्द येमक ज़ नोस खैन्या उदिम दाव ताके, मानी नोए न्याधिसए ल्योक सकेस्निरिज़्याव। न्याधिसए पुलिसलाई सँपिद, पुलिसए फरी भयालखानाल भा:निरिज़्याव। ५९ साचो ज़, नल नपरिकिन तपैसा तादी ब ओपो-स ज़ नमाफो-वा पै पुलुसो दैन्या नमाले।”

उयुँ माफकैज़्यावलाई ओछ्यास लिज़्या

१३ हो बेलाक तोबो नेब्लो हुद येसुलाई, “पिलातसए मार पल्हुज़्याव गालीललावरालाई सै:द होराए याभी मारए उभीस बरे-केर,” है यादोक ते, २ येसुए नोरालाई, “नोर निताव दुखस यासिउए ‘यादेसलाव भरिरानी प्राइँरानी पापीर ज़ याल्यो ओल्यो’ है जेलिज़्याखेहो। ३ डा ते निताव ते मा:क है डादाचिज़्या। हैदी मनी जे परमेस्वरए ल्योदा जेयुँ जेमाफकैकिन फाल्न्या छ्याम जेलाई ब नो मिताव ओछ्यास लिज़्या। ४ हिताव ज़ फरी नो यरूसलेमलाव सिलोआम धरर धलिद अथार जना नल यासिक, नोरालाई ब ‘यरूसलेम भरिनी अपराधीर ज़ ताखेरहो’ है जेलिखेहो। ५ डा फरी हिताव ते मा:क है डादाचिज़्या। हैदी ब परमेस्वरए ल्योदा जेयुँ जेमाफकैकिन फाल्न्या छ्याम जेलाई ब नो मिताव ओछ्यास लिज़्या,” है यादोक्यो।

ओसै माभा:ज़्याव सीए ओघर्ती

६ नकिन येसुए नोरालाई तोबो घर्ती भा:द यासथैक्यो, “तोबोए ओएँ:ल



कोराली तोबो रूपिद ओनैज़्याव। तछा ओसै उचिऊनाक ते मादैक्यो दी। ७नकिन ओयेन दाज़्यावलाई, 'आव कोरालीलाई धलैके। स्रोरिम ताके सै ज़ मासैए, एँ: वाज़ छ्या-ज़्याव,' है ओदोक ते, ८ओयेन दाज़्यावए, 'थारे सायेब, आइँसी पै नैव ताके। ओजरा जीदा घोद मलर भा:द डाएरिज़्या, ९कसा मासैए। ना:त ब ओमासैकिन नधलैया,' है दोक्यो दी।”

येसुए न्नासिन्या छ्याम तोबो मेंमालाई ओसगराँव

१०तछा येसुए न्नासिन्या छ्याम धर्मसास्त्र फ़िमक परमेस्वरए ओपाँ ओरासथैज़्याक, ११नल तोबो थ० मालिधुज़्याव घोंत्यानिसो मेंमा उलिज़्याव। नोलाई माचाव पुरूसए नै ओजैव अथार बर्स ताद उलिज़्याव। १२येसुए नोलाई रँ:द ओल्योक खुल्द, “अ माँ आछिमकिन आव नदुखनी नरास्सिके,” है दाद, १३नोए ओक्याँत उकुइ नैद ओयो प्राइँना सोजोकाव ज़ ताद परमेस्वर-लाई बनै घ्यो:व ज़ थरैद उमिन सघ्यो:दिक्यो।

१४हा:त ज़ नो धर्मसास्त्र फ़िम

चलैज़्यावए न्नासिन्या छ्याम येसुए नो मेंमालाई ओसगराँव रँ:द बनै रसिद नक लिज़्यावरालाई, “येन दान्या छ दिन जैसिउ लिज़्या। सगराँसिन्या ताकिन ना: भरिल ज़ सगराँसिहुच्यो। न्नासिन्या छ्याम मा:क,” है ओरादोक ते, १५प्रभुए नोलाई रँ:द, “ए कैफतीर, जे न्नासिन्या छ्याम जेघें जेगधाहारालाई बँनी पला:द री जेरासवैनाज़्याखेहो सानी। १६फ़न आव अब्राहामए ओथोलाव सैतानए अथार बर्स पै किद ओनैज़्याव मेंमालाई कै जैद न्नासिन्या छ्याम मापला:न्या?” है यादोक्यो। १७निताव ओपाँए ओलकिन तँदा जैसिउ भरी लाज मोर्नो ज़ ताकेर। माहोल्याराए ते येसुए अचम्बलाव ओयेन रँ:द यायुँ होलाँ ताद रेंकेर।

बाजीए उधुर

(मत्ती १३:३१-३२; मर्कूस ४:३०-३२)

१८है जैद येसुए नोरालाई, “परमेस्वरए ओराज्या किताव उलि-ज़्याव, कितावनी पलास्द डायचिके लिक ते, १९परमेस्वरए ओराज्या तोबो बाजीए उधुर स्यासो लिज़्या। बारील भा:किन परीद ओघ्यो:वत नमताव



भुज्याव बाज़ार सिपर जैद ओखारत बासिज़्यार।”†

भरेस सोगोइन्या वासः

(मत्ती १३:३३)

२० फरी येसुए, “परमेस्वरए ओराज्यालाई डा कातास डागोईकें ल्यो ताकिन, २१ परमेस्वरए ओराज्या भरेस सोगोइन्या वासः स्यासो ब लिज़्या। सों:सेमे मुछिसिउ कनेल तोचोप भाःदी ब प्राईं सरालिज़्याव,” है लिके।

चूव ग्राम

(मत्ती ७:१३-१४, २१-२३)

२२ येसुए नाखार नाखार, सहर सहर जीदा परमेस्वरए ओपाँ सथैए सथैए यरूसलेमदा ओबाज़्याक २३ येमक तोबोए, “प्रभु, अजम्बरी जुनी दैन्यार छ्या वाज़ यालिज़्याव सा?” है ओदोक ते, २४ येसुए, “चूव ग्रामनी पसिन्या जोर दोच्यो। कुधु पसिउ पैज़्यावर पसिधुन्या मालेर। २५ फ़िमए ओर्गेए ग्राम ओगलो छीनी जेबाकिन लाँ:क च्याँ:सिद, ग्राम कोतो कोतो जैद, ‘प्रभु, गेलाई ग्राम फैदद्या-सिके’ है जेदोकिन, फ़िमए ओर्गेए,

‘जे काताडावर, डा डामासरेस्चिए,’ है दान्या ले। २६ जे फरी, ‘गे नँस ज्युज़्यावर ज़, नसथैसिज़्याव नाखार-लावर ज़,’ है जेदोकिन, २७ ओल फरी, ‘जे काताडावर, जात्त ज़ डामा-सरेस्चिए। जे पापीर आनी पुलुस्द बाचिके,’ है दान्या ले। २८ हाः बेलाक जे अब्राहाम, इसहाक, याकूब सोनो अगमबक्ता भरी परमेस्वरए ओराज्याल यालिज़्याव रँ:न्या जेले। जे फरी, ‘गे ते लाँ:क लिन्यार ची गेताव ओल्यो’ लिद जेहार डर डर कैद चिर्लनी बिर्ल घर्न्या जेले। २९ हो छ्याम मिँर आव संसारलाव चार कोन्यानी हुद परमेस्वरए ओराज्यालाव भत्यारल चुसिन्या लेर। ३० नो भरिनी ख्वा ख्वा ड़ात लिज़्यावर छींत तारिज़्यार, छींत लिज़्यावर ड़ात तारिज़्यार।”†

यरूसलेमए उजूनी येसुए उयुँ

माचाव ओजैव

(मत्ती २३:३७-३९)

३१ नाः बेलाक ज़ फरिसीर तोबो नेब्लो हुद येसुलाई, “हेरोद राजाए नँलाई सैःव पैज़्याव, नँ आनी पुलुस्द बाव ताके,” है यादोक ते, ३२ येसुए, “नो स्याललाई है दोनाचिके,

† १३:१९ मर्क ४:३०-३२ चिऊन्या। † १३:३० मत्ती १९:३० चिऊन्या।

‘तछा नेला पै माचाव पुरूसर पलेद यासगराँरिऱ्याव दी। नकिन ओयेन भरी तुपिन्या ले दी।’ ३३ जुनी तादी ब नेला सोंलात डाबान्या पोड माकेस्द माताए, मानी अगमबक्ता यरूसलेमल मासिद काड्डु उसिरिऱ्याव?

३४ “ए यरूसलेमलाव मिँर, कै जैद अगमबक्ता भरिरालाई जेरासैऱ्याव, जेल्योक परीसितरालाई ब लुँ लुँए जेराभेऱ्याव? बामाए ओचर्ल्यानीर ओकर धूँल ओरादुऱ्याव मिताव, डा ब जेलाई कुधु पाला ज़ डाल्योदा पाथस दुपो डापैके, खाली जे ते जेमाभैऱ्याव। ३५ है जैद जेभिम रितो ज़ तारिऱ्याव। डा जेलाई है डादाचिऱ्याव, आकिन ते ‘परमेस्वरए उमिनताव हुऱ्याव धन्याकाव ओताक’ है जेमादाँवा पै डालाई फरी रँऱ्याव जेमाले।”

नासिन्या छचाम तोबो गोवलाई ओसगराँव

१४ नासिन्या छचाम येसु तोबो फरिसीराए याघेप्पाए उभिमक काँ ज़्युना बाके। नक छुत फरिसीर पाला येसुए उचिवाऱ्याव यालिऱ्याव। २ नल गोऱ्याव बेथाए क्योःद ओनैऱ्याव तोबो मिँ ब येसुए

ओडाक चुसिद उलिऱ्याव। ३ हाःत ज़ येसुए नलाव लिऱ्याव फरिसीर सोनो कानुनलाव यागुर्बारालाई, “नासिन्या कानुनलाव यागुर्बारालाई, “नासिन्या छचाम याजोरो हुवरालाई मासगराँन्या कानुन उलिऱ्याव रो?” है ओरादोक ते, ४ सु ज़ यामापाँधुवए येसुए नो ओजोरो हुवलाई छाप्द याडाक ज़ सगराँद ननी परीद, ५ नलाव लिऱ्याव-रालाई, “जे नासिन्या छचाम जेज़ा तादी ब जेघें तादी ब भल्खादाल ओतेकिन होल ज़ जेनैऱ्याव सैं जेहाइ-ऱ्याव?” है ओरादोक ते, ६ येसुस सु ज़ मापाँधुकेर।

यानी सघ्योःसिऱ्यावर

७ नकिन येसुए नो भत्यारल खुल्सिउ पाहुनाराए ओमान ल्यो पो याखिमऱ्याव रँःद अइ लिद घर्ती तोबो भाःद याएक्यो, ८ “बिह्यालाव भत्यारल जेलाई सुवाराए याखुल्चिकिन ओमान ल्यो पो ताखिमऱ्याव। नँकिन घेप्पा मिँलाई ब खुल्द ओनैऱ्याव ताकिन, ९ नो भत्यारल खुल्ऱ्यावए, ‘नँ आवलाई पो रास्दचाव ताके,’ है दान्या ले। ननी मेकसै ओसारैनिकिन लाज मोर्नो तान्या नले। १० बुरू डादा ज़ प्राइरानी ओछचोडाव पोड चुसिउ ताके। हो ताकिन ची भत्यारल

खुल्ल्यावए, ‘अ डानै, जाँ रोकसै हुन्के,’ है उदीकिन प्राइँराए ड़ाक नइज्यात रहिन्या ले। ११ है जैद जो ओलनी सघ्योःसिज़्या, हो ज़िमिज़्या। फरी जो ओलनी सज़िमिसिज़्या, हो घ्योःरिज़्या।”

काता ज़ माल्योरालाई यान्या

१२ नकिन येसुए ओललाई काँ ज़्युना खुल्ल्यावलाई ब है दोक्यो, “नँ भत्यार जैद मिँरालाई नराखुल्क नक्याँदाडावर, नदाज्यु भाइर, ननै मेंर स़ोनो घेप्पा मिँर वाज़ ताराखुल्यो। मानी नोराए फरी नँलाई ब भत्यारल खुल्द नलोइ फोःन्या लेर। १३ बुरू भत्यार नजैक काता ज़ माल्योर काना दूँदारालाई दुप्द याज़्यास्के। १४ नोराए नलोइ यामाफोःधुवए नोए ओपोल असिक दैन्या नले। धर्मीर सैसिद यासोव छ्याम परमेस्वरए ल्योनी नलोइ दैन्या नले।”

घ्योःव भत्यारए ओघर्ती

(मत्ती २२:१-१४)

१५ हाःत ज़ नो भत्यारल लिज़्याव-रानी तोबोए, “साचो ज़ प्रभु, परमेस्वरए ओराज्यालाव भत्यारल ज़्याव दैज़्याव ओभागी ल्यो ज़,”

है ओदोक ते, १६ येसुए अइ लिद घर्ती तोबो भाःक्यो, “तोबो मिँए तछा बनै घ्योःव भत्यार जैद कुधुलाई याखुल्क्यो दी। १७ ज़्याव भरी ओतावत तोबो ओनोकोरलाई नो है ओरादोव भरिलाई खुल्नाव परीक्यो दी। नो बाद, ‘ज़्याव भरी ताधुके, हुचिके दी,’ है ओरादोक ते, १८ नोराए तोबो तोबो निउँ जैद, उस०कतावए, ‘डा एँः तोथो लँःद डानै, नो एँः डाचिऊनारिज़्या। है जैद ‘माधाःए दी’ है दोयो।’ १९ हुकिनकावए, ‘डा घेंर पाँच हल लँःद डारानै, नोरालाई बिचारिना डाबारिज़्या। है जैद ‘माधाःए दी’ है दोयो।’ २० प्राइँरानी छीनीकावए, ‘डा भर्जा ज्या रैद डानै, है जैद ‘माधाःए दी’ है दोयो।’

२१ “है जैद नो ओयेन दाज़्याव ओघरपतीए ल्योक बाद किताव है यादोव हिताव ज़ है दोक्यो। नो घरपती रसिद, ‘हो ची ताकिन्दा नँ चाँदो बाद सहरलाव दोहा जीलाव गरीब गुरूवा, काना दूँदारालाई खिम्द यारैके,’ है ओदोक ते, २२ नो ओयेन दाज़्यावए ओघरपतीए है ओदोव मिताव मिँर रैद, ‘है नदाँव मिताव मिँर रैद डारानै। हैदी ब पो लिज़्या,’ है ओदोक ते, २३ ओघरपतीए फरी,

‘येम जीलावर काना कुनी जीलावर काचाबुल घराऱैयो, डाफिमल घब्यालरक,’ है दाद, २४ ‘डादाडाव खुल्लिसउराए डाभत्यारल तके ब दारो तादैरक,’ है दोक्यो।”

येसुए उसिस जैसिन्या

(मत्ती १०:३७-३८; ५:१३; मर्कूस ९:५०)

२५ हा: बेलाक येसुस ल्यो माल्यो मिँर उछीं उछीं याबाऱ्याव। येसु नोराए ल्योदा भाल्लिसद अइ लिद यासथैक्यो, २६ “जो डास हुव पैऱ्याव, होए ओबाबु ओआमा, ओज्या ओजा, ओदाज्यु भाइ, ओनाना बैनीर सोनो उजिउलाई डाकिन कोसै मया ओरादोकिन, हो डासिस तान्या माले। २७ डाजूनी क्रुसत सिन्या मिताव दुखर सहिउ माभै:द डाछींत ओमाहुकिन हो ब डासिस तान्या माले। २८ हिताव ज़ जे फ़िम तोबो जेजैक ‘आ: लागिरिऱ्या’ लिद डादा ज़ हिसाप जेदोऱ्या। २९ हिसाप मादाद गज वाज़ थालिद ओमातुपैधुकिन मिँराए नोलाई हसैद, ३० ‘मातुपैधुन्यालाई ज़ काराव ओथालिउ?’ है लिन्या लेर। ३१ हिताव ज़ तोबो राजाए ब छुत राजास लरें ओताकिन डादा हुनी हुऱ्याव बीस हजार मिँरालाई दस हजार मिँरास गेमाराखेपैधुके लिद, उधूँलाव घेप्पा घेप्पारास सल्ला दोऱ्याव।

३२ नोरालाई माहारैधुन्या मिताव ताकिन नोर तादाड यालिऱ्याक ज़ सखैन्या मिँर यापरीऱ्याव। ३३ है जैद जे ब जेस लिऱ्याव भरी जेमारास्थुकिन डासिस तान्या जेमाले।

३४ “सापी चाव ज़ लिऱ्या, खाली ओदार ओमालिकिन नोलाई कै जैद ची ओदार ल्यो जैन्या। ३५ नोलाई एँ:ल भा:द ब माताए, मलल भा:द ब माताए, ख्यान्या वाज़ ताऱ्या। आव डापाँ जोए थैन्या उयुँ लिऱ्या, चावस ओथैवक।”

डोइव बेधाए ओघर्ती

(मत्ती १८:१२-१४)

१५ येसुए ल्योक सिर्मा स्योऱ्यावर सोनो पापीर कुधु ज़ ओपाँ थैना याहुऱ्याव। २ हिताव रँ:द नकाव फरिसीर सोनो सास्त्रीराए, “आवए कै जैद निताव पापीरालाई सुम्द नोरास उऱ्युऱ्याव?” है लिद रूम्रूमैकेर। ३ येसुए नोराए यापाँ थैद अइ लिद घर्ती तोबो भा:द याएक्यो, ४ “तोबोए ओबेधार तसय यालिकिन, ननी तोबो ओडोइकिन उनान्सयलाई बनल ज़ ख्यानैद नो डोइवलाई ओमादैवा पै खिम्ऱ्याखेहो। ५ नोलाई ओदैक रेंए रेंए ओधेंल छींद, ६ ओबासक रैद ओनैरालाई खुल्द, ‘आव माव डाबेधालाई डादैके।

जे ब डास रेंचिके,' है दान्या ले। ७ डा साचो है डादाचिज़्या, परमेस्वरस खैव उनान्सयराकिन तोबो पापी ओपाप रास्द परमेस्वरए ल्योदा उहुकिन नोलाई रें:द स्वर्गत बनै रेंन्या लेर।”

चाँदीए सिक्का समैव मेंमा

८ “फरी हो मिताव ज़ तोबो मेंमाए चाँदीए सिक्का दस गोता उलिकिन, ननी तोबो ओसमैकिन नोलाई ओमादैवा पै में: तै:द भिम सीद खिमो ज़ नैज़्याव। ९ ओदैवत ओनैरालाई खुल्द, ‘डा नो डासमैव सिक्का डादैके। जे ब डास रेंचिके,’ है दान्या ले। १० हो मिताव ज़ तोबो पापी परमेस्वरए ल्योदा उहुकिन परमेस्वर मनी ओचाकज्यारास बनै रेंन्या लेर।”

ओबाबुए ओपैसा ओदोइद हुव छोज्या

११ “हो मिताव ज़ फरी तोबो मिँए ओज़ानी दुई भाइ निल्यो दी। १२ ओभाइए ओबाबुलाई, ‘बाबु, डालाई डाबताहा भरी याव ताके,’ है ओदोक ते, ओबाबुए ओज़ानिलाई सु सु निबताहा निएक्यो दी।

१३ “हुकिन जाँवाक नोए उजुँ भरी यो:द पैसा भरी दुप्द तादा देसदा बाके दी। होड बाद ओमन लागिउ येन दाद

ओपैसा भरी ओदोइक्यो दी। १४ प्राईँ ओखेमोत नो देसल बनै घ्यो:व अनिकाल हुद नोलाई माथैक्यो दी। १५ है जैद नो देसलाव तोबोए ल्योक बाद, ‘नँस येनर मादैसिके’ है ओदोक ते, नोए ऊ गावला जैक्यो दी। १६ ऊ गावला उलिज़्याक ओकरेए माधुद ऊराए यापुल ब ज़्याव पैक्यो दी। नोलाई सुए ज़ काता ज़ यामाएज़्याव दी।

१७ “बल्ल बल्लड ओचेतर फर्किद, ‘डाबाबुए उफिमलाव ओनोकोरर ते याफू तसी ज़्याद ब सयेल्ज़्यार। डा ताकितर करे करेए डाघ्याज़्या। १८ माताके ब, डाबाबुए ल्योदा ओल्द बाद ची, ‘जेरो बाबु, डा परमेस्वरए उउपर्त स़ोनो नँ नउपर्त पाप डादोके। १९ अब ते डा नज़ा है लिन्या स्यासो ब डामाले। तोबो ननोकोरल गनिनाके,’ है डादचा ब,’ लिद, २० ननी पुलुस्द ओबाबुए ल्योदा बाके दी।

“ओबाबुए फिमकिन जाँ तादाड उहुज़्याव रें:द उयुँ नाद होड ज़ थो:नाद लापुद माईँ दोक्यो दी। २१ ओज़ाए, ‘बाबु, डा परमेस्वरए उउपर्त स़ोनो नँ नउपर्त पाप डादोके। डा फरी नज़ा है लिन्या स्यासो डामाले,’ है दोक्यो दी। २२ हा:त ज़ ओबाबुए ओनोकोररालाई, ‘आवलाई चाँदो ज़ प्राईँरानी चाव क्वा रैद जास्चिके, उकुइत कुइची, उखँत

पोला ब जास्चिके। २३ प्राइरानी सोइव मार तोबो रैद सैःचिके। बनै चावस ज़्याद ओद गेरेंया। २४ आव डाज़ा सिउल गनिसिउनी, बाँचिद हुके, माव डोइवलाई डादैके,' है दाद भत्यार जैद बनै रेंकेर दी।

२५ "यामानिज़्याक ज़ जेथा ओज़ा ँःनी भर उहुज़्याव। फ़िमक ओकेस्हुक फ़िमल गित गैद यास्याज़्याव थैद, २६ तोबो नोकोरलाई खुल्द, 'आव काता याजैज़्याव इताव?' है ओदोक ते, २७ 'नभाइ हुद ले। सिउल गनिसिउनी बाँचिद उहुए नोए उजूनी नबाबुए प्राइरानी सोइव मार सैःक्यो,' है ओदोक ते, २८ नो बनै रसिद फ़िमल पसिउ माभैःके दी। है जैद ओबाबु ओल ज़ ओल्योक बाद फकैनाक्यो दी। २९ ओज़ाए माभैःद, 'डा आः बर्स भरी नबाँदा मिताव जैसिद नपाँ खर्क ज़ माख्याद नसेवा डादोके। हितावत ब डालाई डानैरास 'तोबो बाकरा बाली ब सैःद कैचिके' है नमादाँए। ३० फ़न निताव नसम्पती भरी पातर्नीरास ओदोइद हुव नज़ालाई ताकितर सोइव मार सैःद नएके,' है ओदोक ते, ३१ ओबाबुए, 'अ डाज़ा, नँ एकतार डास ज़ नलिज़्या सानी। डास लिज़्याव भरी नमीर ज़। ३२ आछिम आव नभाइ सिउल गनिसिउनी बाँचिद हुव,

माव डोइवनी दैसिउए उजूनी कै जैद मामानिन्या, कै जैद मारेंन्या?' है दोक्यो दी।"

ओबाथें ल्यो येन दाज़्याव मिँ

१६ नकिन येसुए फरी उसिस-रालाई तोबो घर्ती फ़ाःद है यादोक्यो, "तोबो धनी मिँए ओयेन चलैन्या मिँ तोबो ओनैज़्याव दी। नोए ओघरपतीए ओपैसा ओओदोइज़्याव छुतराए रँःद, धनीलाई है यादोक ते, २ नो धनीए नोलाई खुल्द, 'नयेन जाँ माचाव डाथैज़्या, नँसकाव हिसाप भरी डालाई याव ताके। आकिनी नँ आव येन दाव दैन्या नमाले,' है ओदोक ते, ३ नो येन चलैज़्यावए, 'डाघरपतीए आव डायेननी पले-नारिक्यो, डा कै लिन्या ओताव? कीन्या घोन्या डार्सा माले, निद ज़्यान्या डालाज हुज़्या। ४ है जैद आनी ओपले-नावत मिँराए डालाई याफ़िमक नैन्याए जूनी तोबो बुद्धी पले-द अइ ची डाजैया ब' लिद, ५ ओघरपतीए उरिन लाँव भरिलाई तोबो तोबोनी खुल्द प्राइरानी ड़ातावलाई, 'डाघरपतीए ओकाछ नँस खा उलिज़्याव?' है ओदोक ते, ६ 'मास तसय गाधु लिज़्या,' है दोक्यो दी। 'हुकी नतुम्सुक रैकेदा, तसयकाव पचास वाज़ गिन्जैया,' है दोक्यो दी। ७ नकिन फरी छुतलाई

खुल्द, 'नँस डाघरपतीए ओकाछ खा उलिज्याव?' है ओदोक ते, 'गेदा तसय धु लिज्या,' है दोक्यो दी। 'हुकी नतुम्सुक रैकेदा, तसयकाव असी वाज़ गिन्जैया,' है दोक्यो।

८ "छीनी ओघरपतीए ओयेन भरी ओसँवत, ओबाथैनिकाव ओदोव सामा ते चाव ज़ रँ:क्यो दी। है जैद परमेस्वरए ओपाँताव मिँराए अजम्बरी जुनीए जूँनी यादोज्याव सामाकिन आव मानुवाताव मिँराए याजूनी वाज़ यादोज्याव सामा भन ज़ ओबाथै ल्यो रँ:ज्या।

९ "है जैद डा जेलाई है डादाचिज्या, जे ते आव मानुवाताव जेधनए बुरू जेनैर याराजैचिके। हो ताकिन ची सिन्या बेलाक पैसाए ओचाहित भरी ओखेमोत स्वर्गताव एकमन्या लिन्या पोल जेलाई सुमन्या लेर।"

परमेस्वरए ओसेवा सोनो पैसाए ओसेवा

१० "जोए तकेज़ा येनत सतस दोज्याव, होए घेप्पा येनत ब सतस दान्या ले। फरी जोए तकेज़ा येनत असत दोज्याव, होए घेप्पा येनत ब असत दान्या ले। ११ है जैद जे आव मानुवाताव धन असतस जेचलैकिन, परमेस्वरए ल्योडाव साचो धन कातानी जेदैरिज्याव? १२ जेलाई

यासिउ छुतए उमींलाई चावस जेमाचलैकिन, जे दैव परिन्या सुए ची ओयाचिरिज्याव? १३ है जैद तोबो बाँदाए नेब्लो साहुनी नियेन मादोधुव। दाव उपरिकिन नोए तोबोलाई सोद तोबोलाई चाव रँ:न्या ले, कितर तोबोए ओपाँ भै:द तोबोलाई ओलेखा नैदयान्या माले। हिताव ज़ जे मनी परमेस्वरए ओसेवा सोनो पैसाए ओसेवा तखेप्त जेमादोधुइ।"

१४ नकाव ओपाँ थैज्याव फरिसीर, यायुँ जम्मा पैसा कमैन्यादा वाज़ ओतावए येसुस या: दोकेर। १५ है जैद येसुए नोरालाई, "जे फरिसीर मिँराए डाक वाज़ धर्मी जैसिज्यावर, जेयुँलाव पाँ भरी परमेस्वरए सँज्याव। है जैद मिँराए घेप्पा यारँ:चिदी ब परमेस्वरए ल्योनी ते जेयेन युँ माजामो ज़ लिज्या," है यादोक्यो।

मोसाए ओकानुन सोनो परमेस्वरए ओराज्या

(मत्ती ११:१२-१३)

१६ "यूहन्नाए ओपालाक पै मोसाए ओकानुन सोनो अगमबक्तराए यापाँ उलिज्याव। हा:किन परमेस्वरए ओराज्यालाव पाँ हुद नल पसिन्या मिँर बनै छुइसिज्यार। १७ हैदी मनी नाम नम ओखेम्दी ब नो कानुनलाव पाँ तोबो ब खेर बान्या माले। १८ है जैद मोसाए

ओकानुनलाव सर्सिउ मिताव, तोबोए ओज्यालाई रास्द छुतलाई औरैकिन जारी येन ओदोव ज़ गनिसिज़्या। फरी ओरेलाई रासो मेंमालाई औरैकिन नो ब हितावल ज़ गनिसिज़्या।”

धनी मिँ स्रोनो लाजरस

१६फरी ब येसुए घर्ती तोबो भाःद है यादोक्यो, “तोबो धनी मिँ चाव चाव ज़्याद चाव चाव क्वाइसिद दिनकाव ज़ बनै थाँतस उलिज़्याव। २०तोबो निद ज़्याज्याव लाजरस यादोज़्यावलाई दिनकाव ज़ नोए ओसाँबिलाक यारैज़्याव। नोए ओक्याँ भरी खतेरा वाज़ उलिज़्याव। २१नोए ओखतेरार काःराए लेप्हुद याएज़्याव। नोए ‘नो धनी मिँए ओसतेवर ज़्याव डादैकिन ताखेहो’ लिद आस ओदोज़्याव।

२२“तछा नो निद ज़्युज्याव लाजरस सिके। उसिउ प्राईना ज़ परमेस्वरए ओचाकज्यार हुद छींद स्वर्गताव अब्राहामए ओल्योक लाँकेर। फरी नो धनी मिँ ब सिके। मिँर हुद लाँद गादैनाकेर। २३नो मिँ नर्गल बाद नलाव मेंःए ओसचप्क नमदा ओभाल्सिक नो लाजरस अब्राहामस उलिज़्याव रँःद, २४अइ लिद बनै चोइस क्रिके, ‘अ अब्राहाम बाबु, डालाई नयुँ ओनाक। नँस लिज़्याव लाजरसलाई ओआडुला रील भाःद डासेत सथेपदचान्याए

जूनी परींदचाँके। आव मेंःए सचपद धो सहिउ ताद डाले,’ है ओदोक ते, २५अब्राहामए, ‘अ बाबुज़ा, नँ मानुवात नलेवा भरी बनै थाँतस नलिके, अब ते नल दुखस नलिज़्या। लाजरस ते बनै दुखस लिके, अब ते सन्चस लिज़्या। २६फरी नँस गेखार्ल बनै घ्योःव भल्खादा नैसिउ लिज़्या। है जैद गे नल्योदा हुव गेपैदी ब गेमाहुधुइ, नँ ब गेल्योदा नमाहुधुइ,’ है ओदोक ते, २७नो धनीए, ‘हो ची ताकिन्दा बाबु, नँस डाबिन्ती लिज़्या। नोलाई डाबाबुए उक्किमदा परींदचाव ताके। २८डाभाइर पाँच जना लिज़्यार। नोरालाई घरासथैनावक, मानी आव डापरिउल परिन्त्या ओछ्यास लिज़्या,’ है ओदोक ते, २९अब्राहामए, ‘नोर नल मापरिन्त्याए जूनी यास मोसाए ओकानुन ब लिज़्या, अगमबक्ताराए यासरो पोस्तोको ब लिज़्या। नो ज़ ओथैरक,’ है दोक्यो। ३०नो धनीए फरी, ‘हिताव ते माता, अब्राहाम बाबु। तोबो सिउनी बावए है ओरादोकिन वाज़ परमेस्वरए ल्योदा यायुँ फर्केन्त्या लेर,’ है ओदोक ते, ३१अब्राहामए, ‘मोसाए ओकानुन स्रोनो अगमबक्ताराए यापाँ यामाभैःकिन सिउनी सैसिद बावए ओपाँ कातानी याभैःरिज़्याव?’ है दोक्यो।”

सम्जैन्या पाँर

(मत्ती १८:६-७, २१-२२; मर्कूस ९:४२)

१७ येसुए उसिसरालाई, “पापल पारैन्या पाँर ते जुनी ब हुन्या ज़ लेर, खाली निताव पाँर पले-ज़्यावलाई थैए माँतकन ज़ लिज़्या। ^२जोए आव मिताव ज़िम्ज़ारालाई पापल ओरापारैकिन, नितावलाई ते बुरू ओधेंल राँथै सुदर्चाद समुन्द्रल ख्यान्या पाथ लिज़्या। ^३है जैद जे ननी जोगोइसिद ल्यो ताके।

“ननैए निताव पाप ओदोऽयाव नरँ:किन नोलाई सिडारो ताके। नसिडार्क ओपापनी ओओल्किन नोलाई रासो ताके। ^४फरी नँ नउपर्त तछात ज़ सात पाला मादान्या येन दाव येन नँस खैहुव येन ओदोदी ब, नोलाई ब रासो ताके,” है यादोक्यो।

युँ हुन्या

^५फरी येसुए ओसाचीराए ओललाई, “अ प्रभु, परमेस्वरए ओपाँत गेयुँलाई भन ज़ सुहुपदचासियो,” है यादोक ते, ^६येसुए, “परमेस्वरए ओल्योदा बाजीए ओसै हावालित तादी ब जेयुँ जेसुहुप्किनी तोबो बनै घ्यो:व रूम्बू सींलाई ‘भोस्द समुन्द्रल

रूपिसिनान्के,’ है जेदोकिन जेपाँ भै:न्या ले।”

बाँदाए दान्या येन

^७“जेनी सुए ची जेबाँदालाई एँ: कीन्यानी तादी ब बेधा छोन्यानी तादी ब, उहुव प्राइँना ज़्यावर जैद ओसेवा जेदोऽयादा? ^८बुरू उहुव प्राइँना नोलाई, ‘नँ नक्वर फेरैसिद ज़्यावर जैद डालाई रैदचाँकेदा, डा ज़्याद डाखेमोत नँ ब नज़्युया,’ है ची जेदोऽयाखेहो। ^९है जैद नो जेबाँदाए है दासिउनी वाज़ ओदोवए नोलाई कातानी ची धन्याबाद जेएरिज़्याव? ^{१०}हिताव ज़ जे ब परमेस्वरए है ओदाचिउ भरी जेदोदी ब ‘गे ते असिक दैन्या स्यासोर गेमाले। गे ते है ओदासिउ येन दाऽयावर वाज़ ची गेल्यो ओल्यो’ लिद याका दोच्यो।”

दस जना कुरीर

^{११}येसु यरूसलेमदा ओबाऽयाक सामरिया सोनो गालीलनी निखाल्वाव घ्याँ ओबाऽयाव। ^{१२}तोबो नाखारल उपसिक कुरीर दस जना येसुस दैसिहुकेर। नोर जाँ अछतड च्याँ:सिद, ^{१३}“अ येसु गुर्बा, गेलाई नयुँ ओनाक,” है लिद याक्कि ते, ^{१४}येसुए नोरालाई रँ:द, “जे पुजारीराए ल्योक सतैसिना बाचिके,” है ओरादोक ते,



नोर येमत याबाज्याक ज़ प्राईं गरांकेर। १५नोर यागराँव सैंद तोबो वाज़ येसुए ल्योक ओल्द हुद, बनै चोइस क्रिद परमेस्वरए उमिन बनै सघ्योःदचाद, १६येसुए उखँत फुलुप्सिद धन्याबाद चरैःक्यो। नो मिँ सामरिया जातलाव ओल्यो। १७येसुए नोलाई, “जे गराँवर दस जना माःक रो? नँसकाव नौ जना काना याबाव?” है दाद, १८नकाव लिज़्यावरलाई, “काता, परमेस्वरलाई धन्याबाद चरैःन्या आव तोबो छुत जातलाव मिँ वाज़ उलिज़्याव रो?” है दाद, १९नो गराँवलाई, “च्याँःसिद चावस बान्के। डालाई नयुँ उहुबोए नगराँके,” है दोक्यो।

परमेस्वरए ओराज्या हुन्या बेलाकाव सरेसर

(मत्ती २४:२३-२८, ३७-४१)

२०फरिसीराए येसुलाई, “परमेस्वरए ओराज्या खर्क उहुरिज़्याव?” है लिद यासुधिक येसुए, “परमेस्वरए ओराज्या रँःन्या सरेसरास माहुइ। २१मिराए फरी, ‘आड लिज़्या, होड लिज़्या,’ है ब लिन्या मालेर। है जैद जे ज़ सैंच्यो, परमेस्वरए ओराज्या जेयुँल ज़ ताज़्या,” है यादोक्यो।

२२नकिन फरी उसिसरालाई, “तछा मिँ मिन्सिउलाई फरी तखेप रँःव गेदैकिन ताखेहो है लिन्या बेला ब हुन्या ले। हैदी ब रँःव दैन्या जेमाले। २३है जैद मिराए ‘आड लिज़्या, होड लिज़्या’ है यालिज़्यावड ताबाच्यो, नोराए यापाँ ब तापतिच्यो। २४किताव नमत बिजुली उमिल्किक प्राईंदा ज़ ज़गै ओजैज़्याव, हिताव ज़ डा मिँ मिन्सिउ ब प्राईंए रँःन्या जैद हुन्या डाले। २५खाली नोकिन ड़ादा दुस्वर सहिद आव बेलाकाव मिराए ल्योनी सोसी निन्या डातारिज़्या। २६डा मिँ मिन्सिउ डाहुन्या बेला, नोआए ओपालाकाव मिताव ज़ तारिज़्या। २७नोआए ओपालाकाव मिरँ ज़्याव ज़ यालिज़्याव, ओव ज़ यालिज़्याव, ज्यार रेर ब दाव ज़ यानैज़्याव। हाःत ज़ नोआ री जहाजल उपसिउ प्राईंना रीर ज्याल्हुद प्राईंलाई यागदैक्यो। २८लोतए ओपालाकाव मिरँ ब हितावर ज़ याल्यो। नोर मनी ज़्याद ओद यालिज़्याव, लँःन्यार लँःव ज़ यालिज़्याव, योःन्यार ब योःव ज़ यालिज़्याव, धुर ब भ्नाःव ज़ यालिःज्याव, भ्किमर ब जैव ज़ यालिःज्याव। २९खाली लोत सदोमनी उपुलुसो

† १७:२१ छुत बुभिन्या — परमेस्वरए ओराज्या जेखार्ल ज़ ताज़्या।

१७:१४ लेबी १४:१-३२ १७:२६ उत ६:५-८ १७:२७ उत ७:६-२४



प्राइंना ज़ परमेस्वरए नमतिन मेंः
सवाद याखेम्क्यो।

३०मिँ मिन्सिउ उहुन्या छ्याम
ब हिताव ज़ तारिज़्या। ३१“हे जैद
जे हो बेलाक थालात लिज़्यावए
ओधन सम्पती जोगोइन्याए जूनी
उफिमल तापसिक। हिताव ज़
एँःल लिज़्याव ब उफिमदा ओल्द
ताबाक। ३२लोतए ओज्यालाई याका
दोच्यो। ३३हे जैद जोए आव उजिउत
ओललाई तान्या वाज़ खिम्ज़्याव,
होए उजुनीलाई समैज़्याव। फरी जोए
आव जुनील उजिउए मया मादोव,
होए उजुनीलाई बाँचैज़्याव। ३४डा
जेलाई है डादाचिज़्या, हो बेलाक,
रील तोबो तैत स्याँद लिज़्यावनिलाई
तोबोलाई लाँरिज़्याव, तोबोलाई
ख्यानैरिज़्याव। ३५हिताव ज़ फरी
राँथै हेःज़्यावनिलाई तोबोलाई
लाँरिज़्याव, तोबोलाई ख्यानैरिज़्याव।
३६[फरी एँःल येन दाज़्यावनिलाई
ब तोबोलाई लाँरिज़्याव, तोबोलाई
ख्यानैरिज़्याव,] है यादोक्वो।

३७नकिन उसिसराए, “प्रभु, निताव
खा बेलाक, काङ्क ओतारिज़्याव?”
है यादोक ते, येसुए, “किताव खरल
ओताक वाज़ का गिदर हुज़्यार,
हिताव ज़ तान्या ले,” है यादोक्वो।

न्याधिसलाई ओर्च्या सैःदचाज़्याव
मेंमा

१८ तछा येसुए पोंखारिन्यात
यार्च्या मासैःन्याए जूनी
अइ लिद घर्ती तोबो भाःद याएक्वो,
२“तोबो सहरल परमेस्वरलाई रँःद
ब माछेःज़्याव, मिँरालाई ब उयुँ
मानाज़्याव तोबो न्याधिस उलिज़्याव
दी। ३नो सहरल ज़ फरी तोबो राँदी
मेंमा ब उलिज़्याव दी। नोए न्याधिसए
ल्योक बाद, ‘तोबोए डाउपत अन्याय
दाद नैव। नो सखैदचाव ताके,’ लिद
दिनकाव ज़ है ओदोनाज़्याव दी।
४नो न्याधिसए जाँवा भरी घाइ ज़
मादोक्वो दी। छीनी ते उयुँल उयुँल,
‘डा परमेस्वरलाई रँःद ब डामाछेःए,
मिँरालाई ब डायुँ मानाए। ५खाली
आव मेंमाए बनै डार्च्या सैःद ओयाँवए
आवलाई सखैदचाव ज़ ताके, मानी
घरी पाला हुद डार्च्या सैःदचान्या ले,
है लिके दी।”

६प्रभुए नाः है दाद फरी ब है
यादोक्वो, “जे नो अन्याय न्याधिसए
है उलिज़्याव चेतैच्यो। ७है जैद
परमेस्वरए ओराछाँतिउरालाई
धिलो मिताव ओरैःदी ब लाकनी
रील यापोंखारिज़्यावए कै जैद

माराजोगोडवके? ८साचो है डादा-चिज़्या, जुनी ब नोरालाई मामें:द चाँदो ज़ सखैदयान्या ले। हैदी ब डा मिँ मिनिसउ फरी डाहुक आव मानुवात डालाई यायुँ हुपज़्यावर डामारादैहरिज़्या ब?”

फरिसी सोनो सिर्मा स्योःज़्याव

६येसुए यानी धर्मी जैसिद ‘गे मिताव सु ज़ मालेर’ लिद स०ज़्यावराए जूनी घर्ती तोबो भाःद याएक्यो। १०“नेब्लो मिँनी ध्यान भिमल पोंखारिना बाकिनी दी। नोनी तोबो फरिसी ओल्यो दी, तोबो सिर्मा स्योःज़्याव ओल्यो दी। ११नो फरिसीए जाँ तँदा बैसिद, ‘अ परमेस्वर, डा नँलाई धन्याबाद डाचरैःनिज़्या। डा छुतराए मिताव लुभी ब डामाले, अन्याय ब डामादोए, पातज्या ब डामाजैसिए। डा नकाव सिर्मा स्योःज़्याव मिँ स्यासो ब डामाले। १२साताकाव नेखेप ब डाउपासिज़्या। डास लिज़्याव भरिनी दस भानी तभा ब डाईज़्या,’ है लिद पोंखारिक्यो दी।

१३“नो सिर्मा स्योःज़्यावए ते जाँ तादाड च्याँःसिद ओलाजए परमेस्वरए ल्योदा माभाल्सिधुद ओछाती तपे तपे, ‘अ परमेस्वर, डा मिताव पापीलाई नयुँ ओनाक,’ लिद पोंखारिक्यो दी।

१४“डा जेलाई है डादाचिज़्या, नोनी ननी निपुलुसोत फरिसीकिन

बुरू सिर्मा स्योःज़्याव ज़ परमेस्वरए ओड़ाक धर्मी थ०रिके। जो ओलनी सघ्योःसिज़्या, हो ज़िमिःज़्या। फरी जो ओलनी सज़िमिसिज़्या, हो घ्योःरिज़्या।”

येसुए ल्योक हुज़्याव लुज़ार


(मत्ती १६:१३-१५; मर्कूस १०:१३-१६)

१५नकिन मिँराए ज़िमज़ा याज़ार ‘येसुए छापद असिक घरायोक्’ लिद ओल्योक यारारैःज़्याक उसिसराए नोरालाई सिडार्द यारारैःकेर। १६येसुए निताव रँःद लुज़ारालाई ओल्योदा खुल्द, “नो ज़िमज़ा लुज़ारालाई तारारैःच्यो, डाल्योदा हुव याराएचिके। परमेस्वरए ओराज्या नितावराए जूनी ज़ लिज़्या। १७डा साचो है डादाचिज़्या, जोर आव लुज़ाराए माँःती परमेस्वरए ओराज्याल पसिन्या युँ मादोर, नोर खर्क ज़ पसिउ दैन्या मालेर,” है लिद उसिसरालाई है यादोक्को।

अजम्बरी जुनी खिमज़्याव धनी

(मत्ती १६:१६-२६; मर्कूस १०:१७-२७)

१८हाःत ज़ तोबो यहूदीराए याघेप्पा हुद, “अ धर्मी गुर्बा, डा अजम्बरी जुनी दैन्या किताव दान्या?” है ओदोक ते, १९येसुए, “डालाई काराव धर्मी है नदाँज़्याव? परमेस्वरकिन



(१८:२५)

धर्मी सु ज़ माले। २० धर्मसास्त्रलाव सर्सिउ दान्या मादान्या येन नँ ज़ नसैज़्याखेहो — अर्काए ओज्याए ल्योदा माबान्या, मिँ मासैःन्या, माकुन्या, धुत गोहाई मायान्या, बाबु आमाए ओमान नैदचान्या,” है ओदोक ते, २१ नो याघेप्पाए, “आव भरी ते ज़िम्ज़ाकिन दाहुव ज़ डानैज़्या,” है दोक्यो। २२ येसुए नो थैद, “अभ तोबो नमासयो-ताए। नँस लिज़्याव भरी यो-द काता ज़ माल्योरालाई भाःद याएकेदा, नँ स्वर्गताव धन दैन्या नले। नो येन भरी दाद नँ डाछींत हुन्के,” है दोक्यो। २३ नो पाँ थैद उयुँर स्यासे सतेक्यो,

काराव ल्यो ताकिन नोए ओधन बनै कुधु ज़ उलिज़्याव।

२४ येसुए नो ओबाज़्याव रँःद नक लिज़्यावरालाई, “धनी मिँ परमेस्वरए ओराज्याल पसिन्या बनै धो ताज़्या। २५ गपए उकुँल ऊँत उछिरिज़्यावकिन धनी मिँ परमेस्वरए ओराज्याल पसिन्या भन धो ताज़्या,” है ओरादोक ते, २६ नो पाँ थैज़्यावराए, “इताव ताकिन ते सुए ची अजम्बरी जुनी ओदैधुरिज़्याव?” है यादोक ते, २७ येसुए, “मिँर यानी सु ज़ माबाँचिधुर, खाली परमेस्वरनी मातान्या काता ज़ माले,” है यादोक्यो।

येसुए उछींत बाज़्यावर

(मत्ती १६:२७-३०; मर्कूस १०:२८-३१)

२८ हा:त ज़ पत्रुसए, “गे ते प्राइँ ख्यानैद नछींत हुद गेले,” है ओदोक ते, २९ येसुए प्राइँलाई, “डा साचो है डादाचिज़्या, परमेस्वरए ओराज्याए जूनी जोए उफिम, ओज्या ओज़ार, ओदाज्यु भाइर, ओबाबु ओआमार यारास्ज़्याव, ३० होए आव उजितत ज़ कुधु गुना दैज़्याव, फरिकाव जुनील अजम्बरी जुनी ब दैन्या ले,” है यादोक्यो।

येसु उसिन्याए जूनी फरी ओपाँव

(मत्ती २०:१७-१९; मर्कूस १०:३२-३४)

३१ नकिन येसुए बाह जना उसिसरालाई अछतड लाँद, “गे यरूसलेमदा गेपुलुस्नाज़्या। नल डा मिँ मिनिसउए डाजूनी अगमबक्तराए यासरो भरी यो-न्या ले। ३२ है जैद डालाई छुत जातलावराए याकुइत सूपिद उल्ली गिल्ली दाद, बीज्यात जैद, तिल्द, ३३ यारी:नावत सै:न्या लेर। हैदी ब स्रोलात सिउनी सैसिद सोन्या डाले,” है यादोक्यो। ३४ खाली नो पाँए ओअर्थ भरी नोरालाई कप्सिउ मिताव ओतावए है ओरादोव भरी माबुभिधुकेर।

येसुए उमी मारै:वलाई रँ:धुन्या

ओजैव

(मत्ती २०:२६-३४; मर्कूस १०:४६-५२)

३५ नकिन येसु यरीहो सहरल ओकेस्नाक नक उमी मारै:व तोबो मिँ येम छचोक चुसिद उनिज़्याव। ३६ नोए माहोल्यार याहुज़्याव थैद मिँरालाई, “आव काता याजैज़्याव?” है ओरादोक ते, ३७ नोराए, “नासरतलाव येसु आलाव घ्याँ हुज़्या,” है यादोव प्राइँना, ३८ नो बनै चोइस क्रिद, “अ दाऊदए ओथोलाव येसु, डालाई नयुँ ओनाक,” है ल्यो ज़ उलिज़्याक, ३९ नलावराए, “भ्याउँ तालिनी,” लिद सिडार्केर। खाली नो भन ज़ चोइस, “अ दाऊदए ओथोलाव, डालाई नयुँ ओनाक,” है लिद क्रिउ ज़ लिके।

४० येसु नक च्याँ:सिद, “नोलाई आदा रैचिके,” है यादोक्यो। नोलाई यारैवत, ४१ येसुए, “डा नजूनी काता दादचान्या?” है ओदोक ते, “प्रभु, डा रँ:धुन्या डाताक,” है लिके। ४२ हा:त ज़ येसुए, “रँ:न्या तान्के, डालाई नयुँ उहुबोए ज़ नगराँके,” है ओदोव प्राइँना, ४३ नो मिँ रँ:धुन्या ताके। नोए फरी परमेस्वरलाई घ्यो:व ज़ थरैद येसुए उछीं उछीं ज़ बाके। नकाव लिज़्यावराए मनी निताव रँ:द

परमेस्वरए ल्योदा बनै खुसी ताद उमिन सघ्योःदिकेर।

सिर्मा स्योःज्याव जखायस

१६ येसु यरीहो सहरल पसिद नलाव घ्याँ ओबाज्याक, ^२नल तोबो जखायस यादोज्याव सिर्मा स्योःज्याव मुख्या उलिज्याव। नो मिँ बनै धनी ब उलिज्याव। ^३नोए नो हुज्याव येसुलाई चिऊन्या ओपैज्याव। खाली बनै तेंक्यासो ओतावए माहोल्याराए खार्नी मारँःधुक्यो। ^४है जैद येसु ओबान्या येमदा डादा ज़ धोःनाद येसुलाई चिऊन्याए जूनी तोबो सींत पुलुस्के। ^५येसु नक ओकेसोत जखायस उलिज्याव सींदा भाल्सिद, “अ जखायस, चाँदो भरिन्के। आछिम नफिमक डाबासिरिज्या,” है ओदोव प्राईना, ^६लाला लुलु भरिद बनै रेंए रेंए येसुलाई उफिमक लाँक्यो। ^७नलाव मिँराए निताव रँःद रूम्रूमैद, “कै जैद निताव पापीए ल्योक बासिउ ओपैज्याव ओताव?” है लिकेर।

^८जखायस ते येसुए ओडाक च्याँःसिद, “अ प्रभु, डास लिज्याव भरी नेभा जैद तभा भरी माथेंव मायोःवरालाई डाराएरिज्या। हो वाज़ माःक, छुतरालाई हाइद डाराज्युव भरी चार दोबोर सोवोल्द डाराएरिज्या,” है ओदोक ते, ^९येसुए,

“आव मिँ आछिमकिन उफिमलाव-रास परमेस्वरए ल्योदा बान्या येम ब दैक्यो, अब्राहामए साचो ओज़ाल ब गनिसिके। ^{१०}डा मिँ मिन्सिउ इताव माव डोइवरालाई खिम्द बाँचैना डाहुव ज़।”

सुन खेलैसिन्या घर्ती

(मती २५:१४-३०)

^{११}नलाव मिँराए नो पाँ याथैज्याक येसु यरूसलेमल ओकेस्नावए नोराए ‘परमेस्वरए ओराज्या आव मानुवात बेहार ज़ ओरैरिज्याव सा’ है यालिज्याव। नोराए यापाँ सदाँदचान्याए जूनी येसुए घर्ती तोबो भाःद याएक्यो। ^{१२}“तोबो राजाए ओथोलाव मिँ ओल उलिज्याव पोडाव राज्या चलैन्याए जूनी तादाड राजाए ल्योक ओहक चानाक्यो दी। ^{१३}ओमाबाद डादा दस जना ओयेन दाज्यावरालाई खुल्द नोरालाई तोतोला तोतोला सुन याद, ‘डा डामाहुवा पै आव खेलैसिच्यो,’ है दाद याख्यानैक्यो दी। ^{१४}खाली नलाव ख्वा ख्वा मिँराए नो राजा खलकलाव मिँलाई यासोवए, ‘आवलाई गेडैताव जैद तायासियो,’ लिद राजाए ल्योदा मिँर यारापरींकेर दी।

^{१५}“छींनी नो ओहक भरी दैद उहुवत नो डादाडाव सुन ओरायो

ओयेन दाज्यावराए ‘कै जैज्या’ लिद याखुल्क्यो दी। १६उस०कताव हुवए, ‘प्रभु, डालाई नयाँव सुन खेलैसिद ओयाःत दस तोला हाइद डानै,’ है ओदोक ते, १७ओघरपतीए, ‘स्याबास, नँ चाव येन दाज्याव। तकेजालाई ब सतस नदोवए डाराज्यालाव दस गोता सहरराए याडैताव डाजैनिरिज्या,’ है दोक्यो दी। १८फरी नोए उछींताव हुवए, ‘प्रभु, नयाँव सुन खेलैसिद ओयाःत पाँच तोला हाइद डानै,’ है ओदोक ते, १९ओघरपतीए, ‘नँलाई ब पाँच गोता सहरराए याडैताव डाजैनिरिज्या,’ है दोक्यो दी।

२०“फरी नोए उछींताव हुद, ‘प्रभु, नयाँव सुन हिताव ज़ लिज्या। रूमालल ज़ पोःद डानै। २१नँ ते नमाभाःव ब नसिम्ज्या, नमानैव ब नलाँज्या। है जैद निताव कर्रा नतावए नँलाई रँःद डाछेःके,’ है ओदोक ते, २२ओघरपतीए नोलाई, ‘नँ कान्ल ज़ काम मालागिउ डाबाँदा, नँलाई नपाँनी ज़ डाफाल्निरिज्या। डालाई ‘ओमाभाःव ब सिम्ज्याव, ओमानैव ब लाँज्याव, नाः कर्रा लिज्या’ लिन्या नसैव ताकिन, २३काराव नो सुन ब्याङ्कल नमाभाःव? नल नभाःव ताकिन डाहुवत ओब्याजस दैन्या डाल्यो,’ है दाद, २४नक च्याँःसिद लिज्यावरालाई, ‘आवलाई नो सुन

नैद दस तोला ल्योलाई एचिके,’ है ओरादोक ते, २५नोराए, ‘प्रभु, ओलस ज़ दस तोला लिज्या सानी,’ है यादोक ते, २६नो राजाए, ‘डा जेलाई साचो है डादाचिज्या, जोए ओदैवलाई चावस चलैज्याव, होए फरी ब दैरिज्याव। जोए ओदैवलाई चावस माचलैव, होस छ्या छ्या लिज्याव ब नँसिरिज्या। २७फरी नो डालाई याडैताव तान्या माभैःज्याव डासुतुरालाई आल रैद डाडाक ज़ याराखेम्चिके,’ है यादोक्यो दी।”

येसुलाई परमेस्वरए उमिनताव राजा याजैव

(मत्ती २१:१-११; मर्कूस ११:१-११;

यूहन्ना १२:१२-१५)

२८येसुए नो घर्तीलाव पाँर तुपैद ननी पुलुस्द यरूसलेमदा पुलुस्नाके। २९नकिन जैतून दाँदा यादोज्यावए उखँकाव बेथफागे सोनो बेथानिया नाखार जीदा ओकेस्नाक नेब्लो उसिसनिलाई अइ लिद डादा निपरीक्यो, ३०“जिन आव गेडाकाव नाखारल बाचिन्केदा। नल तोबो सुए ज़ यामाचेप्ताव बछेरा सुर्सिउ दैन्या जिन्ले। नोलाई पलाःद रैचिन्के। ३१सुवाराए, ‘काराव जिन्पलाःज्याव?’ है यादाचिन्किन, ‘गिनप्रभुलाई चाहिज्या,’ है यारादोचिन,” है लिद निपरीक्यो।

३२ नोनी बाद है उनिदोव मिताव ज़ बछेरालाई दैकिनी। ३३ नोलाई निपला-ज़्याक बछेराए ओर्गेर हुद, “काराव जिन्पला-ज़्याव?” है यारादोक ते, ३४ “गिनप्रभुलाई चाहिज़्या,” है यारादोकिनी। ३५ नोनी नो बछेरालाई येसुए ल्योक रैद, बछेराए ओतर्त याक्वार भाःद येसुलाई चेपो परीकेर। ३६ येमत ओबाज़्याक मिंराए याक्वार येमल तैदिकेर।

३७ जैतून दाँदातिन सहरदा उभरिनावत नो माहोल्थार येसुए ओपाँत बाज़्याव भरिए अचम्ब अचम्बलाव ओयेनर यारँवनी परमेस्वरए ल्योदा बनै रेंए रेंए अइ लिद याक्किज़्याव —

३८ “परमेस्वरए उमिनत हुव राजा
धन्याकाव ओताक,
परमेस्वरए उयुँ ब
होलाँ ओताक,
स्वर्गतावर ब ओरेंरक।”

३९ नोराए खानी र्खा फरिसीराए नो पाँ थैद येसुलाई, “गुर्बा, नसिसरालाई च्निम दाव यापरीके,” है यादोक ते, ४० येसुए, “डा साचो है डादाचिज़्या, नोराए च्निम यादोकिन लुँर ब किन्या लेर,” है यादोक्यो।

यरूसलेमलाई रँःद येसु ओघरो

४१ येसु सहर छचोक ओकेस्नाक सहरलाई रँःद उपिलर रास्द अइ लिके, ४२ “ए यरूसलेमलाव लिज़्यावर, जे आछिमकाव जेल्योक हुव परमेस्वरस खैन्या, युँ होलाँ दाव पाँर जेथ-रैव ताकिन तान्या ओल्यो। अब ते नो जेमारँःधुइ। ४३ जेलाई छीनी तछा जेसुतुरर हुद गरर जैद प्राइँनी घिरिचिरिज़्यार। ४४ परमेस्वर जेल्योक उहुव जेमाथ-रैधुवए जेसुतुरराए जेसहरलाई तैःद लुँए तर्त लुँ ब नैन्या मालेर। जेलाई सोनो जेज़ारालाई ब पछारिद यारासैःरिज़्यार।”

येसुए बेपारीरालाई ध्यान फ़िमनी
ओरापलेव

(मत्ती २१:१२-१७; मर्कूस ११:१५-१६;
यूहन्ना २:१३-२२)

४५ नकिन येसु यरूसलेमलाव ध्यान फ़िमल बाद नलाव पसल्यारालाई पले-द, ४६ नोरालाई, “धर्मसास्त्रल परमेस्वरए ओपाँ अइ लिद सर्सिउ लिज़्या,

‘डा डाफ़िम पोखारिन्या फ़िम
जैसिउ लिज़्या।’

जे ते भन चोरराए पुप मिताव जैद जेनै,” है यादोक्यो।

४७ नकिन येसुए नो ध्यान फिमल दिनकाव ज़ परमेस्वरए ओपाँ ओरा-सथैज़्याव। खाली नलाव मुख्या पुजारीर, सास्त्रीर स़ोनो नलाव स़ेर स़ेरर भन येसुलाई सैःन्याए जूँनी यापाँसिज़्याव। ४८ हितावत ब मिँ भरिए येसुए ओपाँ थैद घेप्पा यारँःवए सैःन्या येम मादैकेर।

येसुए ओहक स़ोनो यूहन्नाए ओहक

(मत्ती २१:२३-२७; मर्कुस ११:२७-३३)

२० हाः बेलाक तछा यरूसलेमलाव ध्यान फिमल येसुए चाव था ओरासथैज़्याक नलाव मुख्या पुजारीर, सास्त्रीर स़ोनो यहूदीराए यासेरर ओल्योक हुद, २ “गेलाई है दासिके, आव नदोज़्याव येनर नँलाई सुए है उदीव, सुए हक उईव?” है यादोक ते, ३ येसुए, “डा ब जेलाई तोबो है डादाचिज़्या, नो पाँ है दाँचिके। ४ रील सछैँज़्याव यूहन्नाए ओयेन परमेस्वरए ल्योनी ओताव सैं मिँराए ल्योनी ओताव?” है ओरादोक ते, ५ या याल, “ ‘परमेस्वरए ल्योनी ओताव’ है गेदचा गेलिकिन, ‘हुकी काराव यूहन्नाए ओपाँ जेमाभैःव?’

है दान्या ले। ६ फरी ‘मिँनी’ है गेदचा गेलिकिन, मिँ भरिए यूहन्नालाई अगमबक्ता ज़ याथःरैवए गेलाई भेःद सैःन्या ओछचास ब लिज़्या,” है लिकेर। ७ है जैद नोराए येसुलाई, “यूहन्नाए ओयेन कान्नी ओताव गेमासैँए,” है यादोक ते, ८ येसुए, “हो ची ताकिन्दा डालाई आव येन दान्या हक सुए ओयाँव डा ब है डामादाच्यो,” है यादोक्यो।

अधिया कमैज़्यावराए घर्ती

(मत्ती २१:३३-४६; मर्कुस १२:१-१२)

६ नकिन नलाव मिँरालाई घर्ती तोबो भाःद अइ लिद यासथैक्यो, “तोबो मिँए ओएँः भरिल जोम्परसै भाःद मिँरालाई अधियाल याद, ओल जाँवा पै तोबो तादा देसड लिनाके दी। १० नो जोम्परसै किन्त्या बेलाक तोबो ओनोकोरलाई उजुँ चानाव परीक्यो। खाली नो अधिया कमैज़्यावराए भन नोलाई प्रोद रितो ज़ खेपैकेर दी। ११ फरी छीनी छुत ओनोकोरलाई उपरीक नोलाई ब प्रोद बीज्यात जैद रितो ज़ खेपैकेर दी। १२ छीनी फरी ब तोबोलाई उपरीक हिताव ज़ नोलाई ब प्रोद लल्यातोरो जैद ख्याकेर दी।

१३“नकिन छीनी नो ऍःए ओर्गेए,
‘कै जैन्या ओताव? डायुंलाव
डाज़ालाई ज़ परींव ताके। नोलाई
ताकिन ओमान नैदिर सैं’ लिद नो
ओज़ालाई परींक्यो दी। १४खाली
नो ओज़ा उहुज़्याव रँःद नो अधिया
कमैज़्यावर भन या या पाँसिद,
‘आव ते ऍः दैन्या मिं ची, आवलाई
गेसैःकिन आव ऍः गेमीं ज़ तान्या
ले,’ लिद, १५नो मिँलाई ऍःनी पाखाड
लाँद सैःकेर दी।”

नकिन येसुए, “नो ऍःए ओर्गेए
अधिया कमैज़्यावरालाई कै याजैवके
लिक ते, १६नोर प्राइँलाई ज़ सैःद नो
ऍँः छुतरलाई अधियाल यान्या ले,” है
ओरादोक ते, नो पाँ थैज़्यावराए यायुँ
कैद, “निताव ते खर्क ज़ ताताक,” है
लिकेर।

१७नकिन येसुए, “हिताव ताकिन
आव धर्मसास्त्रलाव पाँए ओअर्थ
किताव जेडमिसिज़्या?

‘भुलीराए कान्ल ज़ माज़्यासे लिद
याख्याव लुँ
नो ज़ भन भुयारलाव लुँ
ताके।’

१८नो लुँत पाज़्याव भरी कुतु कुतु ज़
तान्या लेर। नो लुँ फरी यातर्त उहुकिन
भन नप नप ज़ तान्या लेर।”

माहाराजालाई सिर्मा यान्या सैं मायान्या

(मत्ती २२:१५-२२; मर्कूस १२:१३-१७)

१९नाःत ज़ सास्त्रीर सोनो मुख्या
पुजारीराए ‘आव घर्ती ते गेडैत
ज़ भाःदद्यासिक्यो’ लिन्या सैंद
येसुलाई हो प्राइँना ज़ क्योःव पैकेर।
खाली मिँर रँःद छेःकेर। २०है जैद
नोराए, ‘आवलाई ओपाँ क्योःदद्याद
हाकिमए उकुइत सूपिउ ताके’ लिद
मौका चिऊद, यासकावर नेबरेंवा
येसुस खैव मिताव जैसिउ परींद
येसुए ओयेन साँना यारापरींकेर।
२१नो साँना बावराए येसुलाई, “गुर्बा,
नँ गेस नपाँज़्याव भरी साचो वाज़
लिज़्या। परमेस्वरए ल्योदा बान्या येम
नपैसिक ब मिँ रँःद नमादोए, सोजोनी
ज़ नदोज़्या। २२है जैद गेलाई है दाव
ताके, माहाराजालाई गे सिर्मा यान्या
सैं मायान्या?” है यादोक ते, २३येसुए
नोराए याचाल सैंद, २४“तोबो पैसा
सतैचिसाँकी। नत सुए उसुरूप, सुए
उमिन उलिज़्याव?” है ओरादोक ते,
“माहाराजाए उमीं ज़,” है दोकेर।
२५“हो ची ताकिन्दा माहाराजाए
उमीं भरी माहाराजालाई ज़ एच्यो,
परमेस्वरए उमीं भरी परमेस्वरलाई ज़

एच्यो,” है यादोक्यो। २६ है जैद नोराए मिँराए ड़ाक येसुए ओपाँ क्योःव मादैद, भन अचम्ब ताद चिम दाद लिकेर।

सदुकीराए यापाँ

(मत्ती २२:२३-३३; मर्कूस १२:१८-२७)

२७ नकिन सदुकीराए ब येसुलाई पजैना हुकेर। सदुकी है यारादो-ज्यावराए ‘सिउकिन सैसिन्या माताए’ है यालिज्याव। २८ है जैद नोर हुद, “गुर्बा, मोसाए ओकानुनल इताव सर्सिउ लिज्या, ‘तोबोए ज्या दाद ज़ार मादैद उसिकिन, ओभाइए ओदाज्युए ओथोर माफ्या-न्याए जूँनी ओमारूमलाई ओरैवक।’ २९ है जैद तोबोए ओज़ार सात भाइ याल्यो। यादाज्युए ज्या दाद ज़ार मादैद ज़ सिके। ३० होए उधूँलावए ओमारूमलाई रैद, नो ब ज़ार मादैद ज़ सिके। ३१ नकिन साइँला मनी हिताव ज़ ताके। नितावनी ज़ सात भाइ भरिए ज़ नोलाई रैद ज़ार मादैद ज़ सिकेर। ३२ प्राइँरानी छीनी नो मेंमा ब सिके। ३३ है जैद नो मेंमा सात भाइए याज्या ओतावए अजम्बरी जुनील काताकावए याज्या तान्या?” है लिकेर।

३४ हाःत ज़ येसुए, “आव मानुवा-ताव मिँराए ज्या ब दोज़्यार, रे ब दोज़्यार। ३५ अजम्बरी जुनी दैन्या तावराए ते स्वर्गत ज्या ब मादोर, रे ब मादोर। ३६ नोर सिउनी यासैसिउत परमेस्वरए ओज़ार ताद ओचाकज्या स्यासोर यातावए फरी खर्क ज़ सिन्या मालेर। ३७ है जैद सिउकिन सैसिन्या ओताज्याव सै ओमाताज्याव मोसाए ओसरोनी ब सैच्यो। नोए भोपोरा ओचाँःज्यावनी परमेस्वरए ओर्गा थैद अइ लिद सक्यो,

‘डा अब्राहामए ओपरमेस्वर,
इसहाकए ओपरमेस्वर सोनो
याकूबए ओपरमेस्वर ज़।’

३८ ओल ते मोरोराए यापरमेस्वर माःक, जींदोराए यापरमेस्वर ची। है जैद ओलस लिज्याव भरी जींदो ज़ ताज्यार।”

३९ नो पाँ थैद नलाव सास्त्रीराए येसुलाई, “थिक ज़ है नरादोके, गुर्बा,” है दोकेर। ४० हाःकिन सुए ज़ येसुस पाँन्या आँत मादोकेर।

ख्रीस दाऊद राजाकिन घेप्पा लिज्या

(मत्ती २२:४१-४६; मर्कूस १२:३५-३७)

४१ नकिन येसुए है यादोक्यो, “मिँराए कै जैद ख्रीसलाई दाऊदए ओथोलाव

है यादोज्याव? ४२-४३ ओल दाऊदए ज़
ख्रीसए उजूनी भजन पोस्तोकोल अइ
लिद सर्द नैव,

‘परमेस्वरए डाप्रभुलाई,
‘नसुतुररालाई नखँ धूँल
भाःद डामाईवा पै,
डावोर्दा चुसिद लिन्के,
है दोक्यो।’

४४ है जैद ओल दाऊदए मनी ख्रीस-
लाई ‘डाप्रभु ज़’ है ओदोकिन नो कै
जैद ओल ओथोलाव ओताज्याव?”
है यादोक्यो।

येसुए सास्त्रीराए यापाहा भाःद
ओरायो

(मत्ती २३:१-३६; मर्कूस १२:३८-४०)

४५ मिं भरिए येसुए ओपाँ याथैज्याक
उसिसरालाई, ४६ “जे ते सास्त्रीराए
यादोज्याव मिताव येन दान्या माःक।
नोर रेरे बेन्बेनो क्वा क्वाइसिद
‘प्राइँए धो घदासिरक’ लिद बजार
जीदा दुलिरिज्यार, सोनो धर्मसास्त्र
फ़िमराल, घ्योःव घ्योःव भत्यारल
प्राइँए रँःन्याक ओमान ल्यो पोल
वाज़ चुसिउ पैज्यार। ४७ नो सास्त्रीराए
फ़न राँदी मेंमारालाई तँनी छाम छुम
याराख्याज्यार, मिँराए ड़ाक वाज़
बनै चाव चाव पोँखारिउ जैसिज्यार।

नोराए ते प्राइँरानी घ्योःव सजा ज़
दैरिज्यार,” है लिद यासथैक्यो।

राँदी मेंमाए ओचरैःव भिती

(मर्कूस १२:४१-४४)

२१ नकिन येसुए यरूसलेमलाव
ध्यान फ़िमल धनी धनीराए
परमेस्वरलाई भिती याचरैःज्याव
ओराचिऊज्याक, २ तोबो काता
ज़ माल्यो राँदी मेंमाए नेब्लो पैसा
ओचरैःज्याव रँःक्यो। ३ नो रँःद
येसुए नलावरालाई, “डा साचो ज़ है
डादाचिज्या, आव काता ज़ माल्यो
राँदी मेंमाए छुतराकिन कुधु चरैःक्यो।
४ धनीराए ते यासयेलोनी वाज़
चरैःकेर। नो राँदी मेंमाए ते ओललाई
ओमाथैज्यावत ब ओलस लिज्याव
भरी प्राइँ ज़ चरैःक्यो,” है यादोक्यो।

खेन्त्या बेलाकाव सरेसर

(मत्ती २४:१-१४; मर्कूस १३:१-१३)

५ ध्यान फ़िमनी पुलुस्द याबाज्याक
ख्वा ख्वा मिँराए, ‘आव ध्यान फ़िम-
लाव लुँर काता आः चावर, काता
आः चावराए सिडारैद यानैज्याव’
है लिद या या यापाँज्याव येसुए
थैद, ६ “आव जेरैःज्याव भरी तछा
तैःद लुँए तर्त लुँ ब रहिन्या माले,”



है ओरादोक ते, ७नोराए, “गुर्बा, आव नपाँ भरी खर्क ओतारिज़्याव? नोर तान्या सरेस किताव ओतारिज़्याव?” है यादोक ते, ८येसुए, “जे जोगोइसिद लिच्यो, मानी सुवाराए भुकैचिज्या। डा डामिन कुद ‘ख्रीस डा ज़’ है लिज़्यावर सोनो ‘बेला हुके’ है लिज़्यावर कुधु ज़ हुन्या लेर। जे नोराए पाँत ताबाच्यो। ६फरी ‘आड लरें ताज़्या, होड लरें ताज़्या’ लिन्या जेथैक जे ताछेच्यो। नो भरी डादा ताव परिए, खाली नो खेमन्या बेला माःक।

१०“नोकिन डादा जात जात, राज्या राज्या लरें दान्या लेर। ११घ्योःव घ्योःव भोंचालोर हुद, पो पोड अनिकालर सोनो नुल्पा नुल्मार ताद, नमत ब बनै छे छे डम्सिउ सरेसर तान्या लेर।

१२“खाली आव भरी ओमाताद ज़ डाजूनी जेखिरी पसिद क्योःद भ्याल-खानाल भाःचिरिज़्यार। कचरील लाँद हाकिमर सोनो राजाराए डाक सच्याँचिरिज़्यार। १३आव भरिनी जे नोरालाई डासाची यान्या जेले। १४नो बेलाक जेक्याँलाई जोगोइन्याए जूनी ‘डा कै लिन्या, काता पाँन्या ओताव?’ लिद जेयुँ आँचा पाँचा

ताजैच्यो। १५डा ज़ जेलाई नो जेखिरी पसिज़्यावराए मापलतैधुन्या पाँर सोनो बुद्धीर यान्या डाले। १६हैदी ब जे ख्वारालाई जेबाबु जेआमाराए, जेदाज्यु भाइराए, जेरला मेलाराए सोनो जेनेँ मेँराए ब जेलाई सैःन्याए जूनी सूँपिन्या लेर। १७जे डामिनतावर जेतावए जेलाई प्राइँए सोन्या लेर। १८हैदी ब तोबो जेचेम ब जेडैतिन गलिन्या माले। १९डामिनत थोरिद जेलिज़्यावए साचो जुनी दैन्या जेले।”

यरूसलेम खेमन्या बेला

(मत्ती २४:१५-२१; मार्कूस १३:१४-१९)

२०“यरूसलेम सहर ओखेमिज़्याव बेला आव सरेसनी ज़ सैच्यो। तछा आव यरूसलेमस लरें दाना हुव फौजीराए धिरिरीज़्यार। २१हो बेलाक यहूदियाल लिज़्यावर गों जीदा ओधोँःरक। सहरल लिज़्यावर ब पुलुस्द ओधोँःरक। फरी नाखारल लिज़्यावर यरूसलेमल ताबारक। २२नो बेला नो धर्मसास्त्रलाव सर्सिउ मिताव परमेस्वरए ओराएरिज़्याव सजा ओसयोःज़्याव बेला ज़। २३नो बेलाक याफूल याज़ा ल्योर सोनो नुइँ सवैज़्याव आमार युँ नावज़ार। आव देसलाव मिँरालाई बनै छे छे



डम्सिउ धो सहिउ परमेस्वरए ओसजा हुरिज्या। २४ कुधुलाई तरवालीराए याराफूइरिज्यार। कुधुलाई कैत जैद देस देसदा यारालारिज्यार। छुत जातलाव मिंराए याबेला ओमायोःवा पै यरूसलेमलाई छिल्द नैन्या लेर।”

ख्रीस फरी उहुन्या छ्याम

(मत्ती २४:२६-३५; मर्कूस १३:२४-३१)

२५ “नकिन निमीत, स्यावैत, सोरोरात मनी सरेसर रैंःन्या लेर। आव नामल फरी समुन्द्रलाव रीर बनै छल्किद नम मिताव यागर्जिक मानुवाताव मिंर यायुं आंचा पांचा ताद बनै छेःन्या लेर। २६ नमतावर यासतर माद याथोनोःसिज्याव रैंःद ‘आव मानुवा कै तान्या ओताव’ लिद मिंर याछ्याचेए मुर्छा परिन्या लेर। २७ हाःत ज़ मिं मिन्सिउलाई बनै ज़गै मगैव ओसक्तीरास बादल जील उहुज्याव रैंःन्या लेर। २८ है जैद जे ते इतावर ओतानाज्याव जेरैंःक, ‘परमेस्वरए गेलाई उस्कैन्या बेला हुके’ लिद जेयुरै सभैंःद रेंचिके,” है यादोक्यो।

२६ नकिन तोबो घर्ती भाःद याएक्यो, “नेभारा सीं तादी ब, जो सीं तादी ब, ३० नोर यामोम्नाक ‘उभ्याली उहुव ची ओल्यो’ लिन्या जेसैंज्या। ३१ हिताव ज़

आव है डादाचिउ पाँ भरी ओतानाज्याव जेरैंःक ‘परमेस्वरए ओराज्या उहुनाव ची ओल्यो’ लिन्या सैंच्यो। ३२ डा जेलाई साचो है डादाचिज्या, आव भरी ओमातावा पै आव जुक खेमन्या माले। ३३ आव नाम नम ते खेमन्या ले, खाली डा डापाँ ते खर्क ज़ मान्या माले।”

सैसिद लिच्यो

३४ “है जैद जे ते जेमन लागिउ येनर दाद मँःए मँःए बारिन्या, सोनो ‘आव डाजिउत कै तान्या ओताव?’ लिद वीनी फुइ लिन्या, निताव येनरानी जोगोइसिद लिच्यो, मानी हो छ्याम भिबलाल परिउ मिताव जेताया। ३५ हो छ्याम परमेस्वरए ओसजा आव मानुवाताव मिं भरिराए याक्याँत तछ्योनी ज़ हुरिज्या। ३६ है जैद जे निताव छे छे डम्सिउ सजारानी पुलुस्द मिं मिन्सिउए ओड़ाक माछेःद ज़ थंरिन्याए जूनी अल्सैं मादाद पोंखारिउ ज़ नैच्यो।”

३७ येसुए दिनकाव ज़ लाक लाक यरूसलेमलाव ध्यान भिमल परमेस्वरए ओपाँ ओरासथैज्याव। रिमक रिमक ननी पुलुस्द जैतून दाँदा जीदा ओबासिनाज्याव। ३८ है जैद मिंर

ओपाँ थैन्याए जूनी छकालन्या घग
ध्यान भिमल याहुज्याव।

येसुलाई सैन्या गुमुस्ता

(मत्ती २६:१-५; मर्कूस १४:१-२;

यूहन्ना ११:४७-५३)

२२ निस्तार यादोज्याव माँदा
भरेस ज्ञान्या पर्व हुनाद
उलिज्याव। २नो बेलाक ज़ मुख्या
पुजारीर सनो सास्त्रीराए 'येसुलाई
कै जैद सैन्या ओताव?' लिद बुद्धी
याकलैज्याव। 'मिर्राए डाक सै:किन
मिर्र मचिज्या' लिद याछे:ज्याव।

येसुलाई धोका याज्याव
इस्करियोत

(मत्ती २६:१४-१६; मर्कूस १४:१०-११)

३हा:त ज़ सैतान नो बाह्र जना
उसिसरासकाव यहूदा इस्करियोतए
ओक्याँत पसिके। ४है जैद नो ननी
पुलुस्द मुख्या पुजारीर सनो ध्यान
भिमलाव पुलिसराए ल्योक बाद
'येसुलाई इतावनी जेकुइत जैद
डायचिरिज्या' लिद पाँसिकेर। ५नोर
बनै रेंद नोलाई पैसा यान्या जैकेर।
६इस्करियोत ब उचित बुभ्दिद
हा:किन मिर्र यामाल्यो बेलाक
क्यो:न्या मौका उखिम्ज्याव।

माँदा भरेस ज्ञान्या पर्व

(मत्ती २६:१७-१९; मर्कूस १४:१२-१६)

७हा:त ज़ नो माँदा भरेस ज्ञान्या
पर्व सुरू ओतावत पाथा पलन्या
छचाम ताके। ८है जैद येसुए पत्रुस
सनो यूहन्नानिलाई अइ लिद
निपरीक्यो, "गे आव पर्व मानिन्याए
जूनी जिन ज्ञावर जैनाचिन्के," है
उनिदोक ते, ९"नँ कै नलिज्या,
गिन काड्डु बाद जैनान्या?" है
दोकिनी। १०येसुए फरी, "जिन
सहरल जिन्पसिउ प्राइँना तोबो री
गपद ओघागरी छींद बाज्याव मिँ
दैन्या जिन्ले। नोए उछीं उछीं बाद
उपसिज्याव भिमक ज़ बाचिन।
११नक बाद नो भिमए ओर्गेलाई
है दोचिन, 'नँलाई गेगुर्बाए है
दीज्याव, पाहुना लिन्या कुन्ती काङ्क
उलिज्याव? आव पर्व उसिसरास
नल ज़ मानिरिज्याव दी,' है दोचिन।
१२है जिन्दोव प्राइँना नोए ओतर्ताव
तालल तोबो घेप्पा कुन्ती चावस
सजैसिउ जिनलाई सतैदयान्या ले।
गेज्याव भरी नल ज़ जैचिन," है दाद
निपरीक्यो। १३है जैद नोनी बाद है
उनिदोव मिताव ज़ दैद, पर्वताव
ज्याव भरी जैकिनी।

परमेस्वरए उमिनताव भत्यार

(मत्ती २६:२०-२६; मार्कुस १४:१७-२५;
१ कोरिन्थी ११:२३-२५)

१४मानिन्या बेला ओतावत येसु ओसाचीरास नो कुन्तील दुप्सिद ज़्यावर ज़्यान्याए जूनी याचुसिउत, १५येसुए, “आव पर्ब डाक्याँत हुरिज़्याव दुखर ओमाताद ज़ जेस मानिउ डापैज़्याव। १६डा जेलाई है डादाचिज़्या, परमेस्वरए ओभत्यारल उमिनतावर यामादुप्सिवा पै डा जेस फरी सिप ज़्यान्या डामाले,” है यादोक्यो।

१७नकिन येसुए खुरी उकुइत रैद धन्याबाद चरै:द उसिसरालाई याद, “हाँ, आव भा:चिके। १८डा जेलाई है डादाचिज़्या, परमेस्वरए ओराज्या ओमाहुवा पै दाखमदच फरी ओन्या डामाले,” है यादोक्यो। १९नकिन येसुए उकुइत भरेस तोबो रैद, धन्याबाद चरै:द, नो भरेस के:द उसिसरालाई अइ लिद भा:द याएक्यो, “आव भरेस जेजूनी फ़ा:द ड़ायाचिरिज़्याव डाक्याँ ज़। आकिनी ड़ालाई मामें:न्याए जूनी आव भत्यार दाव येन ज़ दोच्यो,” है यादोक्यो। २०हिताव ज़ फरी नो भरेस याज़्युवत

येसुए खुरी उकुइत रैद, “आव जेजूनी ड़ासोभोरिज़्याव ड़ाफ़ी ज़। आनी ज़ परमेस्वरए जेस सा:रो बाचा नैदचाचिरिज़्याव।

२१“ड़ालाई धोका याज़्याव मिं जेखार्ल ज़ लिज़्या, ड़ास सिप ज़ ज़्युज़्याव। २२मिं मिन्सिउए ते गोइँसिउ मिताव सयो:व ज़ परिए, खाली नोलाई धोका याज़्याव मिंलाई ते थैए माँतकन ज़ लिज़्या,” है यादोक्यो। २३नकिन उसिसर या याल, “गेनी निताव येन दान्या सु ओताव?” है लिकेर।

सेर जैसिन्या

२४नकिन जाँवाक उसिसर, ‘गे भरिनी सु घेप्पा गेलिज़्याव?’ लिद याखर्लेसिनाक, २५येसुए, “आव मानुवाताव चलननी जोर राजा ताज़्यार, होर याधूँलावराए याडैत बनै अखत्यासो ताज़्यार। याधूँलावराए फरी नोरालाई ‘गेधर्मीदातार’ है दाव ज़ परिज़्या। २६खाली जे ते निताव जैसिन्या मा:क, बुरू जेनी जो सेर ताज़्या, हो प्राइँए याधूँलाव ओजैसिक। फरी जोए हक दैज़्याव, नो प्राइँए यासेवा दान्या ओजैसिक। २७भत्यारल चुसिज़्याव घेप्पा

ओताज़्याव, सैं ज़्याव लाँज़्याव घेप्पा ओताज़्याव? नो चुसिज़्याव ज़ घेप्पा ताज़्या सानी सैं माःक? हैदी ब डा भन जेसेवा दान्या डाजैसिके।

२८ “जे फरी आव मानुवाताव डादुख भरिल डास डासतत लिन्यार जेतावए, २९ किताव डालाई डाबाबुए ओराज्या याद नैनाव, हिताव ज़ डा ब जेलाई तोबो हक डायाचिरिज़्या। ३० नो डाराज्याल जे डास ज़ तोबोल सिप ज़ ज़्यान्या जेले, सोनो बाह थर इस्राएलीराए याडैतावर ताद यायेन फाल्दचान्या ब जेले,” है यादोक्यो।

पत्रुसए ओयेन येसुए ड़ादा ज़ है ओदोव

(मत्ती २६:३१-३५; मर्कुस १४:२७-३१;
यूहन्ना १३:३६-३८)

३१ नकिन येसुए पत्रुसलाई, “अ सिमोन, सिमोन, किताव मनमलाई छिन्कैज़्यार, हिताव ज़ सैतानए नँलाई ब जाँचिन्या भाःसिद ले। ३२ है जैद डा नज़ूनी डाल्योदा नदोव सत तारासोक लिद पोंखारिद डाईज़्या। फरी तखेप नबादी ब ओल्द नहुवत नँ ननैरालाई पाथ पारैव ताके,” है ओदोक ते, ३३ पत्रुसए, “प्रभु, नँस भ्यालखानाल बान्या ब तयार ज़

डालिज़्या, नँस सिन्या ब तयार ज़ डालिज़्या,” है दोक्यो। ३४ येसुए फरी, “पत्रुस, नँलाई है डादींज़्या, आछिम रील भाल्या ओमाकोद डालाई सोखेप ‘डामासरेसे’ है दान्या नले,” है दोक्यो।

दुख दैन्या बेला

३५ नकिन येसुए प्राईंलाई, “डा नो ड़ादा जेलाई पैसा, पोला, भ्रैर मालाँद ज़ डापरीचिक, काताराए खाँचो माताया?” है ओरादोक ते, “काताए खाँचो ज़ माताके,” है दोकेर।

३६ नकिन फरी, “आकिन ते जेबाक हो मिताव तान्या माले। फरी जेबाक पैसाए ओचाहित ब तारिज़्या, जेभ्रै लाँन्या ओचाहित ब तारिज़्या, सोनो जेस तरवाली ओमालिकिन जेक्वार योःद तादी ब लँःद लाँन्या बेला हुके। ३७ नो डाजूनी धर्मसास्त्रलाव सर्सिउ पाँ ब योःनारिके। नलाव सर्सिउ आव ज़,

‘नोलाई सिन्या सजा दैवरास
तोबोल गनिरिज़्यार।’

नो पाँ डाक्याँत जुनी ब योःव ज़ परिके,” है यादोक्यो। ३८ हाःत ज़ उसिसराए भन, “प्रभु, गेस नेब्लो

तरवाली लिज़्या,” है यादोक ते, “डापाँ जेमातीधुव प्राइँना घलिज़्याक,” है यादोक्यो।

येसुए गेतसमनील ओपोंखारिउ

(मत्ती २६:३६-४६; मर्कूस १४:३२-४२)

३६येसु ननी पुलुस्द एकतारकाव ओबाज़्याव जैतून दाँदादा बाके। उसिसर ब ओलस ज़ बाकेर। ४०नो पोत याकेसोत उसिसरालाई, “पोंखारिचिके, म्नी दुखराल जेमाथंरिधुया,” है दाद, ४१ओल याकिन जाँ अछतड लुँ भोमक केस्न्यावाक बाद नामक उधूँदानी तिकिसिद, ४२“अ बाबु, नयुँ ओताकिन आव डाक्याँत हुरिज़्याव दुखर वैदच्यँके। खाली डा डायुँ माःक, नँ नयुँ ओताकिन वाज़,” है लिद पोंखारिक्यो। ४३हाःत ज़ स्वर्गनी परमेस्वरए तोबो ओचाकज्या हुद येसुलाई सघैक्यो। ४४उयुँर बनै धो थाइव ताद बनै धामास पोंखारिद ओक्याँतिन ओपस्योरं ब भ्नी स्यासो हुद बाप बाप यातेज़्याव। ४५पोंखारिद ओखेमोत उसिसराए ल्योक ओबाक नोर प्राइँ यासोगोए स्याँद यालिज़्याव रँःद, ४६“काराव जेस्याँज्याव? सैसिद पोंखारिचिके, म्नी दुखराल जेमाथंरिधुया,” है यादोक्यो।

येसुलाई याक्योःहुव

(मत्ती २६:४७-५६; मर्कूस १४:४३-५०;

यूहन्ना १८:३-११)

४७येसु ओपाँज्याक ज़ मिँर तबगाल हुकेर। नोराए याड़ा याड़ा बाह जना उसिसरानिकाव यहूदा इस्करियोत उहुज़्याव। नो येसुए ल्योक हुद माइँ ओदोक, ४८येसुए, “अ यहूदा, मिँ मिन्सिउलाई माइँ दाव जैसिद धोका याव नपैज्याव रो?” है ओदोव प्राइँना, ४९येसुस लिज़्यावराए, ‘याक्योःरिज़्याव ची ओल्यो’ लिन्या सैद, “प्रभु, आवरालाई तरवालीए गेरापल रो?” है दाद, ५०तोबोए ते ओतरवाली हाइद प्रधान पुजारीए ओनोकोरलाई वोर्निकाव ओर्ना पल्द सतेदिक्यो। ५१नो रँःद येसुए, “चिम दोके, अइ जैन्या माःक,” है दाद नो मिँए ओर्ना छाप्दचाद सोजोकाव ज़ जैदिक्यो। ५२नकिन येसुए ओललाई क्योःना हुव मुख्या पुजारीर, यहूदीराए यासेरर सोनो ध्यान फ़िमलाव पुलिसरालाई, “काता डालाई दाँकालाई मिताव तरवालीर खोंतार दाद जेक्योःहुनाव? ५३डा दिनकाव ज़ जेस ध्यान फ़िमल डालिज़्याव बेलाक जेमाक्योःनाके। हैदी ब गोइँसिउ मिताव चुम चुमोए ओहक चलैन्या जेबेला आव ज़,” है यादोक्यो।

पत्रुसए 'येसुलाई डामासरेसे'
है ओरादोव

(मत्ती २६:५७-५८, ६६-७५; मार्कुस १४:५३-५४,
६६-७२; यूहन्ना १८:१२-१८, २५-२७)

५४ नकिन येसुलाई क्यो:द प्रधान पुजारीए उभिमक लाँकेर। पत्रुस ब याछीं याछीं जाँ तादाड ओबाङ्याव। ५५ मिँर प्रधान पुजारीए ओचतराक में: दाद यामुईंसिङ्याक पत्रुस ब नोराए ल्योक ज़ चुसिनाके। ५६ नलाव तोबो नोकोर्नी मेंमाए पत्रुस में:ए ओपलाँक चुसिद उलिङ्याव रँ:द नोलाई लँ लँ चिऊद, "आव ब येसुस उलिङ्याव," है ओदोक ते, ५७ पत्रुसए, "अ बुची, डा ते नो है नलिङ्याव मिँलाई डामासरेसे," है दोक्यो।

५८ नकिन जाँवाक फरी तोबोए पत्रुसलाई सरेस्द, "नँ ते होसकाव ज़ सानी," है ओदोक ते, पत्रुसए फरी, "डा ते होसकाव मा:क ब्याँ," है दोक्यो।

५९ नकिन तघन्तावाक फरी तोबो हुद, "आव ब पक्का नोसकाव ज़, आव ते गालीललाव ज़ ची," है दाव ज़ ओनैङ्याव। ६० पत्रुसए भन, "नँ काता नपाँङ्याव इताव, डा काता ज़ डामासैए," है ओदोव प्राइँना भाल्या ब कोके। ६१ हा:त ज़ येसु पत्रुसए ल्योदा भाल्सिके। पत्रुसए नो रँ:द डादा प्रभुए,

"भाल्या ओमाकोद ज़ डालाई स्रोखेप 'डामासरेसे' है लिन्या नले," है ओदोव चेतेद, ६२ लाँ:क पुलुस्द धस धस घर्के।

येसुलाई घ्यो:व कचरील यालाँव

(मत्ती २६:५६-६८; मार्कुस १४:५५-६५;
यूहन्ना १८:१६-२४)

६३ नकिन येसुलाई गुद नैङ्यावराए प्रोद बरे:द, ६४ उमी कपदद्याद, "नँलाई प्रोङ्याव सु? है लिनके," है दोकेर। ६५ फरी बनै उल्लिनी गिल्ली दाद ब थल्केर।

६६ नम उसँव प्राइँना यहूदीराए यासेर, मुख्या पुजारीर स्रोनो सास्त्रीराए घ्यो:व कचरी जैद प्राइँ दुप्सिद, येसुलाई याङ्गाक सच्याँद, ६७ "नँ नो धर्मसास्त्रलाव हुरिङ्याव खीस ज़ रो? नँ साचो हो ज़ ताकिन गेलाई है दासिके," है यादोक ते, येसुए, "है डादाचिदी ब जे डालाई पतिन्या जेमाले, ६८ डा जेलाई डासुधिचिदी ब जे जवाप यान्या जेमाले। ६९ खाली अबकिन मिँ मिन्सिउ माहान परमेस्वरए ओवोर्दा चुसिन्या डाले," है यादोक्यो। ७० हा:त ज़ नलाव भरिए, "हुकी नँ परमेस्वरए ओजा ज़ रो?" है यादोक ते, येसुए, "है ज़, जे है जेलिङ्याव मिताव ज़," है ओरादोव प्राइँना, ७१ नोर भन, "अब ते गेलाई छुत साची माचाहिए, साची भरी ओया:नी ज़ गेथैके," है लिकेर।

रोमी सरकारलाव पिलातस

(मत्ती २७:११-२६; मार्कुस १५:१-१५;

यूहन्ना १८:२८-१९:१६)

२३ नलाव दुप्सिउ भरिए येसु-
लाई पिलातसए ल्योक
लाँकेर। ^२नक लाँद येसुलाई खत लैद
नोराए, “आव मिं खीस जैसिद, गेराजा
ब जैसिउ पैद, रोमी सरकारलाई सिर्मा
यान्या माःक लिद गेदेसलाव मिँरालाई
यामचैज्याव,” है दोकेर।

^३पिलातसए नोराए यापाँ थैद
येसुलाई, “नँ साचो यहूदीराए
याराजा ज़ रो?” है ओदोक ते, “नँ
ज़ नथःरैनाके,” है दोक्यो। ^४नकिन
पिलातसए मुख्या पुजारीर स़ोनो नो
माहोल्यारालाई, “आवए ओखत ते
काता ज़ डामारैःए,” है ओरादोक
ते, ^५नोराए भन, “यहूदिया खन्द
भरिल गालीलकिन आड पै ज़ ओपाँर
सथैद मिँरालाई यामचैज्याव,” है
दोकेर। ^६पिलातसए नोराए यापाँ थैद
आव गालीललाव सैं माःक लिद
सुधिद, ^७“आव ते हेरोदए उकुइताव
ज़ ची ओल्यो’ लिन्या थःरैद हेरोदए
ल्योदा परीक्यो। हेरोद ब हाः बेलाक
यरूसलेमल हुद उलिज्याव।

^८हेरोदए येसुलाई रँःद बनै खुसी
ताके। नोए ड़ादाकिन ज़ येसुए
उजूनी थैद ‘ओदोज्याव सरेसर ब

रँःव डादैकिन ताखेहो’ लिद दैसिउ
ओपैज्याव। ^९है जैद हेरोदए येसुलाई
बनै ज़ खोलेक्यो। खाली येसुए
घाइ ज़ मादोक्यो। ^{१०}हो बेलाक
मुख्या पुजारीर स़ोनो सास्त्रीराए
नक च्याँःसिद येसुलाई खत लैव
ज़ यालिज्याव। ^{११}हाःत ज़ हेरोदए
उसिपाईरास येसुलाई बनै हेलारी
मिताव जैद बरेःन्याए जूनी राजाए
जासिन्या मिताव क्वा जास्द
फरी पिलातसए ल्योदा ज़ लाँव
यापरीक्यो। ^{१२}हो छचामकिन ज़
हेरोद स़ोनो पिलातसनी नी नील खैद
नँ नँ ब ताकिनी। नोनी ड़ादाकिन
निमाखैज्याव।

^{१३}पिलातसए मुख्या पुजारीर,
मिँराए याधेप्पार स़ोनो माहोल्यारालाई
फरी ब दुप्द, ^{१४}“जे ते आव मिँलाई
‘मिँरालाई यामचैज्याव’ लिद ड़ाल्योक
जेरैके। नोलाई जेड़ाक ड़ाफाल्क
जे है जेलिज्याव मिताव ओखतर ते
काता ज़ ड़ामादैके। ^{१५}हेरोदए मनी
ओखत काता ज़ मादैद ड़ाल्योदा
सोवोल्दचाँक्यो। है जैद आव मिँए
सिन्या मिताव येन ओदोव कान्नी ज़
मारैःए। ^{१६}है जैद ड़ा आवलाई तखेप
सजा याद ड़ारास्त्रिज्या,” है यादोक्यो।
^{१७}[नोराए याचलनल पर्वत सालकाव
तखेप तोबो कैदीलाई यारास्त्रियाव।]
^{१८}हाःत ज़ नलावराए, “आवलाई

सैःद बारब्बालाई रास्दचासिके,” है लिद बनै क्रिकेर। १९नो बारब्बा सरकारकिन तँदा जैसिद मिँरालाई मचैद तोबो नेब्बोलाई ओरासैःवनी भयालखानाल उलिङ्ग्याव।

२०पिलातसए फरी येसुलाई रासो ओपैङ्ग्यावए माहोल्यारालाई फरी तखेप यासम्जैक्यो। २१हितावत ब, “आवलाई क्रुसत तङ्गैद सैःन्या ज़,” लिद बनै क्रिकेर। २२हाःत ज़ पिलातसए फरी, “काराव? आवए मादान्या काता दाद ओनैङ्ग्याव? डा ते आवलाई सैःन्या मिताव ओयेन कान्त ज़ डामादैए। है जैद डा आवलाई तखेप सजा याद डारास्त्रिङ्ग्या,” है ओरादोक ते, २३नोर भन बनै ज़ मचिद, ‘क्रुसत तङ्गैन्या ज़’ है लिद याक्रिक पिलातसए ओपाँ ज़ सोडोइदिकेर। २४है जैद पिलातसए यापाँ ज़ थःरैदचाद, २५नो यान्निउ भयालखानाल लिङ्ग्याव मिँ सैःद मिँरालाई मचैव बारब्बालाई रास्दचाद येसुलाई ‘जेजैन्या जैचिके’ लिद यालाई ज़ यासूँपिक्यो।

गलगथा बान्या येमक

(मत्ती २७:३२; मर्कूस १५:२१)

२६येसुलाई सैःना यालाङ्ग्याक नाखारनी हुङ्ग्याव कुरेनीलाव तोबो

सिमोनलाई येसुए ओलाङ्ग्याव क्रुस सुघुर्द येसुए उछीं उछीं बाव परींकेर।

२७येसुए उछीं उछीं बाङ्ग्यावर कुधु माहोल्या ज़ यालिङ्ग्याव। नोरास मेंमार ब घरे घरे याबाङ्ग्याव।

२८नोराए ल्योदा येसु उछींदा भाल्सिद, “अ यरूसलेमलाव मेंमार, डाजुँनी ताघचर्यो। बुरू जेजुँनी सोनो जेजाराए

जुँनी घर्चिके। २९तछा परमेस्वरए ओसजा उहुक आलाव मिँराए, ‘ज़ा मादैङ्ग्याव थारी मेंमार, नुइँ सोवैन्या याज़ा माल्योर याभागी ल्योर ज़ लिङ्ग्यार,’ है लिन्या लेर। ३०सोनो,

‘हाँरालाई ब ‘गेतर्त तेचिके’,

गोरालाई ब ‘गेलाई राल्सिके’

है दान्या लेर।’

३१डा काचो सीं स्यासोलाई अइ याजैनाकिन, या थँव सीं स्यासो-रालाई परमेस्वरए कै याजैवके?” है यादोक्यो।

येसुलाई क्रुसत यातङ्गैव

(मत्ती २७:३३-४४; मर्कूस १५:२२-३२;

यूहन्ना १९:१७-२७)

३२येसुस तखेप्त सैःन्याए जुँनी नेब्बो अपराधीनिलाई ब यारालाङ्ग्याव।

३३नोर खप्पन्ग्या पो यादोङ्ग्यावक याकेसोत क्रुसत यारातङ्गैकेर।

नो अपराधीनिलाई तोबोलाई ओवोर्दा, तोबोलाई ओदाबज्यादा याराजैकेर। ३४ येसुए अइ लिद पोखारिक्यो, “परमेस्वर बाबु, आवरालाई कैज ताराजैयो, यादोज्याव येन मासैर।” नोराए फरी येसुए ओक्वारात गोला भाःद भाःकेर। ३५ मिँर नक च्याँःसिद याभाल्सिज्याव। याघेप्पाराए फरी, “आवए छुतरालाई ते याबाँचैक्यो, परमेस्वरए साचो ओछाँतिउ ख्रीस ज ताकिन ओक्याँलाई ब ओबाँचैवक,” है लिद बरेःकेर। ३६ सिपाईराए ब गिल्लैद ओल्योक बाद सिरो दाखमदच याद, ३७ “नँ यहूदीराए याराजा ताकिन नक्याँलाई बाँचैके,” है दोकेर। ३८ ओललाई तज्जैद यानैज्याव क्रुसए ओडैत फरी,

‘आव यहूदीराए याराजा ज’ है लिद तोबो फल्यात सर्द चकेर।

३६ येसुस तज्जैसिउ अपराधीनी ब तोबोए येसुलाई गिल्लैद, “नँ ख्रीस माःक रो? ख्रीस नताकिन नक्याँलाई मनी गिनलाई मनी बाँचैसिन्के,” है ओदोक ते, ४० ओनैए नोलाई सिडार्द, “नँ सिन्या सजा दैद नैज्यावत ब परमेस्वरलाई रँःद नमाछेःए रो? ४१ गिन ते गिनयेननी ज इताव

सजा दैन्या गिन्ताके। आव मिँए ते मादान्या काता ज मादोव,” है दाद, ४२ येसुलाई, “अ येसु, नँ नराज्याल नपसिक डालाई ब तामेंःनायो,” है ओदोक ते, ४३ येसुए, “नँलाई साचो है डादींज्या, आछिमकिन ज नँ डास स्वर्गत नतारिज्या,” है दोक्यो।

येसु उसिउ

(मत्ती २७:४५-५६; मार्कूस १५:३३-४१;

यूहन्ना १९:२८-३०)

४४ हो बेलाक बाह बजेवाकिन तीन बजे पै देस भरी काल्या कले भयाद, ४५ निमीए ओजगै ज मारेंःके। थिक हो बेलाक ज ध्यान भिमलाव बारिसिउ क्वा ब ओलनी ज नेपरा ताद चिस्के। ४६ हाःत ज येसु ब बनै चोइस अइ लिद किके, “अ परमेस्वर बाबु, आव डापुरुस नपिछाल ज डाईंज्या,” है लिद उस० सफ्याःक्यो।

४७ नक च्याँःसिद लिज्याव कप्तानए नो भरी रँःद, “आव ते साचो धर्मी मिँ ज ची ओल्यो,” लिद परमेस्वरए उमिन सघ्योःक्यो। ४८ नो भाल्सिना हुव माहोल्याराए नो भरी रँःद घरे घरे याभिमदा बाकेर। ४९ ओल येसुस बारिज्याव मिँर सोनो गालीलनी

ओलस हुव मेंमार जाँ तादाड
च्याःसिद याभाल्सिज्याव।

येसुए ओमोरो खादर पुपल याभाःव

(मत्ती २७:५७-६१; मार्कूस १५:४२-४७;

यूहन्ना १९:३८-४२)

५०-५१ यहूदिया खन्दलाव
अरिमाथिया नाखारलाव तोबो योसेफ
यादोज्याव घ्योःव कचरीलाव मिं
ओल्यो। नो धर्मी, परमेस्वरए ओराज्या
खिम्ज्याव मिं ओतावए येसुलाई
सैःन्या यासल्लाल माखैद भैःद
ओमाराएज्याव। ५२नोए पिलातसए
ल्योक येसुए ओमोरो न्कियो। ५३नो
मोरोलाई क्रुसतिन हाइद, पालो क्वाए
लुम्बैद सुलाई ज़ यामाराभाःताव
दावन खुपिद पुप जैद ओनैज्याव
खादरल भाःक्यो। ५४हो छचाम
तयारीलाव दिन ओल्यो। नासिन्या
छचाम सुरू तानाद उलिज्याव।
५५येसुए उछींताव हुव गालीललाव
मेंमार योसेफए उछीं उछीं बाद नो
मोरो ओभाःव खादर चिऊकेर। ५६नो
मेंमार ओल्द बाद येसुए ओमोरोलाई
थीन्याए जूनी चाव सी डरो मासर,
अतरर सरजाम जैद हो पराःती
नासिन्या छचाम ओतावए कानुनलाई
भैःद नासिकेर।

येसु सिउनी सैसिद ओसोव

(मत्ती २८:१-१०; मार्कूस १६:१-११;

यूहन्ना २०:१-१०)

२४ सातालाव उसं कताव
छचाम, नो मेंमार
छकाल्न्या घग ज़ सोद नो सरजाम
याजैव अतररास येसुए ओखादरदा
बाकेर। २नक याकेसोत नो खादरलाई
कसिउ घ्योःव लुं पलतैसिउ रँःकेर।
३नल यापसिक प्रभु येसुए ओमोरो
मादैकेर। ४‘आव कै ओताव’ लिद
यायुं आँचा पाँचा ओताज्याक नेब्लो
बनै तक तकौ क्वा क्वाइसिउनी
उमँःजानी याड़ाक निच्याःसिहुव
यारारँःकेर। ५यारारँःव प्राइँना बनै छेःद
नामक याफुलुप्सिक, नो चाकज्यानी
है यारादोकिनी, “जे जींदोलाई
सिउराए पोल काराव जेखिम्हुज्याव?
६नो आल माले, सैसिद सोधुके। जेस
गालीलल उलिज्याकाव है ओदाचिउ
पाँर याका दोच्यो। ७‘डा मिं मिन्सिउ
पापीराए कुइत सँपिनारिज्यार।
नोराए क्रुसत तडैद यासैःनाव स्रोलात
डासैसिरिज्या,’ है ओदाचिउ सैं
माःक?” है निरादोक ते, ८नो मेंमाराए
नो पाँ चेतैद, ९खादरनी ओल्द बाद
एघार जना उसिसर सोनो ओलस

बारिज़्याव छुतरालाई ब नो पाँ भरी है यारादोनाकेर। १० नो पाँ सथैज़्याव मेंमार तोबो मरियम मगदलिनी, तोबो योअन्ना सोनो तोबो याकूबए ओआमा मरियम याल्यो। यास बाव छुत मेंमाराए ब येसुए ओसाचीरालाई है यारादोज़्याव। ११ नोराए नो पाँ याथैक ओअर्थ माल्यो मिताव थरैद मारापतिकेर। १२ पत्रुस ते थर च्याँ:सिद खादरदा धों:नाद, खादरल घोम लिद उचिऊक येसुलाई लुम्बैसिउ क्वार वाज़ रँ:क्यो। नलाव ताव भरी उयुँल खामिद ओल्द बाके।

इम्माउसदा बान्या येमक येसु ओसरै:सिउ

(मर्कूस १६:१२-१३)

१३ हो छचाम ज़ फरी नेब्लो ओलस बारिज़्यावनी यरूसलेमनी एघार किलोमितरवा तादाड लिज़्याव इम्माउस यादोज़्याव नाखारदा निबाज़्याव। १४ निबाज़्याक ताव पाँ भरी नी नील निपाँनाज़्याव। १५ नोनी पाँए पाँए निबाज़्याक येसु कातानी हुद नीस नीस ज़ बाके। १६ येसुए नोनिलाई ओललाई मासरेस्न्या जैद उनिनैज़्याव। १७ हा:त ज़ येसुए, “जिन काता जिन्पाँहुज़्याव?” है उनिदोक ते, नोनी च्याँ:सिद निडा: चुम चुमो जैद, १८ क्लेओपास यादोज़्यावए,

“यरूसलेमल बाव भरिरानी नलाव आछिम परा:ती ताव पाँ मासैज़्याव नँ वाज़ नलिज़्याव सा,” है ओदोक ते, १९ येसुए, “यरूसलेमल किताव पाँ ओताव?” है उनिदोक ते, नोनी, “नासरतलाव येसु यादोज़्याव तोबो मिँ ओल्यो। नो अगमबक्ता ओतावए परमेस्वर सोनो मिँराए ड़ाक सक्तीलाव येन दाद चावस ओरापैज़्याव। २० नोलाई मुख्या पुजारीर सोनो गेघेप्पाराए सिन्या सजाल सूपिद क्रुसत तङ्गैद सै:केर। २१ गे ते इस्राएलीरालाई बाँचैना हुव ज़ ताखेहो है ची गेल्यो। नो पाँ ओताव आख ते सोला ताधुके। २२ हैदी ब गेसकाव रूवा रूवा मेंमाराए अचम्बलाव पाँ ज़ है दासिकेर। नोर आछ्या छकाल्न्या घग ज़ येसुए ओखादरक याबाक, २३ येसुए ओमोरो खादरल ओमालिज़्याव दी। नक परमेस्वरए ओचाकज्यानिलाई ब यारारँ:केर दी। नोनी फरी ‘येसु जींदो ज़ लिज़्या’ है ब यारादोकिनी दी। २४ है जैद गेसकाव तोबो नेब्लोए नो खादरक याबाक नो मेंमाराए है यालिज़्याव मिताव ज़ ताके। खाली येसुलाई ते मारँ:केर,” है दोकिनी।

२५ हा:त ज़ येसुए, “जे अधमर, अगमबक्ताराए यासरो पाँ खर्क जेतीधुरिज़्याव? २६ नल, ‘खीसए दुखर

सहिद वाज्र बल्ल जगै मगैव ओराज्या
दैरिज्याव' लिन्या सर्सिउ लिज्या,"
है दाद, २७ मोसाए ओसरोकिन
अगमबक्तराए यासरो पैकाव ओल
उजूनी धर्मसास्त्रलाव सर्सिउ पाँर
पलास्द निएक्यो।

२८ हाःत ज़ नो नाखार याकेस्हुवत
येसु नोनिकिन जाँ ड़ादा बाव
ओपैज्याव मिताव ओजैसिक, २९ नोनी
घलैद है दोकिनी, "नम भयानाके।
आछिम गिनस ज़ लिनके," है निदोक
ते, भैःद नीस ज़ बाके। ३० नोनिस
ज्यान्याए जूनी चुसिद, भरेस उकुइत
रैद, असिक निद, केःद निएक्यो।
३१ उनियो प्राइँना ज़ 'आव ते येसु
ची ओल्यो' लिद सरेस्किकनी। हाःत
ज़ येसु ब नक ज़ समैसिके। ३२ नोनी
फरी नी नील है लिकिनी, "येसु
गिनस ज़ ओल्योए ची ओल्यो, नो
येमत गिन्हुज्याकाव धर्मसास्त्रलाव
पाँर पलास्द ओयासिन्क गिनयुँर हाः
होलाँ ओताव," है लिद, ३३ हतप्त ज़
च्याँःसिद यरूसलेमदा ओल्द बाद
एघार जना उसिसर छुत यानैरास
दुप्सिद यालिज्याव निरादैनाक,
३४ नोनी निपाँ निमापाँद ज़ नोराए,
"साचो ज़ ओल्यो, गोप्रभु जींदो ज़
उलिज्याव ओल्यो। सिमोनए ओड़ाक
ब सरैःसिके," है यारादोकेर। ३५ फरी
नोनी ब नो येमताव पाँ भरी है दाद,

"भरेस केःद ओभाःव प्राइँना ज़
गिन्सरेस्के," है यारादोकिनी।

येसु उसिसराए ड़ाक ओसरैःसिउ

(मत्ती २८:१६-२०; मर्कुस १६:१४-१८;
यूहन्ना २०:१६-२३; ओसाचीर १:४-८)

३६ निताव यापाँज्यावत ज़ येसु
उमँःजानी ज़ याखार्ल च्याँःसिहुद
नोरालाई, "जेयुँर होलाँ ओताक,"
है यादोक्यो। ३७ नो यारँःव प्राइँना
तखँडरी छेःद, 'आव ते भया ची सा'
है लिद बनै याछेःज्याक, ३८ येसुए,
"जे कै जैद 'हो ज़' लिद जेयुँ माहुपुद
जेछ्याचेए जेयुँर भुतु भुतु जेजैज्याव?
३९ आव ते डा ज़ ची, डाखँ डाकुइताव
घाइर चिऊद सरेस्नाचिके। जे है
जेलिज्याव मिताव भया डाताकिन
ते डास्या डारूसर मालिखेहो। जेयुँ
ओमाहुप्किन छाप्नाचिके," ४० है दाद
उखँ उकुइर सतैद याएक्यो। ४१ निताव
रँःद बनै अचम्ब ताद यारँतए,
'आव गेमँच्यानी गेरँःज्याव सँ साचो
गेरँःज्याव ओताव' है यालिज्याक,
येसुए, "जेस ज्यान्यार मालिज्या?" है
ओरादोक ते, ४२ हिप्सिउ डाँः तगेंदा
याएक ते, ४३ प्राइँए याड़ाक ज़ कैक्यो।

४४ नकिन येसुए, "डा जेस
डालिज्याकाव मोसाए ओकानुनल,
अगमबक्तराए यासरोल सोनो भजन
पोस्तोकोल ब डा डाजूनी सर्सिउ भरी

जुनी ब डाक्यांत योव ज़ परिके लिद है दाव ज़ डानैचिज़्याव,” है दाद, ४५ धर्मसास्त्रलाव सर्सिउ पाँए ओअर्थ भरी पलास्दद्याद, ४६ “धर्मसास्त्रल ब ‘ख्रीस दुखर सहिद उसिउ स्रोलात सैसिरिज़्या’ लिद सर्सिउ लिज़्या। ४७ स्रोनो यरूसलेमनी सुरू जैद प्राइँ जातलाव मिँराए ल्योड बाद, ‘जेयुँ परमेस्वरए ल्योदा फर्केचिकेदा, जेपाप भरी ख्रीसए उमिननी क्याल्सिरिज़्या,’ है लिद प्राइँदा ज़ यारासथैनाचिके। ४८ जे आव पाँत डासाचीर ताद जेले। ४९ है जैद डा डाबाबुए ओय्याकालाव छैव पुरूस परींद डायाचिरिज़्या। खाली जे नोए ल्योनिकाव सक्तीर

जेमादैवा पै यरूसलेमल ज़ लिच्यो,” है यादोक्यो।

येसु स्वर्गत ओबाव

(मर्कूस १६:१९-२०; ओसाचीर १:९-११)

५० नकिन येसुए नोरालाई बेथानिया नाखारक पै ओलस ओलस ज़ लाँद उकुइर रांद नोरालाई असिक याएक्यो। ५१ नो असिक ओराएज़्याक ज़ नोराए ल्योनी छींसिद स्वर्गदा बाके। ५२ नोराए उमिनर बनै सघ्यो:दद्याद रेंए रेंए यरूसलेमदा ओल्द बाद, ५३ दिनकाव ज़ ध्यान भिमल परमेस्वरए उमिन सघ्यो:दद्याव ज़ नैकेर।